


4

76424



L'ONIROCRITE MUSULMAN,
O V
LA DOCTRINE
ET INTERPRETATION
DES SONGES


SELON LES ARABES,

Par Gabdorrhachaman fils de Nasar.

*De la Traduction de M. PIERRE
VATTIER Docteur en Medecine,
Lecteur & Professeur du Roy
en langue Arabe,*

Sur le Manuscrit Arabe.

*Exc. Librairie de la Cour de la Bastille
1764*



76414

A PARIS,
Chez THOMAS IOLLY, au Palais,
dans la Salle des Merciers, à la
Palme, & aux Armes d'Hollande.

M. DC. LXIV.

AVEC PRIVILEGE DV ROY.

LES ÉCRITS DE MESSIEURS

LA DOCTRINE

ET INTERPRÉTATION

DES SONGES

SELON LES ARABES

Genève
chez M. de la Roche

De la Roche
VATTEUR

chez M. de la Roche

chez M. de la Roche

A PARIS


Chez Thomas Jolly, au Palais

dans la Salle des Merciers, à la

Painne, & aux Armes d'Hollande.

M. DC. LXIV.

AVEC PRIVILEGE DU ROI



AVROY.

SIRE,

*Quelque disproportion
qu'il y ait entre la legereté
des Songes, & la solidité des
occupations ordinaires de V.
MAIESTE', j'espere que
la hardiesse que ie prends de
luy dedier ce traité Onirocriti-*

à ij

EPISTRE.

que, ne se trouuera pas tout à fait hors de propos. Car si le sommeil est vn des fruits de la Paix, comme le témoignent les paroles du Roy Prophete ; estant en paix, ie dormiray aussi-tost que ie seray couché ; & si les Songes significatifs suiuant l'opinion des Onirocrites, sont des productions de la plus douce partie du sommeil, qui est celle du point du iour ; quand ie dédie l'explication des songes à l'Auteur de la Paix, dont nous joüissons, n'est-ce pas faire en quelque façon comme ceux qui font offrande à Dieu des es-

EPISTRE.

pics & des grapes, qu'il fait naistre dans leurs champs & dans leurs vignes? Je ne pense pas, SIRE, que les plus seueres Censeurs puissent dire, qu'apres auoir traduit l'Histoire des Chalifes, & celle du grand Tamerlan, i' ai bien abusé de mon loisir de m'amuser à traduire vn Liure de songes; sans qu'en mesme temps il leur vienne en pensée, que c'est vn Dieu, ou du moins sa plus parfaite image qui nous a causé cét heureux loisir.

Que si cette pensée n'est pas assez douce pour tēperer leur aigreur, ie pourray leur dire en-

EPISTRE.

core que ce Liure est plus important que son tiltre ne semble promettre, qu'il est tout remply d'erudition, & que son texte Arabe, dont cette Version pourra faciliter l'intelligence, quand il aura esté donné au public, est des plus utiles pour l'auancement de ceux qui cultiuent les lettres Arabiques. C'est ce qui me confirme l'esperance que V. MAIESTE n'aura pas desagreable que i'ose luy presenter ce petit Ouvrage, pour un commencement de la reconnoissance que ie dois à ses graces, en attendant que par l'offrande que

EPISTRE.

*ie luy prepare d'autres plus
grands travaux, ie face voir
au monde avec quelle ardente
passion & quel profond res-
pect ie suis,*

SIRE,

De Vostre Majesté,

*Le tres humble, tres-obeissant &
tres-fidelle seruiteur & sujet,*
PIERRE VATTIER.



PREFACE

SVR LA TRADUCTION de l'Onirocrite Mussulman.

LA curiosité de sçauoir l'aue-
nir est si naturelle à l'homme,
que de tout temps toutes les
Nations en ont embrassé diuers
moyens. Car les Assyriens, les
Chaldéens & les Egyptiens, y ont
employé l'Astrologie; les Grecs ont
eu recours à leurs Oracles; les Ro-
mains ont obserué les Auspices &
les augures dés la fondation de leur
ville, & depuis ils ont fait venir
les Haruspices de Toscane, & con-
serué soigneusement les predi-
ctions escrites par la Sibylle, afin
de les pouuoir consulter dans les
occasions; les Israëlités ont ouï la
voix des saints Prophetes, que nous

P R E F A C E.

croyons encore avec eux auoir esté
inspirez de Dieu, lequel par con-
sequent n'a pas desapprouvé cette
inclination de la Nature. Les an-
ciens Philosophes, & entre-autres
les Stoïciens, ont tant estimé cette
connoissance de l'auenir, & en ont
creu le principe, qu'ils ont appel-
lé generalement en Grec *μαντικὴ*,
& en Latin *diuination*, si absolu-
ment necessaire, qu'ils n'ont point
fait de difficulté d'asseurer, que la
Diuinité & la Diuination estoient
des choses dont les existences ne
se pouuoient establir l'une sans l'au-
tre; que si l'on admettoit la Diuina-
tion, il falloit admettre la Diuini-
té; & que reciproquement si l'on
admettoit la Diuinité, il falloit ad-
mettre la Diuination. Cependant
ils ne sont pas demeurez d'accord
des genres de Diuination, qu'il fal-
loit approuuer. Car plusieurs d'en-
tr'eux ont rejetté les auspices &
les augures, & le sort, & plusieurs
autres moyens de deuiner, & mes-
me l'Astrologie; mais ils ont

PREFACE.

pour la pluspart authorisé d'un commun consentement les enthousiasmes & les songes. Aussi sont-ce les deux especes que nous voyons vſitées de tout temps dans la vraye Religion. Car les Inspirations des saints Prophetes sont de l'espece de l'enthousiasme ; & pour ce qui est des Songes, nous en voyons beaucoup d'exemples, tant dans l'ancien que dans le nouveau Testament.

Il est vray qu'au dix-neufiesme Chapitre du Leuitique, il est expressément defendu de deuiner & d'auoir esgard aux songes, *non augurabimini nec obseruabitis somnia* ; mais cette defense doit sans doute estre interpretée sagement & benignement. Car s'il auoit esté defendu generalement en ce passage de prédire l'auenir par quelque moyen que ce fust, il faudroit condamner tous les Prophetes qui sont venus depuis Moÿse, comme transgresseurs de la Loy de Dieu ; & si cette defense se deuoit reduire estroit-

P R E F A C E.

tement aux augures & aux songes, sans qu'il eut esté permis depuis d'ajouster aucunement foy ny à l'un ny à l'autre, il faudroit condamner le Prophete Daniel d'auoir fomenté la superstition du Roy Nabuchodonozor en luy interpretant son songe; & les Mages, qui vindrent adorer Nostre-Seigneur, d'auoir adjouste foy à l'aduertissement qui leur fut donné en songe, de ne pas reuoir Herodes en s'en retournant, comme il les en auoit priez; & beaucoup encore dauantage Saint Ioseph & la Sainte Vierge, d'auoir exposé la personne sacrée de N. Seigneur Iesus-Christ aux perils & aux incommoditez d'un long voyage, sur un songe qui les aduertissoit de le porter en Egypte. Que si l'on dit que ces songes icy, & particulièrement le dernier, estoient Diuins, & par consequent d'une espece plus noble que les ordinaires; ie l'auotieray tres-volontiers, comme vne chose qui ne reçoit pas de difficulté; mais il semble aussi que

P R E F A C E.

L'on doit auoüer que la noblesse de cette espece releue beaucoup tout le genre des songes, dans lequel elle est comprise ; puisque Dieu entre tant d'autres moyens, dont il pouuoit vser pour faire connoistre sa volonté à des personnes qui luy estoient si cheres, l'a choisi & preferé en vne occasion si importante.

Tout cela fait que quoy que ie n'aye iamais eu beaucoup de croyance aux songes, ie ne puis blasmer ceux qui les considerent plus que ie ne fais, ny m'estimer pour cela plus sage qu'eux. Car quand nous n'aurions pas les exemples des saintes personnes, que nous venons de dire, quelle arrogance seroit-ce que de s'estimer plus sage que les Stoiciens, que Xenophon, que Platon, que Socrate, que tant d'autres Philosophes, qui ont consideré leurs songes, & qui ont donné aux autres des preceptes pour bien songer ? Chrysippus a fait vn Liure exprés pour establir la Diuination par les songes ; Xenophon a inseré ses pro-

PREFACE.

pres songes dans son Histoire de la retraite des Dix mille ; Socrate trois iours avant que de mourir raconta à ses amis vn songe qui luy estoit arriué & qui luy prédisoit sa mort dans le troisieme iour par vn vers d'Homere, que luy auoit prononcé vne belle femme, qui luy estoit apparüe, & dont voicy le sens, *dans le troisieme iour tu passeras à Phthie.* Le mot de *Phthie* dans Homere, est le nom d'une ville, mais il se peut aussi entendre de la corruption & de la mort. Platon dans sa Republique recommande de souper modérément & de viandes bonnes & salubres, afin d'auoir en suite en dormant des songes doux, reguliers, & veritables dans leurs significations.

Ceux qui méprisent generalement tous les songes, se fondent particulierement sur deux raisons, dont la premiere est, que constamment il s'en rencontre vne grande quantité qui ne signifient rien ; & la seconde, qu'ils ne voyent pas de raison de la

P R E F A C E.

signification des autres. Mais encore qu'il s'en trouue beaucoup qui ne signifient rien, cela n'empesche pas qu'il n'y en ait qui signifient quelque chose, non plus que dans la Medecine, quoy qu'il arriue à vn malade grand nombre de symptomes, dont la consideration ne peut seruir de rien pour la connoissance de son mal, il ne faut pas pour cela mespriser les signes pathognomoniques, ny les mettre au rang des symptomes communs. Quant à la raison de la signification, quoy que nous ne la connoissions pas, ce n'est pas à dire qu'elle ne soit point; car il est bien d'autres choses qui nous sont inconnuës; c'est pourquoy quand les Onirocrites n'en rendroient aucune de leur fait, que la seule experience, les songes sacrez, dont nous auons parlé cy-dessus, ne nous permettroient pas de dire generalement que tous les songes sont vains & friuoles.

Quelqu'vn dira peut-estre qu'en effet nous deuons reuerer & croire

P R E F A C E.

les songes diuins, dont il est fait mention dans les saintes Escritures, puisque la Foy nous y oblige; mais qu'il s'en faut arrester-là, & croire par consequent qu'il a esté autrefois des songes significatifs & vrais; mais non pas qu'il en soit encore. L'on peut, à mon aduis, estre bon Chretien avec cette pensée; car ie ne croy pas qu'il y ait de passage dans les saintes Escritures, où Dieu promette de fauoriser à l'auenir ses seruiteurs de songes pareils à ceux qu'il a enuoyez aux Mages & à S. Ioseph; mais pourtant il semble qu'elle n'est pas exempte de quelque temerité. Car pourquoy Dieu ne fera-t'il pas maintenant aux siens des faueurs pareilles à celles qu'il leur a faites autrefois? est-il moins puissant ou moins bon qu'il n'a esté? Certes l'on pourroit par mesme moyen nier la verité de tous les miracles qui ne sont pas rapportez dans la sainte Escriture.

Mais outre cela, il n'est pas vray que les Onirocrites ne rendent au-

P R E F A C E.

cune raison de leur doctrine. Car les Philosophes qui l'ont defenduë, ne l'ont pas fait sans raison, & il est à croire que si nous auions les Liures de Chrysippus, de Posidonius, de Cratippus & des autres qui ont traité cette matiere, nous y en trouuerions de belles, entre lesquelles sans doute, celle que nous auons iusques à present indiquée, & qui est prise de la volonté de Dieu, & de l'amour qu'il a pour les hommes, seroit la premiere, suiuant la diuision que les Onirocrites font generalement des songes en diuins, que les Grecs appellent *θεοπέμπτες* & en naturels. Ils en font encore vne autre diuision assez considerable en Theorematicques & Allegoriques. Les Theorematicques representēt les choses telles qu'elles sont, sans figure ny enigme. Par exemple, Simonide ayant enseuely vn mort qu'il auoit trouué sur le riuage, le vit en songe la nuit suivante, qui luy deffendoit expressément d'executer le dessein qu'il

PREFACE.

auoit de se mettre le lendemain sur mer, parce que s'il le faisoit, il feroit infailliblement naufrage, comme en effet ceux qui s'embarquerent dans le vaisseau, où il se fust mis sans cela, perirent miserablement. Les Allegoriques sont ceux qui signifient les choses obscurément & par maniere d'enigme, & en vn mot qui ont besoin d'Interprete. Par exemple, Ciceron estant chassé injustement de Rome par les menées de ses ennemis, vit Marius en songe, qui l'exhortoit de prendre courage & le faisoit mener par vn de ses gens en son monument, parce qu'il deuoit trouuer-là son salut; ce qui luy signifioit, comme l'effet le monstra, que l'Arrest de son rappel seroit donné par le Senat assemblé dans ce lieu-là. Ils les diuisent encore en Prorrhétiques & Horamatiques. Les Prorrhétiques sont ceux qui prédisent l'auenir, comme faisoient ceux dont nous venons de faire mention; les Horamatiques sont ceux qui representent

P R E F A C E.

vne chose au mesme temps qu'elle se passe, par exemple celuy de Rangel, qui voyoit deux Beliers s'entreheurter sur les parties naturelles de sa femme, dont il est fait mention par nostre Autheur au dixiesme Chapitre de ce Liure; car il estoit tout ensemble Horamatique & Allegorique; & celuy qui est rapporté par Alexander ab Alexandro dans l'onzieme Chapitre de son premier Liure, d'un ieune homme qui voyoit en songe porter sa mere en terre, & pleuroit sa mort amere-ment, au mesme temps qu'on l'y portoit en effet, mais bien loin de là. Ce songe estoit Horamatique & Theorematicque, & sembla si admirable au bon Iurifconsulte qui le raconte, comme en ayant esté tesmoin, qu'il l'oblige de finir ce Chapitre en ces termes. *Quibus exemplis admonemur, ut esse prescita quiescentis animi, & diuinationes, humanaque mentis presagium, quasi vaticinium futurorum, diuinitus mortalibus datum per somnia, credamus.*

PREFACE.

Ces mots tesmoignent que ce bon homme tenoit ce songe pour diuin, & il semble mesme qu'il vueille par là que tous les autres le soient, quand ils seruent à la diuination. En effet, à prendre la Diuination au sens que luy donnoient les anciens, quand ils la définissoient *vue prediction des choses fortuites*; comme il n'appartient qu'à Dieu seul de préuoir des choses de cette nature, il n'y a que luy seul qui puisse en donner connoissance aux hommes; si ce n'est que l'on vueille vn peu estendre la signification de ce mot de *fortuites*, & entendre par là toutes les choses communément estimées telles, quoy qu'en effet elles ne le soient pas. Car en ce cas-là il semble que l'on peut aussi deuiner plusieurs choses par des songes purement naturels, tout de mesme que l'on peut préuoir plusieurs choses en veillant, par des pensées purement naturelles, en considerant & mesurant les mouuemens des causes qui les doiuent produire.

PREFACE.

L'on ne doit peut-estre pas mesme s'estonner que l'esprit preuoye quelquefois en dormant, ce qu'il n'aura pas peu preuoir en veillant; car pareille chose arriue en beaucoup d'autres operations de l'esprit, qui se trouuent meilleures en dormant, que l'on n'a peu les faire en veillant. Pour moy il me souuient que pendant que i'allois au College, i'ay fait plusieurs fois en songe des Vers que ie n'auois peu faire estant esueillé; & que d'autres fois i'en ay fait de meilleurs estant endormy dans mon lit, que ie n'eusse peu faire en trauaillant bien dans mon cabinet. Galien tesmoigne de mesme qu'il s'est plusieurs fois aduisé en dormant de bons & salutaires remedes, qui ne luy estoient point venus en pensée quand il veilloit, & dont il auoit en suite guery les malades suiuant ses songes. Je ne parle point icy des songes naturels, qui seruent de signes aux Medecins, pour connoistre l'estat de la santé de ceux qui les ont, &

PREFACE.

dont Hippocrate a fait vn Liure, où en passant il louë l'Onirocritique ; car de cette manière c'est le Medecin qui preuoit l'auenir par tels signes, & non pas celuy qui songe ; ie ne parle que de ceux par lesquels celuy qui songe, preuoit luy-mesme l'auenir en songeant, & le prédit en sorte, que l'Onirocrite est seulement son Interprete, quand il parle obscurément, & qu'il ne s'entend pas luy-mesme.

Quelqu'vn dira peut-estre que tels songes naturels ne peuvent estre autres que Theorematicques, puisqu'ils doiuent prouenir d'vne meditation de l'esprit, pensant actuellement aux choses dont il est question, & que par consequent ils n'ont iamais besoin d'estre interpretez. Mais peut-estre aussi luy pourra-t'on respondre, que cela seroit bon à dire, si vn songe n'en pouuoit pas produire vn autre, & si nous nous resouuenions tousiours de tous ceux que nous faisons ; mais estant certain premierement que

P R E F A C E.

nous en oublions la plus grande partie, & particulièrement ceux que nous faisons dans le commencement de nostre sommeil, ne nous ressouvenant bien que de ceux de la fin, & peut-estre que de ceux sur lesquels nous nous esueillons; & secondement n'y ayant point de doute qu'un songe n'en produise un autre, tout de mesme que pendant que nous veillons, il se fait ordinairement un long enchainement de pensées, dont les dernieres sont fort differentes des premieres; & non seulement de pensées, quand l'on est seul, mais aussi de discours, quand l'on s'entretient deux ou plusieurs personnes ensemble sur des matieres indifferentes; ces deux choses, dis-je, étant supposées, comme elles sont tres-veritables, il se peut faire qu'un songe Theorematicque que l'on aura oublié, en ait produit un Allegoriquel, dont l'on se souviendra, & sur lequel l'on ira consulter l'Onirocrite, lequel en ce cas, s'il l'interprete bien, luy donnera pour explication

P R E F A C E.

le Theorematique oublié. Cela estât, les songes Naturels sont sujets à interpretation aussi bien que les Diuins, & par consequent il se peut establir vn Onirocritique naturelle commune à toutes les nations de quelque Religion qu'elles soient.

Bien plus; il semble que les songes Diuins, plutôt que les Naturels, deuroient s'entendre tousiours sans interpretation. Car il semble que si Dieu veut reueler quelque chose, il le fera avec perfection, c'est à dire, avec clarté & sans ambiguité; & il y a bien de l'apparence que les songes, dont nous auons parlé cy-dessus, tirez du nouveau Testament, ont esté de cette nature. Toutesfois puis que mesme à des personnes que Dieu cherissoit tant, il a plutôt fait connoistre sa volonté par des songes en dormant, que par des visions claires & évidentes en veillant; il y a bien de l'apparence qu'à d'autres, qu'il fauorisera moins, il leur pourra enuoyer des songes Allegoriques, veu particulièrement

P R E F A C E.

qu'en veillant mesme pour l'ordinaire les peuples n'entendoient de la bouche de Nostre-Seigneur que des paraboles, comme ils auoient fait auparauant de celle des Prophetes. Mais pour ce qui est de tels songes Diuins & Allegoriques, l'interpretation en doit ce semble estre reseruée à ceux qui font profession de la vraye Religion, si bien que l'on ne peut tirer pour cela aucune instruction de nostre Autheur, qui estoit Mahometan; si ce n'est peut-estre entant que la superstition Mahometane parmy ses faussetez, admet plusieurs veritez, qui luy sont communes avec la Religion Chrestienne, & avec l'ancienne des Israëlites, ce qui pourroit bien faire trouuer des preceptes dās nostre Autheur qui ne seroient pas à mépriser, mesme pour ce qui concerne les songes diuins.

Quoy qu'il en soit, i'espere que ceux qui adjoustent quel que foy aux songes, seront bien aise d'apprendre par cette version, de quelle maniere
les

P R E F A C E.

les Arabes Mussulmans ont traité cette matiere ; & que ceux mesme qui n'y ont aucune croyance, auront de la satisfaction d'y considerer comme en vne Histoire cette partie de la superstition Mahometane, & d'y remarquer plusieurs façons de faire des peuples Orientaux, sans mention desquelles nostre Auteur n'a peu exposer en detail ses interpretations ; ce qui fait sans doute qu'il n'est pas moins utile pour l'erudition Arabique, que l'est Artemidore pour la Grecque & pour la Romaine.

Quant à ceux qui desirent outre cela s'acquerir la connoissance de la langue Arabique, ie ne pense pas qu'ils puissent choisir vn Auteur plus utile pour s'y exercer, que celui cy, tant à cause de la netteté & facilité de son stile & de la pureté de sa diction, que de la multitude & varieté des choses dont il parle icy, toutes prises de la vie commune & des actions ordinaires des hommes du pais, c'est pourquoy nous tasche-

P R E F A C E.

rons de donner quelque iour au public le texte Arabe de cette Version.

Quant aux autres qualitez de la personne du fils de Nasar, ie n'en puis rien dire, sinon que peut-estre Nasar, dont il se dit fils, ou descendant, est celuy qui a esté Gouverneur de Chorafane pour Meroüane l'asne vingt & vniesme Chalife, & dont parle le Macine en l'an 127. & 131. où il le surnomme pourtant fils de Siare, & non fils de Gabdolle; mais il se peut faire que Siare se soit aussi appellé Gabdolle. Les trois Auteurs qu'il cite souuent, & des Liures desquels il dit auoir recueilly le sien, sont fort anciens. Gegafar le veritable est mort en l'an cent quarante sept de la retraite, selon le Macine. Il estoit petit fils de Gali cinquiesme Chalife. Le fils de Sirin a vescu sous Gabdolmelic douziesme Chalife, suiuant l'Histoire du songe de Gabdolle fils du Zebire, rapportée dans le dixiesme Chapitre de ce Liure, & celle du Sacre & de la Colombe blanche dans le 22.


P R E F A C E.

Quelqu'un s'imaginera peut-estre que ce Mahomet fils de Sirin est l'Autheur des Onirocritiques, qui ont esté mis au iour en Grec au commencement de ce siecle par Nicolaus Rigaltius avec ceux d'Artemidore, parce qu'il les a attribuez, quoy qu'avec assez peu de fondement, à un Achmet fils de Seirim, ayant esté auparauant imprimez en Latin & en François, sous le nom d'Apomasar; car le nom d'Achmet ou Achamed, & celui de Mahomet, passent souuent l'un pour l'autre en Arabe, le Fondateur de la superstition Mussulmane les ayant portez tous deux indifferemment; mais cela ne peut pourtant pas estre. Car l'Autheur de ces Onirocritiques Grecs paroist manifestement en plusieurs passages de son Ouurage auoir esté Chrestien; & Mahomet fils de Sirin a constamment esté Mahometan, comme le tesmoignent plusieurs passages du fils de Nasar, qui paroist par tout son Liure auoir esté fort bien instruit de l'Histoire

PREFACE.

de ceux qu'il nomme, puis qu'il ne dit rien des personnes de marque, dont il fait mention, qui ne conuienne parfaitement avec ce qu'en dit le Macine dans son Histoire des Chalfes, que nous auons cy-deuant traduite en François, & donnée au public; comme nous ferons aisément voir par quelques Annotations que nous en mettrons en marge, Dieu aidant.

Mais c'est peut-estre trop ennuyer le Lecteur dans vne Preface; venons donc au Texte de nostre Auteur, auquel nous auons pris la liberté d'ajouster seulement le Tiltre que l'on voit au frontispice de cette Version, celuy qu'il dit luy auoir donné; ne se trouuant pas placé en lieu où l'on penst aisément le remarquer, non plus que ceux des autres Manuscripts Arabes pour l'ordinaire.



L'ONIROCRITE

MVSSVLMAN,

OU LA DOCTRINE

Et interpretation des Songes

Selon les Arabes.

Par Gabdorrhachaman fils de Nafar.

Dessein de l'Authheur.

AV Nom de Dieu clement
& misericordieux. Loué soit
le grand Dieu qui nous mene par
le vray chemin, nous ayant mis
par vne particuliere faueur sous la
conduite de Mahomet Prince des
enuoyez. Qu'il continuë à iamais
ses graces à ce grand Prophete, &
à tous ceux de sa maison, iusques
au iour du Iugement. Voicy vn
Traité de l'interpretation des Son-
ges, dit Gabdorrhachaman fils de
Nafar fils de Gabdolle, que i'ay

recueilly en forme d'abbregé, du
Liuré de Mahomet fils de Sirin,
intitulé *La fleur de l'interpretation*;
de celuy de Gegafar le veritable,
intitulé *La Methode de discourir*;
& de celuy d'Ibrahim le Carma-
nien, qui a pour Tiltre, *La crème
de l'explication*. J'ay mis ensemble
les choses dont ces Autheurs de-
meurent tous d'accord pour ce qui
regarde la verité de cette doctrine,
& remarqué quelques-vnes de leurs
opinions particulieres. J'ay diuisé
cét Ouvrage par Chapitres & par
Sections, & l'ay enrichy de quel-
ques Histoires, selon les matieres,
pour le rendre plus facile & plus
agreable au Lecteur. Je luy ay don-
né pour Tiltre, *Recueil de ce qui se
peut dire de meilleur sur l'interpre-
tation des songes*. Les Chapitres sont
au nombre de vingt-quatre. Dieu
nous fauorise de son secours & de
ses graces & de sa protection.



PRIVILEGE DV ROY.

PAR grace & Priuilege du Roy, donné à Paris le 24. iour de Decembre 1663. Il est permis à **LOUIS BILLAINE**, Marchand Libraire à Paris, d'imprimer ou faire imprimer, vendre & debiter vn Liure intitulé, *L'Onirocrite Mussulman*: Avec deffenses à tous autres Imprimeurs ou Libraires, de l'imprimer ny contrefaire, à peine de confiscation des Exemplaires contrefaits, de tous despens, dommages & interests, & de trois mille liures d'amende; & ce durant le terme & espace de sept

années entieres & consecuti-
ues, à commencer du iour
qu'il sera acheué d'imprimer,
ainsi qu'il est plus au long
porté par lesdites Lettres de
Priuilege. Par le Roy en son
Conseil, Signé BOVCHARD.

Et ledit BILLAINE a associé avec luy
THOMAS IOLLY, aussi Marchand
Libraire à Paris, pour en jouir
suiuant l'accord fait entr'eux.

*Registré sur le Liure de la Com-
munauté des Marchands Libraires de
Paris le 7. Ianuier 1664. suiuant
l'Arrest du Parlement du 8. Avril
1653. Signé, E. MARTIN, Syndic.*

Les Exemplaires ont esté fournis.

*Acheué d'Imprimer pour la pre-
miere fois le 5. Mars 1664.*




TABLE DES CHAPITRES.

- CHAP. I. *page 1^{re}* **D**Es qualitez requi-
ses en l'Interpre-
te des Songes, de leur di-
stinction, & de la con-
noissance de leurs Prin-
cipes.
- CHAP. II. *p. 13* Des Songes où l'on voit
Dieu Tout-Puissant &
tout bon.
- CHAP. III. *16* Des songes où l'on voit
les Anges, les Prophetes,
les gens de bien, les Do-
cteurs, le Temple quarré,
l'appel à la Priere, la
Priere, la Lotion & la
Purification, le Voyage de
la Mecque.
- CHAP. IV. *23* Des songes où l'on voit le
Ciel, le Soleil, la Lune,

T A B L E.

les *Estoilles*, le *Paradis*,
l'*Enfer*.

41 CHAP. V. Des songes de *Pluyes*,
d'*Eaux*, de *Puits*, de
Mers, de *Ruisseaux*, de
Rivieres, de *Nauires*, de
Moulins, de *Bains*, de
Vens.

57 CHAP. VI. Des songes où l'on voit
des *Terres*, des *Monta-*
gnes, des *Deserts*, des
Collines, des *Bastimens*,
des *Pierres*, des *Rochers*,
des *Maisons*, des *Ruines*,
des *Tremblemens* de terre.

69 CH. VII. Des songes où l'on voit
des *Arbres*, des *Fruits*,
des *Grains*, des *Bleds*, de
la *Verdure*, des *Herbes*,
des *Jardins*.

80 CH. VIII. Des songes de *Vins* & de
Laits.

84 CHA. IX. Des songes où l'on voit
des *Hommes*, des *Fem-*
mes, des *parties* du corps
humain, des *fientes* d'*Ani-*
maux.

T A B L E.

- CHAP. X. *Des songes de Noces, de*
Coit, de Parties naturel-
les de Femmes, d' Accou-
chement, & d' Allaitemēt.
 115
- CH. XI. *Des songes de la Mort, &*
des Morts, de leurs nou-
velles & de leur conuer-
sation.
 120
- CH. XII. *Des songes d' Etofes &*
d' Habits, de leurs diffe-
rentes couleurs, de Tapis,
& de choses semblables.
 125
- CH. XIII. *Des songes de Pierreries,*
de Ioyaux, d' Or, d' Ar-
gent, & de monnoye d' Or
ou d' Argent, ou d' Airain.
 135
- CH. XIV. *Des songes de Vaisseaux*
& d' Vtenfiles de menage.
 145
- CH. XV. *Des songes d' Armés.* - - - 149
- CH. XVI. *Des songes de Cheaux,*
158 de Mulets, d' Asnes.
- CH. XVII. *Des songes de Chameaux,*
168 de Bœufs, de Moutons,
de Chevres.
- C. XVIII. *Des songes de Bestes sau-*
uages bonnes à manger, &
de leurs Laits.
 180

T A B L E.

- CH. XIX. *Des songes d' Elephans &
183 de Bestes de proye.*
- CH. XX. *Des songes de Serpens, de
193 Scorpions, & d'autres
insectes & reptiles.*
- CH. XXI. *Des songes de Poissons &
201 d' Animaux aquatiques.*
- CH. XXII. *Des songes d'Oyseaux de
204 proye & d'autres.*
- C. XXIII. *Des songes de Mestiers,
214 Arts, & passetemps.*
- C. XXIV. *De quelques autres di-
223 stinctions & raretez qui
se rencontrent dans l'in-
terpretation des songes.*



LA DOCTRINE
DES SONGES,

Selon les Arabes.

CHAPITRE PREMIER.

Des qualitez requises en l'Interpretation des Songes, de leur distinction, & de la connoissance de leurs Principes.



ES Songes faisant vne des quarēte-six Parties de la Prophetie, il faut que leur Interprete sçache le Liure de Dieu

Tout-puissant; qu'il se souuienne des paroles de son Apostre, dont la memoire soit en perpetuelle benediction; qu'il ait connoissance des Prouerbes Arabes & de l'origine des mots; des differences des hommes, de leurs mœurs, & de leurs estats; qu'il possede les Principes de l'interpretation; & qu'il ait l'ame pure, les mœurs chastes, &

la parole vraye; afin que Dieu luy aide à bien rencontrer, & le mette dans le droit chemin. Car l'explication du Songe se prend quelquefois de ses Principes selon la diuersité des estats des hommes, & celle des temps & des occasions. Quelquefois elle se prend du Liure de Dieu Tout-puissant; quelquefois d'un Prouerbe qui court; quelquefois l'on passe de celuy qui songe, à celuy qui luy ressemble ou qui porte mesme nom. Quelquefois l'on explique selon le mot, quelquefois selon son sens, quelquefois selon son semblable, quelquefois selon son etymologie, quelquefois selon l'addition ou la diminution.

L'explication se prend de l'Alcoran, par exemple, quand l'œuf s'entend des femmes, parce que Dieu en parle ainsi; *elles sont comme un œuf caché dans un nid*; quand par la pierre l'on entend la dureté, parce que le mesme Tout-puissant en parle ainsi; *ils sont comme la pierre, & encore plus durs*; quand par

la chair cruë l'on entend la medifance, fuiuant les paroles du mefme Tres-haut, *quelqu'un de vous fera-t'il bien aife de manger la chair de fon frere mort?* Quand vne clef s'explique du threfor, fuiuant ce que dit le mefme Tout-puiffant de la fortune de Caron; *& nous luy auons donné tant de threfors, que des hommes robustes eftoient chargez de fes clefs;* il entend de fon argent, parce que les cofres à l'argent ne s'ouurent pas fans clefs; quand par le Nauire l'on entend la deliurance, parce que le mefme Tout-puiffant dit encore, *& nous l'auons fauue luy & fes compagnons dans le Nauire chargé;* quand le Roy fonge, qu'il entre dans quelque bourg ou ville ou autre lieu, où il n'a pas accouftumé d'entrer, & que l'on entend par là qu'il doit arriuer quelque malheur ou affliction aux habitans de ce lieu-là, parce que le mefme Tres-haut dit, *que les Rois ruinent vne ville lors qu'ils y entrent;* quand par la couuerture l'on

entend les femmes, parce que le mesme Tout-puissant dit, *elles vous seruent de couuerture & vous leur en serués*; & ainsi de plusieurs autres exemples.

Quant à l'interpretation qui se prend des paroles de l'Apostre, à qui Dieu fasse paix & misericorde, par exemple l'on entend par le corbeau, l'homme impie, parce que l'Apostre l'a appelé impie; par la fouris, l'on entend la femme adultere, parce que l'Apostre l'a appelée petite adultere; par la coste l'on entend la femme, parce que l'Apostre dit, que la femme a esté faite d'une coste tortuë; par le sueil de la porte, l'on entend aussi la femme, parce que le mesme Apostre, à qui Dieu fasse paix & misericorde, raconte d'Abraham, à qui Dieu fasse paix, qu'il parle ainsi à son fils Ismaël, *change le sueil de ta porte*, c'est à dire, ta femme; & ainsi des autres.

L'explication fondée sur les Proverbes communs est telle. Par exé-

des Songes.

¶ ple vn homme songe qu'il a la main longue, l'explication est qu'il fera du bien à quelqu'un, suiuant le mot qui se dit communément, *il a la main plus longue, ou le bras plus estendu que toy*, c'est à dire, il est plus liberal. Vn abateur de bois s'entend d'un calomniateur, à cause de ce qui se dit communément de celuy qui calomnie les autres dans les compagnies, *il abat du bois*. Vn malade s'entend d'un trompeur, parce que l'on dit communément de celuy dont les promesses ne sont pas bonnes, il est malade en ses paroles & en ses promesses. Par vn coup tiré l'on entend vn fils, parce que l'on dit communément d'un fils qui ressemble à son pere, *c'est vn coup bien tiré*. Vn homme songe qu'il tire sur les autres de l'arc ou de la sarabacane, ou qu'il leur iette des pierres, l'on interprete que c'est vn mesdisant, parce que l'on dit communément, *il tire sur luy*, c'est à dire, il médit de luy. Vn homme laue ses mains avec des cédres d'Al-

cali, l'on explique qu'il desespere de quelque affaire, parce que l'on dit communément, *ie me laue les mains de toy avec des cendres d'Alcali*, c'est à dire, ie desespere de ton bien. Vn belier s'explique d'un homme puissant, parce que l'on dit communément, *vn tel est le belier du pays*; & ainsi des autres.

L'explication qui se prend de l'apparence du mot, est telle. Vn homme s'appelle le phadal, c'est à dire l'excellent; on l'explique de quelques avantages; vn autre s'appelle rasid, c'est à dire, droiturier, on l'explique de la droiture des mœurs; vn autre s'appelle Saleme, c'est à dire, pacifique, on l'explique de la paix, & ainsi des autres.

L'interpretation fondée sur le sens du mot se fait ainsi. Par exemple, le narcisse & la rose, quand on les détourne de ce à quoy ils ont rapport, s'expliquent de peu de durée; le myrthe s'explique au contraire, à cause de sa longue durée sans change; & ainsi de plusieurs autres.

L'explication par le contraire se fait en cette sorte. Par exemple les pleurs s'expliquēt de la ioye, quand ils ne sont point accompagnez de gemissemens, ny de cris, ny de deschiremens d'habits ; la ioye & la danse & le ris s'expliquent de la douleur & du desplaisir. De deux hommes qui se battent & luttent ensemble, le vaincu est le vainqueur. Vn homme songe qu'on luy applique des ventouses, l'explication, est qu'on le fera obliger par escrit, & au contraire s'il songe qu'on le fait obliger par écrit, l'explication est qu'on luy appliquera des ventouses. Vn homme songe qu'il entre dans vn tombeau, l'interpretation est qu'il sera mis en prison ; ou bien il songe qu'ō l'emprisonne dans vn lieu dont il ne cōnoist ny le pays ny les habitans, sans qu'il en refforte, c'est à dire, qu'on l'enterrera. La guerre s'explique de la peste, & la peste de la guerre. Vn torrent s'explique de l'irruption d'vn ennemy dans le

pays, & l'irruption de l'ennemy s'explique d'un torrent. Les fauterelles s'expliquent d'une armée, & une armée s'entend des fauterelles; & ainsi des autres.

L'explication se fait selon l'addition ou la diminution en cette sorte. Par exemple les pleurs signifient la ioye; mais quand ils sont accompagnés de gemissemens, de cris, & de deschiremens d'habits; ils marquent quelque malheur. La noix s'explique de l'argent caché, quand elle ne fait point de bruit; mais quand l'on en entend du bruit, elle signifie noise. Les cheveux s'expliquent parure & richesse; mais quand ils tombent sur le visage, ou qu'ils le courent, c'est desplaisir. Un coup signifie un habit; mais s'il est donné dans le dos, c'est mesdisance, dont l'on est atteint & dont l'on ne peut se defendre. Un homme qui songe qu'il a des plumes & des ailes, c'est à dire, qu'il aura du bien & des commodités; mais s'il vole avec ses ailes, cela signifie un

voyage. Vn homme qui songe qu'il a la main coupée, s'il la porte & qu'elle luy demeure, c'est vn frere ou vn fils qui luy fera du profit; mais si elle est éloignée de luy, c'est vn malheur pour luy en la personne de son frere ou de son fils. Vn malade songe qu'il sort de chez luy; si c'est sans rien dire, il doit mourir; si c'est en parlant, il guerira. Les souris signifient des femmes impudiques, quand elles ne sont que d'une couleur; mais quand elles sont de diuerses couleurs, blanches & noires, ce sont les iours & les nuits: les poissons, quand on en sçait le compte, sont des femmes; quand ils sont en grand nombre & que l'on en sçait pas le compte, c'est richesse & butin.

Les diuers estats & postures des hommes font aussi de la diuersité dans les explications des songes. Par exemple vn homme songe qu'il a les mains liées, ou le col, si d'ailleurs il est deuot & homme de bien, cela monstre la probité de ses

mœurs & l'auersion qu'il a pour le mal & pour le vice ; mais si au contraire c'est vn meschant homme, cela marque la multitude de ses crimes & sa damnation.

Quant à la diuersité des temps, par exemple vn homme songe qu'il est monté sur vn elephant, si c'est de nuit, il luy arriuera quelque chose de grande apparence, mais de peu de profit ; si c'est de iour, il repudira sa femme. Il est bon de remarquer icy que le temps où les songes se trouuent le plus veritables, c'est la fin de la nuit, & l'heure que l'on a coustume de dormir à midy, pour ce qui est du iour. Quant aux saisons, la plus veritable pour les songes, c'est quand les fruits sont meurs ; la plus foible, c'est l'hyuer & la venuë des pluyes. Il faut aussi remarquer que les bons songes durent long-temps, & que les mauuais passent viste, ce qui vient de la bonté de Dieu Tout-puissant. L'on dit que Gegafar le veritable disoit que l'explication

des songes se trouuoit vraye en quatre heures & quatre mois & quatre ans.

L'Interprete doit premierement bien entendre ce que dit celuy, qui luy fait raport du Songe; puis l'examiner selõ les Principes. Car alors si le discours est sain, & que ses parties ayent du rapport les vnes aux autres, & des sens reguliers, le songe est vray & iuste; s'il souffre deux diuerses explications, il faut voir laquelle des deux reuient le mieux à ses mots & approche le plus des Principes, & la luy donner; si tout le songe est confus & ne s'ajuste point sur les principes, il est de ceux que l'on appelle inexplicables. Si l'explication est douteuse & ambiguë, il faut demander au Songeur à quoy il a pensé, par exemple, en faisant la priere, si le songe est de la priere; ou bien en cheminant, si le songe est de voyage; ou bien en faisant l'acte venerien, si le songe est de coït; & l'expliquer selon cette pensée. S'il arriue que le

songe signifie quelque chose de vil-
lain & d'infame, il faut cacher cela,
& donner au songe vn meilleur
sens, quoy que moins veritable.

Il faut remarquer que le Prin-
cipe du Songe a son genre, son
espece, & sa nature, & qu'il se
doit interpreter suiuant cela. Par
exemple, pour ce qui est du genre,
les arbres, les bestes de proye, les
oyseaux, tout cela marque ordinai-
rement des hommes, mais il faut en
suite prendre garde à l'espece. Si
donc quelqu'un a songé d'un arbre,
& que cét arbre soit vn palmier,
l'homme qu'il marque, est vn Ara-
be, parce que les palmiers croissent
au pays des Arabes; si c'est vn
noyer, il marque vn homme de la
Gageme. Il faut de plus considerer
la nature de la chose. Par exemple,
si c'est vn arbre, & vn palmier, l'on
peut iuger que c'est vn homme vti-
le & qui a plusieurs belles & bon-
nes qualités; si c'est vn noyer, l'on
iugera que c'est vn trompeur dans
son commerce, & vn querelleur,

parce que les noix font du bruit quand on les remuë, & que l'on ne peut auoir ce qui est dedans, sans les casser. Si c'est vn oyseau, il marque vn homme de grands voyages, à cause de son vol; & si c'est vn paon, il marque quelqu'un des Roys de la Gageme, superbement paré, riche, & de grande suite. Et de mesme si c'est vn vautour ou vn aigle. Mais si c'est vn corbeau, il signifie vn homme impie & sans Religion. Et de mesme si c'est vne pie. C'est ainsi qu'il faut raisonner.



CHAPITRE II.

*Des Songes où l'on void Dieu
Tout-puissant.*


SI quelqu'un songe qu'il voit Dieu Tout-puissant, qui luy fait bon accueil & bon visage, & vient au deuant de luy, il le rencontrera de mesme sorte au iour de

la Resurrection. Car cela tesmoigne que les œuures, qu'il fait en ce monde, luy sont agreables. S'il le voit, & qu'il le puisse regarder en face, il sera celebre pour sa pieté & entrera en Paradis. S'il le voit qui luy donne quelque chose des biens de ce monde, il luy arriuera quelque maladie en son corps, quelque affliction, & quelque tentation, mais il aura enfin le Paradis pour recompense de l'auoir bien soufferte. S'il le voit descendre en quelque lieu certain & determiné, la iustice regnera parmy les habitans de ce lieu-là, & l'abondance & la prosperité & la ioye & le bonheur. S'il le voit, & qu'il luy parle sur ce qui luy est defendu sous quelque peine, c'est vn homme desobeissant & qui doit se déporter du dessein qu'il a. S'il le voit conuersant avec luy, ou couché sur son lit, ou luy donnant sa benediction, qu'il se rejoüisse de la bonté que le Tout-puissant a pour luy; car il n'y a que les hommes iustes qui voyent de

tels songes. S'il le voit représenté en quelque lieu, soit en relief ou en peinture, c'est vn homme menteur & grand controuueur de faussetés contre Dieu Tout-puissant ; qu'il se haste donc de faire penitence. Et de mesme quand on le voit avec quelque imperfection, ou bien en forme de statuë ou d'idole, ou en quelque autre estat non conuenable à sa diuine Majesté ; tout cela n'est rien de bon pour celuy qui le songe.

L'on raconte qu'il vint vn iour vn homme vers Gegafar le veritable, qui luy parla ainsi. I'ay songé que Dieu mon Seigneur me donnoit vn fer, & me faisoit boire vn verre du plus fort vinaigre qui se trouue. Ton songe est bon, luy respondit Gegafar. Le fer signifie la force & peut-estre apprendras-tu à quelqu'un de tes fils le mestier de Daud, à qui Dieu fasse paix. Quant au verre de vinaigre, que tu as beu, cela veut dire, que tu auras vne maladie, pendant laquelle tu ne man-

queras d'aucune commodité permise, mais tu en feras long-temps au lit, & si Dieu t'appelle, il te fera misericorde.



CHAPITRE III.

Des songes où l'on voit les Anges, les Prophetes, les gens de bien, les Docteurs, le Temple quarré, l'appel à la Priere, la Priere, & les ceremonies du Pelerinage.

QVand quelqu'un voit un Ange en songe, c'est de l'avantage pour luy dans le monde, & du bonheur & de la ioye pour ceux du pays où il est. Si l'on voit les Anges regarder en bas, cela signifie de bonnes nouvelles, abondance, martyre, quantité de pluyes, grandes commodités, & bon marché de viures. Si l'on voit les Anges dans

les Mosquées exhorter les hommes à prier, à donner l'aumosne, & à demander pardon à Dieu, c'est vne marque que ceux du pays manquent de deuotion. Si on les voit au marché, c'est qu'ils defendent aux Marchands de vendre à faux poids & fausse mesure. Si on les voit dans les cimetières, c'est signe de grande peste, qui attaquera particulièrement les Prestres & les Docteurs, & les deuots. Si quelqu'un voit en songe vn Eunuque à luy inconnu, on l'interprete comme si c'estoit vn Ange.

Quand quelqu'un voit en songe le Prophete, à qui Dieu fasse paix & misericorde, c'est quelque bonne nouvelle pour luy en faueur de ses bonnes actions passées, pourueu qu'en mesme temps il ne voye rien qui luy desplaise; car s'il voit quelque chose de tel, il luy arriuera quelque desplaisir dans ses affaires temporelles. Si on le voit en vn pays où il y ait cherté, l'abondance y viendra. Si celuy qui le voit, est

en affliction & douleur & desplaisir, il en fera bien-toft deliuré. Si on le voit chez vn infidelle, il luy arriuera malheur & ruine entiere. Si quelqu'un le voit affoibli ou malade ou mort, ou en mauuais estat, ce n'est rien de bon pour celuy qui le voit ainsi; car cela tesmoigne diminution de foy. Si au cõtraire on le voit reuestu de beaux habits, cela tesmoigne le bon estat de la foy & de la conscience. Si on le voit marcher, c'est à dire qu'il appelle les ignorans de la Nation, & ceux qui manquent de foy, pour les instruire. Si on le voit faisant la Priere, c'est à dire que l'on fera le voyage de la Mecque. Si on le voit haranguer, il exhorte les siens à bien faire. Si on le voit regardant dans vn miroir, c'est qu'il excite les siens à tenir leurs promesses. Si on le voit manger, c'est qu'il exhorte les siens à payer les dixmes. Si quelqu'un le voit qui le reuest de quelque partie de ses habits, ou qui luy presente son sceau ou son

espée, ou chose semblable; S'il est de condition à regner, il regnera; S'il est pour estre Prestre ou Clerc, il aura quelque belle charge de cette nature.

Les autres Prophetes veus en songe, signifient, comme les Anges, abondance de biens, quantité de pluyes, bon marché de viures, bonnes nouvelles, ioye, victoire, benediction, & le reste de mesme, horsmis que l'on n'explique iamais leur veü du martyre, comme l'on fait celle des Anges. Celuy qui s'õge qu'il est à la suite de quelque Prophete, aura de grandes aduersités, comme le Prophete en a eu; mais à la fin il aura ioye & victoire, & le Paradis en l'autre monde. Il en est de mesme de la veü des Docteurs & des gens de bien; tout cela signifie bonheur, iustice, & benediction.

Le temple quarré s'explique du Prelat des Mussulmans, & ce que l'on y voit d'augmentation ou de diminution ou d'autre chose, luy

doit arriuer à proportion. Le Temple quarré signifie auffi quelquefois paix & feureté. Quand donc on le voit en quelque Ville autre que la Mecque, c'est paix & feureté pour les habitans de cette ville-là. Si quelqu'un songe qu'il est dedans, & qu'il y fait quelque vne des ceremonies de deuotion, que l'on a coustume d'y faire, cela tesmoigne le bon estat de sa foy & de sa conscience. Si quelqu'un au contraire songe qu'il fait quelque vne de ces ceremonies autrement qu'il n'est porté par la Loy & par la Coustume, cela signifie quelque nouveauté en sa foy. Si quelqu'un voit le Temple quarré chez luy dans l'enclos de sa demeure, il aura infailliblement grand pouuoir & grande autorité, & rendra sa maison le rendez-vous de ceux qui cherchent fortune. Celuy qui songe, qu'il tourne le dos au Temple quarré, ou qu'il fait sa priere au dessus de son sanctuaire, quittera la Loy Mussulmane.

L'on raconte qu'un iour il vint un homme vers Saguide fils de Me-sabbeb, & luy parla ainsi. J'ay Songé que ie faisois ma priere au dessus du Sanctuaire du Tēple quarré. Sois deuot enuers Dieu Tout-puissant & tout bon, luy respondit Saguide, car autrement ie te verray bien-tost quitter la Religion Mus-sulmane. Je me conuertis à Dieu entre vos mains, repliqua l'homme & renonce aux discours des Cada-riens ; il y a desia deux mois que ie suis dans leur opinion.

Celui qui songe qu'il fait sa priere tourné tout droit vers le Temple de la Mecque, est en la conduite de Dieu Tout-puissant & dans l'observation des Loix de son Apostre, dont la memoire soit en perpetuelle benediction, particulierement quand il s'acquie parfaitement des ceremonies de la genuflexion, du prosternement, & de l'inclination. Car la Priere est ce qui joint l'ame à Dieu ; c'est le pilier de la Foy. S'il y a quelque defaut en cela, il y en a

*Le Ma-
cinefait
mentiö
de cēt
Oniro-
cite en
l'an 86.*

autant à proportion dans la foy de celuy qui le songe. Si quelqu'un songe qu'il ne sçait de quel costé est le temple de la Mecque, pour s'y trouver en priant, cela tesmoigne quelque trouble & erreur dans sa foy. S'il songe qu'il adjouste quelque chose à sa priere, il adjouste à quelqu'un des articles de la Foy Mussulmane ou en est en doute. Celuy qui songe qu'il fait sa priere tourné vers l'Orient, a dans le cœur le doute des Cadariens; & celuy qui songe qu'il l'a fait tourné vers l'Occident, a dans l'esprit le discours des Geriens; car les Chrestiens se tournent vers l'Orient en priant Dieu, & les Juifs vers l'Occident. Et de mesme quand quelqu'un songe qu'il se fait Juif ou Chrestien ou Mage; il a des opinions conformes à celles de telles Sectes, & panche de ce costé-là. S'il songe qu'il adore vne Idole, il mentira contre Dieu Tout-puissant & dira faux. Quelquefois c'est qu'il luy est ordinaire de boire du vin &

de desobeir à la Loy. Si l'Idole est d'argent, il tasche d'approcher de quelque fême par des voyes illicites & par de faux discours. Si elle est d'or, il ne se souciera point de ce qui luy pourra arriuer & n'en aura point de peur. Si elle est de bois, il s'accostera de quelque homme corrompu en sa Religion. Si elle est de fer ou de cuiure ou d'estain, il ira où l'occasion le conduira pour gagner du bien. Celuy qui songe qu'il adore le Feu, accommode sa Religion à l'humeur du Prince. Si le feu ne flambe point, il cherche à gagner par des voyes illicites. Celuy qui songe qu'il fait l'office de Prelat parmy les hommes, aura la conduite des affaires de quelque Compagnie, & s'en acquitera avec iustice, pourueu qu'il se tourne du bon costé en faisant la priere; s'il se tourne ailleurs, il s'y comportera injustement & tyranniquement. La lotion & purification faite avec de l'eau froide, signifie penitence & guerison & sortie de prison, &

seureté & acquitement de debtes ;
 avec de l'eau chaude, c'est soucy.

L'appel à la priere signifie le
 voyage de la Mecque pendant les
 mois qui luy sont destinés ; quel-
 quefois il signifie pouuoir & hon-
 neur en fait de Religion, hors les
 temps destinés au Pelerinage. L'ap-
 pel à la Priere dans les Mosquées
 & dans les ruës, en quelque temps
 & en quelque saison que ce soit, si-
 gnifie des nouvelles vrayes & bon-
 nes qui se doiuent bien-tost diuul-
 guer. Si quelqu'un songe que la
 tour de la Mosquée est demolie, les
 habitans du lieu seront en discorde
 pour leur Religion & pour leurs
 affaires. Vn homme qui songe qu'il
 fait l'appel à la Priere, mais sans
 l'acheuer, si c'est vn hōme de bien,
 & que ce songe luy arriue pendant
 les mois du Pelerinage, il partira
 pour aller à la Mecque, mais il
 n'ira pas iusques-là ; si c'est vn mé-
 chant homme, il derobéra quelque
 chose, mais il n'en profitera point,
 car son larcin sera descouuert. Ce-
 luy

luy qui songe qu'il bastit vne Mosquée, sera Autheur ou Mediateur de quelque bonne societé, comme d'un mariage. Celuy qui songe qu'il fait l'Appel à la Priere, mais que personne ne l'entend, c'est vn larron. Celuy qui songe qu'il esterneüë, & qu'on luy dit, *Dieu vous fasse misericorde*, c'est vne bonne nouvelle pour luy du voyage qu'il fera à la Mecque, & de la visitation des saints lieux. Celuy qui songe qu'on luy rase la teste, si c'est dans le temps du Pelerinage, il ira à la Mecque, & Dieu y augmentera sa foy; si c'est en autre temps, on luy fera banqueroute du principal de ses rentes, suiuant ce que nous dirons en son lieu. Celuy qui songe qu'il fait la harangue sur vne Tribune, s'il est de condition à cela, il acquerra grand pouuoir & grand honneur; s'il n'est pas de condition à cela, il sera crucifié.


L'on raconte qu'un iour il vint vn homme consulter le fils de Sirion, sur ce qu'il auoit songé qu'il

faisoit l'Appel à la Priere. Le fils de Sirion luy respondit qu'il feroit le voyage de la Mecque. Il en vint en suite vn autre, qui le consulta sur la mesme chose, & il luy respondit, qu'il auroit la main coupée. Ceux de sa compagnie luy demanderent pourquoy il auoit interpreté si differemment deux Songes de mesme nature. I'ay veu, dit-il, le premier homme marqué au coin des gens de bien, ce qui m'a obligé d'expliquer son Songe du Pelerinage, suiuant ce que dit le Tout-puissant, *appelle les hommes à la Priere dans le Pelerinage*; la mine de l'autre ne m'a point plu, c'est pourquoy i'ay interpreté son Songe, selon ce que dit ailleurs le Tout-puissant; *vn crieur a fait l'appel*.
 ô conuoyeurs de viures, vous estes des larrons.

Voyez
 le Ma-
 cine
 dans
 Abube.
 ere l'an
 13.

Quelquefois l'Appel à la Priere signifie reuelation & diuulgation de quelque chose. La lecture du Masachef, c'est à dire, du Livre contenant tout l'Alcoran assemblé, si-

gnifie science & sagesse, qui doit venir au Lecteur; & de mesme la lecture de l'Alcoran hors le Masachef. Quelquefois aussi la lecture de l'Alcoran signifie quelque discours veritable & sans fiction, qui se diuulguera de celuy qui en a songé.



CHAPITRE IV.

Des Songes du Ciel, du Soleil, de la Lune, des Estoilles, de la Resurrection, du Paradis, & de l'Enfer.

Celuy qui songe qu'il monte au Ciel, & qu'il y entre, obtiendra le martyre, & sera heureux par la bonté de Dieu Tout puissant. Il aura mesme de grands honneurs en ce monde, & laissera vne heureuse memoire de son nom. Sil se voit dans le Ciel sans y estre monté, cela signifie le martyre, mais dans vn long-temps; & grand honneur au

monde dans peu de temps.

Le Soleil marque vn Roy, & quelquefois aussi le pere ou la mere. Celuy qui songe qu'il a le Soleil en son pouuoir ou qu'il le possede, receura des biensfaits du Roy à proportion du bien qu'il tire du Soleil. S'il songe qu'il a querelle contre luy, il l'aura contre le Roy, ou contre son pere, ou contre sa mere; tout cela quand le Soleil est clair & rayonnant. Et de mesme, s'il voit sur luy comme la lumiere & les rayons du Soleil, il luy arriuera quelque grande seigneurie comme vn Royaume. S'il voit dans le Soleil quelque changement, eclipse, ou diminution, il arriuera quelque chose de semblable au Roy du pais, ou bien au pere ou à la mere de celuy qui a le songe, s'il n'y a rien d'ailleurs qui l'approprie au Roy. Celuy qui voit leuer le Soleil dans sa maison & non ailleurs, se mariera, s'il est à marier; sinon, il aura quelque charge & pouuoir de la part du Roy. S'il voit quelque

nuée ou chose semblable couvrir le Soleil, c'est quelque maladie ou inquietude, qui doit arriuer au Roy ou au pere ou à la mere de celuy qui fait le songe. L'on raconte qu'un iour il vint vers Gegafar le veritable vn homme qui luy dist, qu'il auoit veu en Songe le Soleil leué sur ses pieds & non sur le reste de son corps. Gegafar luy respondit, qu'il obtiendrait du Roy grand pouuoir & grand honneur, & qu'avec cela il seroit homme Religieux & craignant Dieu. Vn autre l'ayant consulté sur vn pareil songe, il luy respondit qu'il auroit du bled, des dattes, & d'autres fruits de la terre pour son viure, tant qu'il les fouleroit aux pieds & n'en scauroit que faire, & cela de la part du Roy.

La Lune s'interprete du premier Ministre du Roy, & quelquefois aussi du pere ou de la mere; quelquefois de la femme d'un homme, ou d'un bon fils. Celuy qui songe qu'il possède la Lune ou qu'il la tient, aura la charge de premier Mi-

nistre d'Etat. S'il voit la Lune s'éclipser, ou rougir ou s'obscurcir, c'est quelque changement & dommage pour celuy auquel elle se rapporte. S'il songe que la Lune ou quelque Estoille parle à luy, il recuera de l'honneur du premier Ministre ou de quelque personne considerable. Quelquefois quand il y a dans le songe quelque chose qui marque l'art de deuiner, ce sera vn deuin. S'il songe qu'il a la Lune dans son sein, ou qu'il la porte en sa main, c'est vn enfant pour luy, qui luy fera du profit. S'il songe que la Lune est dans sa maison ou dans son lit, c'est vne femme pour luy, belle comme la Lune. Si c'est vne femme, qui a fait ce songe, elle espousera vn bel homme. Si quelqu'un songe qu'il voit le Croissant paroistre en son lieu ordinaire hors le commencement du mois, cela signifie l'arriuée d'un Roy qui vient, ou la naissance d'un fils, ou la venue d'un absent, ou quelque nouvelle.

Les Estoilles s'interpreteent des

hommes de confideration, & le bon ou mauuais estat auquel on les voit, regarde les Grands du pais où l'on est. Saturne represente le grand Preuost du Roy; Mars le General de ses armées; Iupiter son grand Thresorier & son premier Maistre d'Hostel, ou quelquefois quelque autre grand & sçauant personnage; Venus, sa femme; Mercure, son Secretaire. Celuy qui songe qu'il a les Estoilles en son pouuoir ou quelque vne d'elles, aura en son pouuoir quelque hōme considerable, plus ou moins, selon l'estat de l'Estoille. S'il songe qu'il les garde, il aura les affaires des hōmes en maniemēt. S'il songe qu'il mange les Estoilles ou quelque chose d'elles, il viura aux despens des Grands.

L'on raconte qu'il vint vn iour vne femme consulter le fils de Sirin, & qu'elle le trouua comme il disnoit. I'ay eu vn songe, Seigneur Abubecre, luy dit-elle d'abord. Vous plaist-il que ie l'entende presentement, luy respondit-il, ou si

vous me laisserez acheuer de disner? Acheuez de disner, repliqua-t'elle. Apres dont qu'il eut disné, il dist à la femme qu'elle racontast son songe, ce qu'elle fit ainsi. I'ay songé, dit-elle, que ie voyois la Lune entrer dans les Pleiades, & que quelqu'un m'a crié là-dessus de derriere moy; Va-t'en trouuer le fils de Sirin, & luy raconte ce que tu as veu. Le fils de Sirin ayant entendu cela, commença à pâlir, & se leua mettant les mains sur son ventre. Sa sœur luy demanda ce qu'il auoit. Cette femme, respondit-il, m'annonce que ie mourray dans sept iours. Et en effet il fut enterré le septiesme iour en suite.

Il vint vn iour vn homme consulter Gegafar le veritable, & luy parla ainsi. I'ay songé que i'embrassois la Lune. Estes-vous marié? luy demanda Gegafar; non respondit-il. Vous espouserez-donc, repliqua Gegafar, vne des plus belles femmes de nostre temps. L'homme prist congé de luy, & long temps

apres le reuint voir , & luy parla ainsi. Je suis marié , & ay espousé vne femme de la Medine, aussi belle qu'aucune autre que i'aye veüe ; mais i'ay songé de plus la nuit passée que ie portois la Lune entre mes bras. Vostre femme, luy respondit Gegafar , accouchera d'vn fils excellemment beau, & vous le porterez entre vos bras. Elle en est presentement grosse.

L'on raconte encore que la mere du Sapheguien, à qui Dieu fasse misericorde, comme elle estoit grosse de luy, songea qu'elle voyoit l'Etoile appelée Iupiter sortir de ses parties naturelles, & s'arrester à Mesre en Egypte, puis ensuite se rompre avec grand bruit en petites pieces comme des estincelles, & s'enuoler & dissiper, en sorte qu'il n'y eut ny ville ny village où il ne s'en trouuast quelque morceau, la plus grande piece demeurant pourtant tousiours à Mesre en Egypte. Elle s'éueilla là-dessus toute espouuantee de ce qu'elle auoit veu, &

*Le Ma-
cine
fait
mentio
de luy
en l'an
204. 63
183.*

l'alla raconter à vn vieil Egyptien dans Mefre, lequel luy respondit que si son songe estoit veritable, elle accoucheroit d'un fils, qui seroit Docteur, & si celebre dans le monde pour sa science, qu'il n'y auroit ny ville ny village où l'on n'en parlât, mais qu'il seroit pourtant son séiour à Mefre. Cela arriua comme il l'auoit prédit.

Si quelqu'un songe que le iour du Jugement est venu & que les morts sont ressuscitez, la Justice sera obseruée dans le lieu où il est; que si les habitans de ce lieu là sont meschans & iniustes, ils seront punis de leurs crimes; car le iour du Jugement est le temps de distinctiō & de retribution; si au contraire ils souffrent iniustice & oppression, ils seront secourus. Si quelqu'un songe qu'il est deuant Dieu Tout-puissant, c'est le songe le plus important & le plus veritable qu'il puisse auoir. Et de mesme quand l'on voit quelque chose de ce qui doit paroistre d'espouuantable au iour du Jugement.

Celuy qui songe qu'il entre en Paradis, y entrera en effet ; car c'est vne bonne nouvelle qui luy vient de ses bonnes actions passées. S'il songe qu'il mange des fruits du Paradis ou qu'il en donne à vn autre, ces fruits signifient de bons discours & auantageux à ceux qui en sont le subiet, à proportion. S'il les touche sans en manger ou sans en pouuoir manger, il luy arriuera du bien en sa Religion, mais il n'en profitera point. Quelquefois aussi cela signifie vne science inutile. S'il songe qu'il boit de l'eau des fontaines du Paradis, ou qu'il se reuest des beaux habits qui s'y trouuent, c'est vne bonne esperance qui luy est donnée, & dont il obtiendra l'effet en ce monde icy & en l'autre. Les prairies du Paradis & ses iardins & ses vallons, tout cela signifie les plaisirs de ce monde, dont il iouïra à proportion de ce qu'il voit.

Celuy qui songe qu'il est en enfer, a de grands pechez sur sa conscience. Ce songe signifie le contrai-

re de ceux du Paradis, & doit seruir d'aduertissement à celuy qui l'a, pour le porter promptement à faire Penitence. Que s'il n'y endure point de mal, quoy qu'il soit dedans, cela signifie les desplaisirs de ce monde, qui le tourmenteront à proportion de ce qu'il voit.

Le Feu de ce monde s'interprete diuersement. Si quelqu'un songe qu'il voit tomber du feu dans vn pais affligé de cherté, sur vne Ville ou sur vn village, ou sur vne maison, & que ce feu flambe & consume tout ce qu'il rencontre avec vn bruit espouuantable, c'est vne guerre qui doit arriuer en cc lieu-là, à proportion de la quantité du feu; que si le pais, où cela se voit, n'est pas affligé de cherté, c'est vne peste, ou vn mal de poitrine, ou vne petite verole, ou quelque autre mortalité, qui arriuera en ces quartiers-là. Si le feu ne flambe point, ny ne fait point de bruit & qu'il consume vne partie de ce qu'il rencontre & laisse l'autre, ce sont


diuerſes maladies & diuers malheurs qui arriueront en ce pais-là. Si l'on voit le feu descendre du Ciel, il en est d'autant plus dangereux. Si l'on ne voit pas qu'il consume rien, c'est quelque grande querelle, que les habitans du lieu auront entre eux, mais de parole seulement, & sans s'entre-faire aucun dommage. Si le feu fume, l'accident en est d'autant plus terrible & plus affreux. Si l'on voit le feu monter de ce lieu-là iusques au Ciel, les habitans feront la guerre à Dieu Tout puissant & tout bon, par leurs desobeyſſances, & controuueront cõtre luy quelque grand mensonge: Celuy qui songe qu'il allume du feu pour se chauffer ou pour faire chauffer vn autre, entreperndra quelque affaire à son profit & au soulagement de sa pauureté. Car le froid signifie la pauureté; & le chaud, le soucy. S'il y fait rostir de la chair, il attaquera les hommes de loïn & médira d'eux en leur absence. S'il mange de ce rosty, il au-

ra peu de gain & beaucoup de soucy ; car le rosty signifie desplaisir & incommodité. S'il fait boüillir vne marmite sur le feu, avec de la viande dedans, il viendra à bout d'vne affaire qui luy fera tirer du profit du Maistre de quelque maison. Car la marmite represente le Maistre de la maison. S'il n'y a point de viande dedans, il irritera le Maistre de la maison par ses discours, & le portera à quelque mauuaise chose. S'il songe que le feu brusle quelque partie de ses habits ou de son corps, il luy arriuera quelque accident en ce qui a rapport à cét habit ou à cette partie du corps, suiuant ce que nous en dirons cy apres. Si le feu, qui luy fait ce mal, flambe, le malheur qu'il luy signifie, viendra du Roy ou de la guerre ; s'il ne flambe point, ce sont des maladies ou des maux de poitrine. S'il songe qu'il prend du feu chez vn voisin, il obtiendra des biens du Roy par de mauuaises voyes. S'il songe qu'il mange du feu, sans qu'il flambe, il

mangera les biens de l'orphelin ; s'il flambe, il fera parler le monde, & aura de la peine pour ces biens-là. S'il songe qu'il se brusle au feu, il apprestera à parler aux langues, & sera le subiet de la médifance du monde. La bruflure signifie la médifance à proportion de fa quantité. Les estincelles signifient la mefme chose. Si quelqu'un se voit couuert d'estincelles, l'on dira du mal de luy ; si les estincelles font en grande quantité, il luy arriuera du desplaisir. S'il songe qu'il tient en fa main vne flamme de feu, il recevra du Roy quelque Charge fort difficile. Si quelqu'un songe que le feu tombe dans vne foire ou dans vne boutique, cela signifie grand débit de Marchandise, mais à vn prix deffendu. Si quelqu'un voit brusler & esclairer bien fort vne lampe dans vne maison, cela tesmoigne que les affaires du Maistre de la maison font en bon estat ; si la lumiere en est foible, l'estat du Maistre est de mefme ; si elle s'é-

teint , & qu'il n'y ait rien dans le songe qui signifie la mort, il arriuera au Maistre de la maison du changement en l'estat de ses affaires & du malheur. Si quelqu'un songe qu'il allume du feu pour éclairer à quelques personnes & les conduire, cela signifie de la science & de la sagesse, dont ces personnes là profiteront, si ce sont gens à cela. S'il songe qu'il tasche d'allumer du feu, mais qu'il n'en peut venir à bout, c'est de la science, mais dont personne ne fera profit. S'il songe qu'il amasse des cendres & les emporte, il acquerra des connoissances vaines & inutiles dans les sciences.





CHAPITRE V.

*Des Songes de pluyes, d'eaux,
de puits, de mers, de ruis-
seaux, de riuieres, de nauis-
res, de moulins, de bains, &
de vens.*

LA Pluye signifie l'aide de Dieu & sa misericorde ; mais quand elle est particuliere à quelque maison ou demeure sans s'estendre ailleurs, ce sont des douleurs & des maladies, ou quelques autres malheurs, qui doiuent arriuer à ce lieu-là en particulier ; ce sont des fleaux qui en frapperont les habitans. Si quelqu'un songe qu'il voit pleuvoir du miel ou du beurre ou du lait ou de l'huile, ou chose semblable, c'est du profit & du bien & de quoy viure, qui viendra du Ciel aux habitans du pais ; & ainsi de toutes les autres pluyes agreables

en leur genre.

L'on raconte qu'il vint vn iour vn homme voir Abubecre le veritable, à qui Dieu fasse paix, & luy parla ainsi. I'ay songé que ie voyois vne nuée, d'où il tōboit vne pluye de beurre & de miel, & que chacun en prenoit sa part, les vns plus, les autres moins. Abubecre, à qui Dieu fasse paix, luy respondit ainsi. La nuée, c'est la Religion Mussulmane; le beurre & le miel, c'est l'Alcoran.

Toute pluye agreable en son espece, est bonne; celle dont l'espece est desplaisante, ne vaut rien.

Quelqu'un consulta Gegafar le veritable sur ce qu'il auoit songé, qu'il s'estoit plongé dans l'eau de pluye tout vn iour & toute vne nuit. Ton songe est bon, respondit Gegafar. Cela veut dire que tu te plongeras dans la grace de Dieu, dans la prosperité, & dans les commoditez.

Vne autrefois on luy parla d'un homme, qui auoit veu en dormant

tomber la pluye sur sa teste seulement. Cét homme, dit il, est vn pecheur, dont les crimes sont en grand nombre assemblez tout autour de luy. N'avez-vous pas oüy ce que dit le Tout-puissant. *Nous auons fait tomber la pluye sur eux : la pluye des pescheurs est mauuaise.*

La Nuée represente la sagesse & la science & la grace. C'est aussi la Religion Mussulmane, quand il n'y a rien en elle qui represente l'enfer, comme la noirceur, les tenebres, les vens, & le bruit espouuantable. Celuy donc qui songe qu'il la tient ou qu'il l'amasse, ou qu'il est dedans ou dessus, obtiendra quelque chose de considerable du genre de ce que nous venons de dire.

L'on raconte que Gegafar le veritable estant consulté sur ce qu'un homme auoit songé qu'il mangeoit des nuées, & qu'il en auoit grande quantité deuant luy, respondit en ces termes. Voicy vn heureux songe. Cét homme doit estre releué en science, & de grande reputation

& gloire, plus qu'aucun autre, honoré, respecté, & obey.

Estant consulté sur vn autre qui auoit songé que les nuées luy seruoient d'habits ; cét homme, dit il, est enuelopé de la grace de Dieu Tout-puissant, couuert de sa misericorde, libre des inquietudes de ce monde, reuestu des pensées de l'autre pour en auoir connoissance, abismé dans la deuotion.

Il fut consulté sur vn autre qui auoit songé qu'une nuée luy faisoit ombre, & il respondit ainsi. Si cét homme est malade, il guerira ; s'il est endebté, il s'acquitera ; s'il est pauvre, Dieu l'enrichira ; s'il est opprimé par vn plus puissant, Dieu luy donnera secours. Car la nuée signifie la misericorde de Dieu Tout-puissant, & ce qu'il y a en elle, est misericorde. C'estoit elle qui faisoit ombre à l'Apostre de Dieu dans les accidens qui luy arriuoient, à la guerre, & ailleurs.

Le froid & la neige & la glace signifient soucy & douleur, si ce n'est

que la neige soit en petite quantité, dans sa saison, & en lieu où il a coutume d'en tomber; car si cela est, c'est abondance de biens pour les habitans de ce lieu-là. La glace en est de mesme, si ce n'est que quelqu'un songe qu'il a puisé de l'eau dans un vaisseau & qu'elle s'y est glacée en suite; car alors c'est de l'or & de l'argent qui s'amassera chez luy & y demeurera. Quant au froid, ce n'est iamais rien de bon de quelque maniere qu'il paroisse.

Le Puis signifie le fonds du reuenu de l'homme & son moyen de viure. Si quelqu'un songe qu'il fait faire un puis chez luy, c'est un fonds de reuenu que Dieu Tout-puissant & tout bon luy appreste. S'il songe qu'il en veut faire faire un, mais qu'il n'en peut venir à bout, il travaillera beaucoup pour auoir de quoy viure, & amassera peu de chose. Si quelqu'un songe que l'eau paroist dans le puits de chez luy, & qu'elle s'éleue fort haut, c'est à dire qu'il aura beaucoup de

bien, & que Dieu luy fournira de quoy viure à son aise sans traual-
ler. S'il songe que l'eau s'enfuit de
chez luy, ou le puis luy-mesme, le
fonds de son reuenu s'enfuira, sans
qu'il en demeure que la moindre
partie. Celuy qui songe qu'il tire
de l'eau d'un puis, & qu'il en arro-
se un champ, fera de la despense
pour l'honneur de Dieu Tout-puis-
sant. S'il songe qu'il respand l'eau
apres l'auoir tirée, il fera de la des-
pense pour vne chose qui ne luy ap-
portera ny bien ny mal. S'il songe
qu'apres l'auoir tirée, il la donne
aux autres ou la leur fait boire,
quelque grand Docteur viura sous
sa protection. S'il songe qu'il puise
& arrose, il aidera aux hommes à
faire le Pelerinage. S'il songe qu'il
puise & qu'il arrose les petits ar-
bres, il assistera de son bien les or-
phelins & les foibles. S'il songe
qu'il puise, & qu'il sort du puis
des excremens ou quelque autre or-
dure, le plus beau de son reuenu le
trouuera mal employé. S'il songe

que la corde de son puis est rompuë, il cessera de faire plaisir à ses voisins. Quelquefois aussi vn puis signifie quelque fourbe & tromperie, & du soucy & du desplaisir, quand l'on songe que l'on tombe dedans ou que l'on y entre; mais à la fin cela se termine en ioye & bonheur & victoire, suiuant l'auanture de Ioseph le veritable, à qui Dieu fasse paix.

Vne Riuiere represente vn homme, grand ou petit, à proportion de ce qu'elle est. Celuy donc qui songe qu'il aborde vne riuiere, ira voir vn homme de la sorte que nous venons de dire. S'il songe que la riuiere l'a estonné & espouuanté d'abord, l'homme luy fera peur & le mettra en soucy à proportion. Et de mesme quand la riuiere luy paroist trouble. S'il boit de l'eau de la riuiere & qu'elle soit claire, cét homme luy fera du bien & luy aidera à bien viure, à proportion de ce qu'il aura beu; si l'eau est trouble & bourbeuse, cét homme luy

causera quelque maladie ou quelque soucy, à mesme proportion. S'il songe qu'il puise de l'eau à la riuiere, quelque vn luy fera du bien, grand ou petit selon la riuiere. S'il songe qu'il se laue dans vne riuiere ou dans vne mer, sans rien voir en mesme temps qui l'espouuante ny qui luy trouble l'esprit, ou bien s'il songe que c'est dans quelque autre eau qu'il se laue, la lotion signifie déliurance de peine & de soucy, & ioye & guerison. S'il est en inquietude, il aura bien-tost l'esprit en repos; s'il est malade, Dieu Tout-puissant luy renuoyera sa santé; s'il est endebté, Dieu luy dōnera moyen de s'acquiter; s'il est en crainte, il se trouuera en assurance de ce qu'il craint; s'il est en prison, il sera elargy. Dieu Tout-puissant parle ainsi. *Frappe la terre de ton pied, r'est bain froid & boisson.* S'il songe qu'il detourne ailleurs le cours d'une riuiere, il éloignera de luy quelque soucy ou desplaisir ou crainte, si la riuiere luy paroist dange-

dangereuse & agitée de grandes vagues ; sinon, il éloignera de luy son compagnon & son voisin, & l'enuoyera vers vn autre, ou bien il demeurera apres luy.

La Mer signifie vn grand domaine, quand elle n'est point trouble, ny agitée de flots espouuantables, ny pleine de bouë, ny tenebreuse ; elle s'explique aussi quelquefois des vanitez de ce monde ; mais quand elle est agitée de flots ou trouble, elle marque vn lieu dangereux. S'il songe qu'il boit de l'eau de la mer, & qu'elle ne soit ny trouble ny agitée, il aura des possessions selon la quantité de ce qu'il en boit, ou bien il viura à son aise de ce qu'il possède en ce monde ; si la mer est trouble ou agitée & tenebreuse, il aura de la peur & du malheur à proportion. Celuy qui songe qu'il marche à pied sur la mer, sera eleué en ce monde au dessus des Rois & des Princes par sa science & par sa sainte vie. Celuy qui songe qu'il est submergé dans la mer, si la mer est

claire, il se plongera dans les affaires du monde, ou dans les richesses des Rois ; si elle est trouble, il luy arriuera quelque malheur & grand danger.

Le Nauire pour l'ordinaire signifie déliurance. Quelquefois c'est vn moyen d'approcher du Roy ; quelquefois c'est inquietude & desplaisir, mais dont l'on doit estre bien-tost deliuré. Celuy qui songe qu'il est dans vn nauire sur mer, sera mené deuant vn Roy ou vn Prince, proportionné à la grandeur ou politesse du nauire, à sa force & à sa capacité ; mais il sera enfin deliuré de ses mains. S'il songe qu'il meurt dans vn nauire, c'est foucy & desplaisir, ou maladie ou prison, mais dont il se trouuera enfin deliuré. S'il songe qu'il sort du nauire, sa déliurance en sera plus prompte. S'il songe qu'il voit le nauire à sec sur la terre, c'est de l'inquietude & du foucy, dont il sera fort tourmenté, mais deliuré en suite. S'il songe que le nauire monte contre le cours

de l'eau, la déliurance de ce soucy sera plus éloignée; s'il descend selon le cours de l'eau, elle sera plus proche & plus prompte.

Les Ruisseaux petits & foibles, où vn homme ne se peut plonger, ne signifient pas mesme chose, que les grandes riuieres, mais vne vie douce & agreable, soit en commun ou en particulier. Et de mesme quand quelqu'vn songe qu'il voit courir de l'eau dans les petites fosses des courts & des maisons, c'est vne vie douce & agreable, quand l'eau est claire & douce & non salée, & qu'elle prend sa source de fontaines, & cela à proportion de sa clarté & de sa douceur. S'il la voit sortir de quelque fontaine qui luy paroisse dans sa maison ou dans son mur, ou en quelque autre lieu où il ne s'en puisse pas trouuer, ce sont des soucis & des craintes, & des douleurs & des pleurs, à proportiõ de la force & de la quantité des fontaines; car plus il sort d'eau de la fontaine, plus le malheur est grand,

iufques à l'efpouuãte & aux pleurs, pour les habitans de ce lieu-là. Si l'eau eft trouble, le mal en eft plus grand & plus violent. S'il fonge qu'il boit de l'eau de la fontaine, il luy arriuera du foucy & du desplair, à proportion de ce qu'il en boit. S'il fonge qu'il fe purifie avec de l'eau de la fontaine ou qu'il s'y baigne, c'est vne bonne nouvelle en toute maniere, & vne bonne affaire pour luy. S'il eft en foucy il en fera deliuré; s'il eft en crainte, il fe trouuera en affeurance; s'il eft endebté, il s'acquitera; s'il a des pechez fur fa conſcience, Dieu les luy pardonnera; & s'il eft malade, Dieu le guerira, comme il guerit autrefois fon Prophete Iob, qui reſoſe en paix. Si quelqu'un fonge qu'il a vn vaiſſeau avec de l'eau dedans, & qu'il eft fur les chemins ou en vn lieu inconnu, cette eau repreſente fon aage & ſa vie; ſi donc il boit tant qu'il vuide le vaiſſeau, tout ſon aage eft paſſé; ſ'il en demeure quelque choſe, il luy reſte encore

autant de temps à viure à proportion. Le potage signifie la mesme chose que l'eau dans vn pot, suiuant ce que ie viens de dire. Si quelqu'un songe qu'il boit de l'eau claire & douce, sans sçauoir en quelle quantité, & sans s'imaginer estre sur les chemins, mais bien en vn lieu inconnu, il menera vne vie douce & agreable, & exempte de trouble. Si l'eau n'est pas douce, sa vie ne sera pas sans trouble ny sans ennuy. Si l'eau est trouble, il luy arriuera quelque maladie, à proportion de l'impureté de l'eau. S'il songe qu'on luy donne de l'eau dans vn verre, le verre signifie vne femme, & l'eau vn enfant. S'il songe qu'il arrose vn iardin ou vn champ, il embrassera sa femme tres-parfaitement. Si le iardin produit du fruit, sa femme luy produira vn enfant. S'il songe que quelqu'un arrose son iardin ou son champ, ce n'est rien de bon pour eux. Si quelqu'un songe qu'il se purifie ou qu'il se laue avec vne liqueur, dont il n'est pas

permis d'vser pour la purification, par exemple, avec du lait ou du vin ou de l'huile, ou quelque autre semblable, l'affaire qu'il a entre les mains, soit temporelle ou spirituelle, ne luy reussira pas. Et de mesme quand quelqu'un songe qu'il se purifie avec de l'eau, mais qu'il n'acheue pas sa purification, l'affaire, qu'il a commencée, ne s'acheuera pas, quelque facile & aisée qu'elle soit. Il en va de mesme quand on songe que l'on fait la Priere, & que l'on ne l'acheue pas. Mais quand l'on acheue sa Priere & sa purification avec de l'eau, cela tesmoigne que l'on est net de crime & d'iniquité.


La bouë & la fange signifie soucy & desplairir & crainte, à proportion de ce que l'on s'en trouue gasté. Et l'eau chaude de mesme. Si quelqu'un songe qu'il est atteint d'eau chaude, il luy arriuera quelque soucy & quelque crainte de la part du Roy; & plus elle est chaude, plus grand est ce soucy. Quel-

quefois mesme il sera surpris d'espouuante ou de maladie. La brique dure, qui a perdu sa nature de bouë, signifie de l'argent amassé, & celuy qui songe qu'il en trouue, trouuera de l'argent amassé. Si quelqu'un songe qu'il voit vne brique arrachée d'une muraille bastie de brique, quelque homme ou quelque femme l'attaquera-là, ou bien il luy arriuera quelque grand mal.

Le Bain signifie du soucy & de l'inquietude à proportion de la grandeur de sa chaleur, & pour l'ordinaire cela viendra des femmes, & ne durera gueres, parce que l'on ne demeure pas long-temps dans le bain. Si quelqu'un songe qu'il se frote de quelque onguent depilatoire dans le bain, & que le poil luy en tombe, le songe est bon, s'il est en desplaisir ou en crainte ou en soucy, ou accablé de debtes ou malade; car il sera déliuré de tout cela; s'il n'est pas en tel estat, ny engagé en aucun de ces maux, ses affaires changeront ou son bien se diminuë.

ra. Quand le depilatoire se rencontre dans le songe, il faut laisser-là le bain & interpreter le depilatoire; car il a le plus de force. Et de mesme ailleurs, quand il se rencontre dans le songe deux choses de contraire signification, il faut interpreter la plus forte, & laisser la plus foible. Le Bain signifie le soucy, & le depilatoire signifie la déliurance du soucy; mais l'interpretation du depilatoire preuault à celle du bain.

La Meule de moulin signifie vn voyage, quand elle tourne; elle signifie aussi la vie de l'homme, & son travail temporel, & ce qui luy fournit dequoy viure comme il faut. Celuy qui songe qu'il a vn moulin qui luy apreste de la farine, aura du bonheur, & dequoy viure du travail d'autruy; ou bien du sien, si c'est luy qui est le musnier. Quelquefois aussi la meule de moulin signifie guerre, quand il ya dans le songe quelque chose qui tend à cela.



CHAPITRE VI.

De l'interpretation des songes où l'on voit des terres, des montagnes, des deserts, des collines, des bastimens, des roches, des boutiques, des maisons, des riuieres, des tremblemens de terre.

LA Terre s'explique diuersement ; si l'espace que l'on en voit, est borné, c'est vne femme ; s'il est ample & inconnu, ce sont les biens de ce monde ; si avec la grandeur de son estenduë, il est habitè & cultiué, mais garny de plantes inconnuës, c'est la Religion Mussulmane ; & le desert aussi de mesme. Si quelqu'un songe qu'il voit la terre estenduë & aplanie deuant luy, cela signifie qu'il viura long-temps, doucement & paissi-

blement ; s'il la voit releuée en façon de digue, le temps de sa vie est passé ; quelquefois aussi ce relief de terre signifie quelque gouvernement, qu'il aura, s'il est de condition à en auoir. Si quelqu'un songe que la terre parle à luy, il luy arriuera du bonheur & de grands biens & commoditez en ce monde ; de sorte que l'on s'en estonnera. Et de mesme quand l'on songe que quelque autre chose, qui ne parle point, parle ; cela signifie quelque auanture surprenante en ce que le songe touche. Si quelqu'un songe qu'il est caché dans la terre, & non dans vne fosse, il mourra en acquerrant des biens temporels ; si c'est dans vne fosse, il tombera dans quelque piege & embusche. Si quelqu'un songe que la terre tourne autour de luy, il sera troublé en ses affaires, & tournoyera par le monde pour chercher dequoy viure. Si quelqu'un songe qu'il est dans vn desert, mais bien guidé & tenant yn chemin droit, il est bien

guidé en sa conscience & tient vn chemin droit dans la Religion Mussulmane ; s'il songe qu'il est dans vn desert sans guide, il a quelque scrupule en sa conscience. S'il songe qu'il dort dans vn desert, il a le cœur mort & ignore la Religion Mussulmane. S'il songe qu'il est dans vn desert & qu'il y boit & mange, il aura des biens & des honneurs temporels & spirituels.

Le gazon & le sable, & les autres parties de la terre, comme la poudre, & choses semblables, signifient de l'argent. Celuy donc qui songe qu'il mange du gazon ou du sable, ou qu'il a du gazon ou de la poudre par dessus la teste, deviendra riche & aura de l'argent. Et de mesme quand il songe qu'il marche dessus ou qu'il en emporte. S'il songe qu'il marche dans le sable ou qu'il en emporte, il prendra quelque employ pesant & laborieux pour gagner du bien, & en aura en suite. S'il songe que la poudre est eleuée en l'air, il est envelopé dans quel-

que affaire ; & de mesme quand il voit du broüillars. Si quelqu'un songe qu'il creuse la terre & qu'il mange le gazon, il acquerra du bien par finesse & subtilité & trôperie.

La terre inculte & inhabitée signifie quelque Religion autre que la Mussulmane ; & de mesme le desert pierreux & raboteux. Que si elle est bornée à la veuë, c'est vne mauuaise femme & qui n'a aucune bonne qualité.

L'on raconte que Rabigas fils d'Ommie fils de Chelpe vint vn iour voir Abubecre le veritable, à qui Dieu fasse paix, & luy parla ainsi. Seigneur, Lieutenant de l'Apostre de Dieu, i'ay songé la nuit passée que i'estois en vne terre verdoyante & abondante, d'où ie suis passé dans vne sterile où il n'y auoit aucune plante, & que ie vous ay veu les deux mains liées ensemble & penduës à vostre col. Si ton songe est vray, luy respondit Abubecre, tu quitteras la Foy Mussulmane & te feras infidelle ; mais ce ne sera

pas de mon temps ; mes mains seront alors liées à mon col, & n'auront plus le maniment des petites affaires de ce monde. Omar fils du Chetabe, à qui Dieu fasse paix, regnant apres Abubecre, Rabigas partit de la Medine, se rendit au pays des Romains, se fist Chrestien chez Cesar, & mourut Chrestien.

Les montagnes & les collines signifient des hommes grands ou petits, à proportion de ce qu'elles sôt ; & les rochers de mesme. Quelquefois les montagnes & les collines signifient de hautes dignitez, où paruiendra celuy qui songe qu'il les monte ; mais les rochers signifient des hommes cruels & meschans, sans courtoisie & sans ciuilité. Les petites pierres, que l'on iette à la main, signifient des discours médifans contre les absens. Celuy qui songe qu'il est au haut d'une montagne, se verra au dessus de quelque homme en semblable posture ; s'il possede la montagne, il vaincra l'homme & se rendra maistre de

luy. Si quelqu'un songe qu'il demolit vne montagne, il fera perir vn homme. S'il songe qu'il la perce ou qu'il fait vn creux dedans, il machinera quelque chose contre quelqu'un & luy iouera quelque tour. S'il songe qu'il monte la montagne, il obtiendra quelque dignité, grandeur & noblesse. S'il songe qu'il la monte tout droit contremont, il aura de la peine & de la difficulté à venir à bout de quelque affaire temporelle qu'il a en l'esprit. Quand on songe que l'on s'éleve, c'est toujours vne bonne chose, si ce n'est que l'on monte droit contremont, car alors cela signifie grande difficulté & grand travail. Mais quand on songe que l'on monte à l'ordinaire, comme l'on fait quand on est éveillé, cela tesmoigne que l'on parviendra à quelque haut degré de dignité, & c'est vn bon signe. Les lieux couverts, retirés, & pleins d'arbres dans les montagnes, signifient refuge, retraite & asyle. Celuy qui songe

qu'il transporte de grandes pierres & des rochers & des montagnes, entreprendra quelque affaire difficile, laborieuse, penible, & onereuse.

Les Boutiques des marchez signifient des denrées & marchandises de diuerses sortes. Celles où l'on s'assied sans marchandise, signifient des discours & des bruits, dans lesquels on s'embarassera.

L'enclos de la demeure s'explique en diuerses manieres. Si les bâtimens & les habitans & le lieu en sont inconnus, c'est l'autre monde, dont l'estat, & des œuures, qui le precedent, sera pareil à celuy de cette demeure, pour la grandeur & la petitesse de l'estendue, pour le soin & la negligence qui paroist que l'on a à l'orner & accommoder, & choses semblables. Si le logis est connu, c'est ce monde-cy, où l'on viura en vn estat proportionné à l'espace large ou estroit du logis, à la beauté & bonté du bastiment ou à sa ruine, & choses semblables. Si

donc quelqu'un songe qu'il est dans un logis qu'il connoist & qu'il possède, il sera en ce monde en un estat proportionné à la grandeur & à la beauté de ce logis. S'il songe qu'il s'y est fait quelque augmentation, il augmentera en biens temporels. S'il songe qu'il est tombé & ruiné, sa fortune sera ruinée par son mauvais ménage. S'il songe qu'il vend son logis, il mourra. S'il songe qu'il fait bastir un logis, il prendra plaisir à vivre, & aura des biens temporels à proportion de ce logis. S'il le fait bastir en un lieu inconnu, c'est un homme qui fait volontiers de bonnes œuvres & qui sera heureux en l'autre monde. Si quelqu'un songe qu'il fait démolir un logis, si ce logis est inconnu, il effacera ses bonnes œuvres passées par le grand nombre de ses pechez à venir; s'il est connu, il ruinera sa fortune par ses folies & ses débauches. Si quelqu'un songe que son logis est diminué de quelque partie, c'est autant de diminution en sa fortune.

Ce que l'on considère dans la Ville, c'est sa grandeur & sa beauté. Les chambres hautes & les Palais élevez, quand l'on y monte, signifient vne haute fortune, où l'on parviendra. Les murailles signifient l'estat de l'homme, & quelquefois sa fortune, quand il songe qu'il est debout dessus. S'il songe qu'il tombe du haut en bas, il sera mis hors de l'estat où il est. S'il fait tomber vne muraille, il mettra quelqu'un hors de l'estat où il est, & le fera perir.

Vne maison inconnüe, plastrée, s'explique du tombeau. Si donc quelqu'un songe qu'il est detenu dans vne maison neufue, plastrée, inconnüe, c'est son tombeau; si elle n'est pas plastrée, mais inconnüe, c'est vne femme, & si quelqu'un songe qu'il entre dans vne maison ou qu'il monte dessus, cette maison luy estant inconnüe, il espousera vne femme & s'en trouuera bien. Vne maison connue, quand celuy qui en songe, la possède, c'est sa

femme; quelquefois aussi c'est sa fortune, comme nous auons dit de l'interpretation du logis. Si quelqu'un songe qu'il descouure sa maison, il deuiendra pauure; s'il descouure celle d'un autre, il s'enrichira aux despens du Maistre de cette maison. Si quelqu'un songe, qu'il creuse la terre pour faire un tombeau, il fera bastir un logis.

Si quelqu'un songe qu'il voit une Ville ruinée ou une partie d'elle, les habitans en sont desia ruinez pour ce qui est des biens spirituels, & le seront peut estre aussi bientôt pour les temporels, par quelque mal-heur qui leur arriuera.

Le degré par lequel un homme songe qu'il monte, c'est la Religión, par laquelle il espere monter en Paradis. S'il songe qu'il monte par des degrez de brique, il s'éleuera dans sa Religion par des aumosnes & de pieuses despenses. Si le degré est de plastre, ou de tuile, ou de bois, celuy qui songe qu'il le monte, s'éleuera peu à peu en fortune,

quand il y a dans le songe quelque autre chose, qui tesmoigne cela.


La porte du logis en signifie le Maistre, c'est à dire celuy que l'on y considere le plus. Quand donc il arriue quelque chose à cette porte, comme fracture ou rupture, ou coupuré, ou quelque autre malheur ou bonheur, cela s'adresse à luy. La porte de la maison signifie la femme, & de mesme le sueil. Si quelqu'un songe qu'il voit la porte d'un logis bruslée, il arriuera quelque infortune au Maistre de ce logis de la part du Roy, ou bien il aura la peste; s'il songe qu'il la voit arrachée ou tombée, le Maistre mourra. Si c'est la porte de la maison ou le sueil que l'on voit arraché, la maîtresse mourra. Si quelqu'un songe qu'il ouvre vne porte autre que celle par où il a coustume d'entrer, il quittera le país. S'il songe que la vieille porte de son logis est ostée, & qu'il y en a vne neufue en la place, il vendra son logis; quelquefois aussi sa femme le quittera pour pré-

dre vn autre mary. Si quelqu'un songe que la porte du logis est tombée, & que depuis on l'a fait releuer, le Maistre du logis fera malade, & guerira en suite. Les deux poteaux de la porte signifiēt les enfans de la maison. Si donc quelqu'un songe que les deux poteaux de sa porte sont tombez, & qu'il ait des fils, ils mourront; s'il n'a que des filles, elles seront mariées & sortiront de chez luy. Si quelqu'un songe qu'il voit la porte d'une maison ouuerte & qu'il la ferme, il repudiera sa femme. S'il ouure vne porte fermée, & que ce soit d'une maison qu'il connoisse, il se mariera; si c'est d'une maison à luy inconnue, sa Priere sera exaucée.

Vn clou ou vne cheuille signifie vn homme, par le moyen duquel les autres viennent à bout de leurs affaires. Et de mesme vn pont ou vn bac.

Le tremblement de terre signifie quelque accident notable dans le monde. Si quelqu'un songe qu'il

voit trembler les montagnes, les Docteurs mourront. S'il songe qu'il est luy-mesme ébranlé par le tremblement de terre, ce n'est rien de bon pour luy. S'il songe que son logis tremble, il sera affligé de peste; & s'il en voit quelque partie ruinée, ceux à qui cette partie a rapport, en mourront.



CHAPITRE VII.

De l'explication des Songes où l'on voit des arbres, des fruits, des grains, des champs, de la verdure, des herbes potageres, des iardins.

TOus les Arbres signifient des hommes, mais diuers, selon la diuersité des arbres en leur nature, en leur vsage, en leur odeur, & en autres choses. Si quelqu'un songe qu'il luy vient quelque chose de leurs fruits ou de leurs fueilles, il

aura du bien & de la commodité de
quelqu'un à proportion de l'arbre.
Le bois à bastir signifie de la des-
pense en œuvres pieuses & des hom-
mes faisans telle despense. Le bois
à brusler, soit vert, ou sec, signifie
mesme chose que le bois à bastir,
quand il est gros; le petit signifie
médifance & diffamation. Le ba-
ston signifie vn homme considera-
ble & de grand pouuoir, comme
sont ceux qui le portent pour mar-
que de leur autorité. Les arbres
espineux signifient des hommes mé-
chans. Les espines elles-mesmes si-
gnifient vne affaire fascheuse, qui
pique l'homme & luy donne du dé-
plaisir, soit de parole, ou de fait;
quelquefois c'est vne debte, dont il
est chargé, & qui l'incommode, ou
quelque autre affaire desplaisante.
Vn clos planté de vignes & de gre-
nadiers signifie aussi vne femme.
Si quelqu'un songe qu'il a planté
vn arbre, & qu'il est creu & s'est éle-
ué, il obtiendra quelque dignité, &
se rendra quelqu'un obligé, selon la

nature de l'arbre ; quelquefois il éleuera vn enfant qui deuiendra plus grand que luy.

Les Dattes signifient du bien legitiment acquis. Les dattes vertes signifient de l'argent, qui réjoüyra la veuë. Vne datte seule signifie mille dragmes. La grenade en sa saison signifie de l'argent amassé, quand elle est douce. Quelquefois aussi elle signifie vne terre assortie de ses appartenances, pour celuy qui en mange ou qui la possede. En vn mot, elle signifie quelque assemblage de quoy que ce soit. Si elle est acide, elle signifie du soucy pour celuy qui la mange ; & de mesme autre fruit acide. La pomme signifie le mestier de l'homme, sa profession, & son employ. Si celuy qui en songe, est Roy, c'est son Royau-me ; s'il est Marchand, c'est sa marchandise ; s'il est artisan, c'est son mestier. Si quelqu'vn songe qu'il luy en vient, ou qu'il en mange, ou qu'il en a, il luy viendra du bien de son employ à proportion de leur

beauté & de leur bon goust, de leur grande ou petite quantité. Le citron signifie des biens de bonne odeur, quand il y en a plusieurs ; s'il n'y en a qu'un ou deux, il signifie de bons enfans. Sa couleur iaune n'empesche point qu'il ne signifie du bien. Quant aux autres fruits iaunes, comme le coin, l'abricot, la prune, la mandragore, le saffran, & leurs semblables, ils signifient maladie, si ce n'est qu'ils soient encore verts, car alors ils signifient des biens qui ne produisent point de gain. Les melons iaunes signifient aussi maladie pour celuy à qui il en vient. La mouze signifie des biens temporels pour les gens de ce monde, & des biens spirituels pour les gens de Religion. Sa couleur iaune ne la rend point pire, ny son acidité, ny sa veüe hors de sa saison. Si l'on en voit plusieurs ensemble, il n'est pas de meilleur amas que celuy-là. Le raisin blanc & le rouge, est le suc des biens du monde, leur meilleure partie & plus propre
pour

pour l'entretien de la vie, soit en sa saison ou en vn autre temps ; le noir, hors de sa saison, signifie maladie ; quelquefois le nombre des grains, quand il est connu, signifie autant de coups de foïet pour celuy qui les mange ; quelquefois ce sont des boutons ou petites eleueures qui doiuent paroistre sur son corps. En vn mot la couleur noire n'est rien de bon, parce que Noë, à qui Dieu fasse paix, ayant fait des imprecations contre son Fils dans sa cholere, le raisin qu'il tenoit en sa main deuint noir. Si quelqu'un songe qu'il presse le raisin, il seruira le Roy, soit qu'il soit tout venant de la vigne, ou seché au Soleil ; & de mesme celuy qui songe qu'il presse l'oliue. L'Huile signifie benediction & bonheur & abondance & repos pour celuy à qui il en vient. L'Oliue noire & la rouge signifie aussi du bien & des commoditez pour celuy à qui il en vient. Le Figuier signifie loucy, chagrin & repentir, parce qu'Adam estoit assis

deffous quand il fut mis hors du Paradis. La Noix signifie discours & querelle & dequoy viure, mais non fans beaucoup de peine & trauail. L'Amande signifie dequoy viure, & la Pistache de mesme. La Noisette signifie des biens bien acquis. Tout arbre, qui ne porte point de fruit, cōme le Cyprés, l'Orme, le Cedre, & les autres, signifie vn homme de peu de seruire & de peu d'amitié. Tout arbre de bonne odeur signifie vn homme considerable & de bonne reputation. Tout arbre de mauuaise odeur signifie vn homme menteur & trompeur.

Quant aux grains, le bled vert vaut mieux que le sec. Celuy qui songe qu'il mange du bled vert, sera bien conduit en sa Religion & aura dequoy viure. Si quelqu'un songe qu'il mange du bled sec ou boüilly, ce n'est rien de bon, à cause de l'Histoire que l'on raconte d'Adam, à qui Dieu fasse paix. L'Orge vaut mieux que le bled, soit vert ou sec ou boüilly ou frit; c'est

dequoy viure & se bien conduire, du bonheur manifeste pour celuy à qui il en vient. La Farine vaut encore mieux que tout cela, c'est du bien tout amassé & tout acquis, soit qu'elle soit de bled ou d'orge. Elle vaut mieux mesme que le pain, parce que le pain a passé par le feu. Le Pain blanc signifie aussi du bien tout acquis, & vnc vie douce & paisible pour celuy qui le mange. Le palté signifie abondance de bestail & de fruits, & celuy qui songe qu'il pestrit, verra ses bestes multiplier, & ses arbres porter quantité de fruit, & ses champs produire beaucoup de grains; en vn mot, c'est du bien qui luy doit venir, apres du trauail & de la peine. Le Riz signifie du bien avec du soucy & de la peine pour le gagner. La Sisame signifie du bien qui croit & qui augmente continuellement. Le Panic & le Millet signifient du bien mal acquis. Les Febues signifient vn long desplaisir. Les Ciches & les Lentilles & les Pois signifient de

grandes richesses, mais fascheuses & accompagnées de soucy & de déplaisir. Les Grains de la campagne signifient les œuvres de l'homme, temporelles & spirituelles, quand il songe qu'ils luy appartiennent ou qu'il marche à trauers, & cela à à proportion de leur abondance & de leur bonté; quelquefois aussi ils signifient des hommes qui s'assembleront en ce lieu là pour faire la guerre, & si on les voit moissonner, c'est à dire que ces hommes seront defaits. Les Semailles des grains dans les champs signifient les bonnes œuvres & charitables; si l'on songe qu'on les voit leuer, c'est à dire que ces bonnes œuvres sont agreables à Dieu Tout-puissant & tout bon, & qu'elles rendront celui qui les fait, celebre dans le monde, & luy donneront du credit & de l'authorité; quelquefois aussi elles signifient des enfans & de la posterité, quand la terre est bornée aux yeux & non inconnue.

Quant aux Verdages potagers,


comme les concombres, les citrouilles, les carotes, les nauets, & choses semblables, ce sont des biens de peu de prix, que l'on acquerra avec beaucoup de soucy, de desplaisir & de chagrin; quelquefois mesme le soucy & le desplaisir sont prompts à venir, & le profit que l'on en doit tirer, est tardif. Il en est de mesme des herbes potageres, comme des aulx, des oignons, des porreaux, & des autres, c'est du desplaisir & du soucy & du chagrin. Quant aux autres plantes de iardin recommandables pour leur bonne odeur, comme la rose, le narcisse, l'œil de bœuf, le myrte, & leurs semblables, si elles sont cueillies & mises hors du lieu où elles croissent, elles signifient du déplaisir, du chagrin, & des pleurs; si elles ne sont pas cueillies ni hors du lieu où elles croissent, mais transportées entieres avec leur terre, elles signifient vn bon fils à proportion de la nature de

leur espece, & vne bonne & favorable reputation, pour celuy à qui il en vient quelque chose. Toutes les autres herbes signifient abondance de commoditez & des biens permis & legitimes pour celuy qui les cueille, ou qui marche dedans. Si quelqu'un songe qu'il voit vne plante inconnue croistre en vn lieu où elle n'a pas coustume de venir, comme dans vne maison ou dans vne Mosquée, c'est quelqu'un qui doit venir voir ceux qui hantent ce lieu-là, pour faire alliance ou trafic avec eux, ou quelque autre société. La Paille ou le foarre signifie des biens prompts à venir & de l'or present. Le fils de Sirin l'appelloit ordinairement *Tibron*, qui signifie de l'or, au lieu de tibnon, qui est son vray nom en Arabe.

Le Jardin signifie la femme de l'homme. Si quelqu'un songe qu'il en mange des fruits, il deviendra riche par le moyen d'un mariage auantageux. Si quelqu'un

songe qu'il se promene dedans pour se diuertir, il viura à son aise, joyeux & content, avec vne belle femme. Si quelqu'un songe que la porte de son iardin est arrachée, il repudiera sa femme. Les grands iardins inconnus s'expliquent du Paradis. Si donc quelqu'un songe qu'il entre dans quelqu'un de cette sorte & qu'il s'y diuertit, il entrera en Paradis. Toutes sortes de prairies agreables signifient la Religion Mussulmane. Quand donc quelqu'un songe qu'il s'y promene ou s'y diuertit, il est en la conduite de Dieu & en vn bon & heureux estat pour ce qui est de sa Religion. Quelquefois aussi ce sont des sciences où l'on estudie avec plaisir.





CHAPITRE VIII.

De l'explication des songes de Vins & de Lait.

LE lait, dont l'espece est inconnüe, signifie particulièrement la Religion Mussulmane & les Loix du Prophete, à qui Dieu fasse paix & misericorde. Si quelqu'un songe qu'il en boit ou qu'il en possède, il sera heureux & bien conduit en sa Religion. Le Lait, dont on connoist l'espece & le genre, signifie des biens legitime-ment acquis, & dequoy viure à son aise & fera son profit, quand il n'est pas aigre ny caillé & écremé; car s'il est tel, il signifie du soucy & du desplaisir. Le Fromage signifie des meubles morts & du bien & des commoditez pour celuy qui le possède. Le mol vaut mieux que le sec. Le lait de vache ou de buffle ou de chameau vaut mieux que tout

autre. Le lait de brebis ou de chevre n'est pas si bon que celuy de vache. Le lait d'asnesse sauvage signifie bonne conduite en fait de Religion. Le lait de mule signifie espouuante & perplexité pour celuy qui en boit. Le lait d'asnesse domestique signifie vne grande maladie, mais qui passera. Le lait de chevre sauvage & des autres bestes fauves bonnes à manger signifie bonheur & bonne conduite & dequoy viure legitimement.

Le Lait de caualle signifie bonne reputation pour celuy qui en boit. Le lait de Lionne signifie victoire sur son ennemy. Le lait de chienne signifie grande peur. Le Lait d'Ours ne signifie rien de bon. Le lait de Loue signifie grande espouuante de la part de quelque ennemy & vn dommage prompt à venir. Le lait de Leopard signifie crainte & inimitié descouuerte. Le lait de Renard signifie du bonheur, de la ioye, & des richesses. Le lait de Chate signifie maladie & querelle. Le lait de

truye signifie perte d'esprit pour celuy qui l'a. Le lait de femme, soit que quelqu'un songe qu'il tette, ou qu'une femme songe qu'elle luy donne à tetter, signifie prison & captiuité pour l'un & pour l'autre; car c'est teter apres les deux ans. Que si vne femme songe qu'il coule du lait de ses mammelles, c'est du bien & des richesses & des commoditez qui luy viendront en abondance, tout au contraire de teter.

Le Vin signifie des biens defendus, quand il n'est point accompagné de repugnance; mais quand l'on a repugnance à le boire, il signifie des discours & des querelles pour celuy qui a cette repugnance. Le vin cuit signifie des biens facheux & douteux, qui ne s'acquierent qu'avec beaucoup de trauail & de peine, à proportion de ce que le feu en a consommé. L'yuresse de vin ou de vin cuit signifie des richesses & du pouuoir; de sorte que si quelqu'un songe qu'il est yure de l'un ou de l'autre, il deuiendra ri-

che puissant. L'yvresse sans auoir
 beu ne signifie rien de bon ; car
 Dieu Tout-puissant en parle ainsi,
*Tu verras les hommes yvres sans
 auoir beu, mais les supplices de
 Dieu sont grands.* Si quelqu'un
 songe qu'il boit du vin & du vin
 cuit avec vn autre, & qu'il y a en-
 tre-eux deux vne table à manger, il
 aura dispute & procez avec quel-
 ques personnes pour quelque com-
 modite seruant à la vie ; car la ta-
 ble signifie les viures. Si quelqu'un
 songe qu'il fait du vin au pressoir, il
 seruira vn Prince & aura le mani-
 ment des grandes affaires. Si quel-
 qu'un songe qu'il voit vne riuere
 de vin, & que ce soit dans vne prai-
 rie ou autre lieu verdoyant, incon-
 nu, il entrera en Paradis, pourueu
 qu'il boiue à cette riuere ou qu'il
 entre dedans ; si c'est ailleurs, il luy
 arriuera quelque malheur dans ses
 affaires temporelles.

Le Miel & les rayons du miel si-
 gnifient des richesses & des com-
 moditez & guerison de maladie.

Quant aux autres boissons composees de fruits d'arbres ; leur signification est pareille à celle des fruits dont ils sont composez & dont nous auons desia parlé.



CHAPITRE IX.

Des songes d'Hommes & de Femmes, de parties de corps humain, & de fientes d'animaux.

VN Homme que l'on connoist, quand l'on songe que l'on fait quelque commerce avec luy, ou que l'on parle à luy, se doit entendre de cét homme-là mesme, ou de quelqu'un qui luy ressemble, ou qui porte mesme nom. Vn homme inconnu, s'il est encore ieune, represente l'ennemy de celuy qui le voit ; si c'est vn vieillard, il represente sa fortune & son auanture. Si donc quelqu'un songe

qu'il voit vn vieillard qui luy donne quelque chose ou qui parle à luy, c'est sa bonne fortune & sa bonne auanture, qui doit estre telle que la represente l'estat où l'on voit ce vieillard, comme sa bonne ou mauuaise mine, ses auantages ou desauantages, sa force ou foiblesse. Vne vieille femme inconnue represente ce monde, & de mesme vne débauchée, elle signifie aussi de la sciēce & de la bonne cōduite pour les gens de Religion. Vne ieune Femme inconnue signifie l'année presente, qui doit estre bonne ou mauuaise, à proportion de ce que cette femme paroist belle ou laide, ou autrement disposée. Si donc quelqu'un songe qu'il voit vne ieune femme, qu'il ne connoist point, & qu'elle luy parle ou luy donne quelque chose, ou bien qu'il l'embrasse, ou qu'il la baise, ou qu'il la connoist charnellement, mais sans ietter de semence, ou qu'il la prend pour compagne, l'année presente, où il entre, luy sera telle que cette femme luy pa-

roist ; s'il la voit belle & en bon point, cette année luy sera bonne & luy fournira de bonnes commoditez pour viure ; s'il la voit en vn estat contraire, l'année luy sera de mesme. Vne fille vaut mieux à voir naistre qu'un garçon ; elle signifie ioye & bonheur pour celuy qui songe qu'il la voit naistre, ou qu'elle luy naist ; vn garçon au contraire signifie du soucy & du desplaisir & de grands sujets de plainte, pour celuy qui le voit naistre ou à qui il naist. Les Eunuques inconnus s'interpretent comme les Anges.

La teste de l'homme signifie son superieur, d'où il prend son nom parmi le monde, soit son pere ou son frere, ou son Seigneur, ou son parēt. ou son associé, ou son Prince, ou autre ; quoy que ce soit donc qu'il voye en songe arriuer à sa teste, cela doit arriuer à ce superieur. La teste signifie aussi le fonds du reuenu de l'homme. Si donc quelqu'un songe qu'il a la teste hors de

dessus les espauls, mais sans qu'on luy ait coupé le col, il se trouuera séparé de ce supérieur-là, ou il perdra son fonds, ou il aura de la peine à subsister. Les Cheveux signifient les biens de l'homme ou les biens de son supérieur, ou bien ils s'expliquent en quelques autres manieres. Car si quelqu'un songe qu'il a la teste rasée & que ce ne soit pas pour marque du sacré Voyage, ni dans les mois sacrés, il perdra le fonds de son reuenu, ou son supérieur perdra son bien, ou on luy osterá sa charge; si c'est dans les mois du sacré Voyage, cela signifie qu'il est bien conduit en sa Religion, & quelquefois aussi qu'il fera le sacré Voyage. Si quelqu'un songe qu'il a les cheveux longs & grands, s'il est de ceux qui portent les armes, cela signifie force & beauté & bonne mine; s'il est Sacerdote, il commandera; s'il est Marchand, son argent luy profitera; s'il est Laboureur, ses terres luy rapporteront beaucoup; s'il n'est rien de tout ce-

la, c'est du soucy & du desplaisir pour luy, à proportion de leur longueur & largeur, particulièrement quand il songe qu'ils luy courent le visage. Si celuy qui a les cheveux noirs, songe qu'il les a blancs, cela signifie qu'il sera honoré & respecté parmy les hommes; s'il les a blancs, & qu'il songe qu'il les a noirs, cela signifie du changement en l'estat de ses affaires. Le front de l'homme & sa barbe s'expliquent de sa dignité & de ce qui le fait respecter. Que si quelqu'un songe qu'il a la barbe plus longue que l'on n'a coustume de la porter, c'est du soucy & du desplaisir & du malheur pour luy à proportion de la longueur. Si quelqu'un songe qu'il l'a rasée, cela signifie perte de ce qui le fait considerer parmy les hommes. Et de mesme si quelqu'un songe qu'elle luy est tombée ou qu'on la luy arrache; il y a pourtant moins de mal à l'avoir rasée. Que si quelqu'un songe qu'il a la barbe & les cheveux rafez tout en-

semble, & qu'il y ait quelque chose dans son songe qui signifie du bien, s'il y a du desplaisir, il en fera déliuré; s'il est endebté, il s'acquitera; s'il est malade, il guerira; s'il n'est rien de tout cela, ce n'est rien de bon pour luy. Quant à la teinture du poil, elle signifie protection & sauuegarde. Si donc quelqu'un songe qu'on luy teint les cheueux, Dieu Tout-puissant le conseruera en l'estat où il est & l'assistera dans ses desseins. Si la teinture ne tiët point, Dieu ne l'assistera point en cela. L'Huile ou parfum liquide répandu sur la teste & sur la barbe & sur le reste du corps, signifie ornement & ajustement, quand il ne surpasse point la mesure accoustumée; s'il y en a trop & qu'il coule sur le visage ou sur le corps, c'est desplaisir qui arriuera à celuy qui en est oint. Si cette huile, dont il est oint, est de bonne odeur, elle signifie bonne reputation outre l'ajustement; si elle est de mauuaise odeur, elle signifie mauuaise reputation. Toutes les

autres bonnes odeurs signifient pareillement bonne reputation. Le Parfum & fumée signifie bonne reputation avec espouuante & danger ; car la fumée signifie crainte & peril de la part du Roy. Si quelqu'un songe qu'il luy vient du Poil au visage & aux ioües ou ailleurs où il n'a pas accoustumé d'en venir, cela signifie des debtes, dont il sera chargé, & qui luy donneront beaucoup de peine & de tourment. Quant au poil qui se rase aux aisselles & au penil, sa diminution signifie augmentation de foy & de deuotion ; quelquefois aussi l'augmentation du poil du penil signifie vne charge où il ne s'agit point de Religion. Le poil du reste du corps signifie l'argent de l'homme, s'il en a, ou sa marchandise ou ses terres ; si bien que ce qu'il y voit d'augmentation ou diminution, s'entend de cela. Si quelqu'un songe qu'il se fait tóber le poil par le moyen d'un depilatoire, s'il est riche, il deuiendra pauvre ; s'il est pauvre, il de-

viendra riche ; s'il a du desplaisir, il en fera déliuré ; s'il est malade, il sera guery ; s'il est endebré, il s'acquitera. Et de mesme quand quelqu'un songe qu'il pisse ; s'il a du desplaisir, il en fera déliuré ; s'il est endebré, il s'acquitera ; mais s'il a de l'argent, il diminuera, à proportion de la quantité d'vrine qu'il rend.

La Ceruelle de l'homme signifie son argent & son thresor, & de mesme toutes les autres ceruelles signifient de l'argent mis en thresor. Si quelqu'un songe qu'il mange de sa propre ceruelle, il viura à ses propres despens ; s'il songe qu'il mange de la ceruelle de quelque autre, soit d'un homme ou d'un autre animal, il viura de ce que cét autre gaignera. La Chair humaine, quelle qu'elle soit, signifie de l'argent, quand elle est boüillie ou rostie ; mais quand elle est cruë, c'est médisance contre celuy à qui elle est.

L'Oreille signifie la femme ou la fille de l'homme. Si donc quelqu'un

songe qu'il pert vne oreille, il repudiera sa femme, ou bien elle mourra, ou bien il mariera sa fille. S'il songe qu'il a l'oreille plus grande qu'auparauant, ou mieux ornée d'anneau & de perle, il arriuera du biẽ à sa femme ou à sa fille. L'Ouye de l'homme signifie sa Religion; si donc il songe qu'elle luy deuient meilleure ou pire, ou qu'il la pert, il luy arriuera la mesme chose en sa Foy. La Voix de l'homme signifie sa reputation & ce que l'on dit de luy parmy le monde & sa gloire; tout cela à proportion de la force de sa voix, de la douceur & agrèment de son chant, de son éloignement & de son approche.

L'Oeil signifie la Religion de l'homme & sa conduite, & de mesme sa veuë, si bien que ce que quelqu'un songe qu'il arriue à ses yeux ou à sa veuë d'auantage ou de dommage, cela s'entẽd arriuer à sa Foy; comme l'auëuglement, l'ophthalmie, la taraxe, & choses semblables. Si quelqu'un songe qu'il ap-

plique vn collyre à son œil, il tas-
chera de mettre sa Foy en bon estat,
si son intention est en ce faisant de
rectifier sa veuë; que si son inten-
tion est de s'embellir le visage, il
entreprendra quelque affaire qui le
fera estimer deuoit parmy le monde.
Quelquefois aussi l'œil signifie ce
que l'on considere particuliere-
ment, soit du bien ou vn fils ou vn
frere ou vn maistre, en sorte que ce
que l'on songe qu'il luy arriue de
nouveau, soit auantageux ou defa-
uantageux, doit arriuer à ce qu'il
represente. Le poil des paupieres
& des sourcils signifie le soin que
l'on prend de conseruer sa Religion
& le bon sentiment que l'on en a.
Si donc quelqu'un songe que le poil
de ses paupieres ou de ses sourcils
est augmenté ou deuenu plus beau,
c'est signe qu'il a de bons sentimens
de sa Religion & qu'il y est bien
disposé.

Le Nez signifie la dignité & la
gloire de l'homme; & de mesme
son front signifie son excellence &

sa noblesse. Ce qui arriue donc à l'un ou à l'autre d'auantageux ou de defauantageux, s'entend de cela. Les Tēples & les Maschoires d'en-haut & les Ioües & les maschoires d'embas signifient la maniere de viure de l'homme, & ce qui luy suruiuent en ces parties-là, represente ce qui luy doit arriuer dans sa vie parmi les hommes.

Les Leures signifient les amis & appuys de l'homme. Celle d'en-haut est plus considerable que celle d'embas. La Langue de l'homme signifie sa parole, quelquefois aussi elle signifie ses raisons & ses p^reuues. Si quelqu'un songe qu'il a la langue coupée ou accourcie ou diminuée, s'il a quelque dispute ou procez contre quelqu'un, il demeurera court en ses raisons; s'il n'en a point, c'est signe qu'il est en bon estat pour ce qui est de sa Religion. S'il songe que sa langue est alongée, il aura des raisons de reste, fera fort à la dispute, & vaincra son aduersaire; s'il n'a dispute contre per-

sonne, il fera grand parleur & diseur de villenies & de sottises. Si quelqu'un songe que sa femme a la langue coupée, c'est tousiours bon signe en quelque occasion que ce soit.

Les Dents signifient les domestiques de l'homme & ses proches parens. Les deux de deuant signifient les enfans & les freres & les sœurs. Si donc quelqu'un songe que quelqu'une de ses deux dents de deuant luy branlent, cela signifie que quelqu'un d'eux sera malade. S'il songe qu'elle luy est tombée dans la main, ou bien qu'il l'a serrée dans sa robe ou cachée dans son sein ou dans sa maison, il aura vn enfant, ou vn frere, ou vne sœur, qui luy rendront seruice ; s'il la voit rongée ou usée, il arriuera à quelqu'un d'eux quelque affliction en son corps. S'il la voit alongée & augmentée ou blanchie & embellie, il arriuera à quelqu'un d'eux quelque bonne auanture dont il se resioüyra. Les dents d'apres les deux de deuant si-

gnifient l'oncle frere du pere, & ses enfans, ou la tante sœur du pere & ses enfans, & les autres parens de mesme costé ; quand donc l'on songe qu'il leur arriue quelque chose, il arriuera le mesme à quelqu'un de ces parens-là à proportion de ce que ie viens de dire. Les dents couines signifient le Maistre de la maison & l'appuy des domestiques. Les dents riantes signifient l'oncle frere de la mere, ou la tante sœur de la mere, & les parens de mesme costé. Les grosses dent signifient les parés les plus éloignez, celles d'en haut les masles, & celles d'embas les femelles. Si donc quelqu'un songe qu'il luy en est tombé quelque vne de la bouche, sans qu'il l'ait retenuë ny ferrée, il luy mourra quelqu'un de ces parens-là, masle ou femelle, selon ce que nous venons de dire. Si quelqu'un songe que toutes les dens luy sont tombées, il viura long-temps ; car il enterrera tous ses parens & mourra le dernier.

L'on

L'on raconte qu'un iour Alman-
 for songea que toutes les dents luy
 estoient tombées de la bouche, sur-
 quoy ayant fait venir un Interprete
 & luy ayant raconté son songe,
 l'Interprete luy respondit ainsi.
 Tous vos parens mourront, Sei-
 gneur commandeur des Fielles.
 Almanfor luy repliqua en ces ter-
 mes. Dieu t'a fait vne meschante
 bouche & y a mis de meschantes
 nouvelles, retire toy d'auprés de
 moy, Dieu t'enuoye malheur. Apres
 cela il commanda qu'on luy en fist
 venir un autre, & on luy en amena
 un, qui sçauoit comme il falloit par-
 ler aux Grands, & qui luy respondit
 ainsi, apres qu'il luy eut raconté le
 mesme songe. Seigneur comman-
 deur des Fielles, vous ne mourrez
 que le dernier de tous vos parens,
 vous viurez plus long-temps que
 pas un d'eux. Almanfor se prist à
 rire, trouuant cette responce bon-
 ne, & fist donner dix mille dragmes
 à l'Interprete.

Le Col signifie la Foy & la Reli-

*Alman-
 for 23.
 Voyez,
 le Ma-
 cine.*


gion. Si donc quelqu'un songe qu'il luy est augmenté ou alongé, cela signifie de la force pour maintenir & soustenir sa Foy & sa Religion; s'il songe qu'il luy est diminué ou affoibly ou accourcy, cela signifie impuissance pour la mesme chose. Il en est de mesme des es-paules.

Les Mains & les Bras s'expliquent diuersement, tantost ils signifient les freres, tantost les amis affidez, tantost ceux avec qui l'on a contracté quelque société, tantost celuy-mesme qui en songe & l'estat de ses affaires, ce qui se doit distinguer, parce qu'il y a autre chose dans le songe qui en rend la signification plus certaine. Si donc quelqu'un songe qu'il a la main coupée, il luy mourra vn frere ou vn fidelle amy, ou bien il se separera de la société qu'il a contractée avec quelqu'un, s'il en a contracté, tout cela quand il ne songe point en mesme temps qu'il l'emporte; que s'il songe qu'il l'emporte, il aura vn frere ou vn

filz, ou vn fidelle amy, qui luy rendront seruire. Si quelqu'un songe qu'il a tousiours la main coupée, sans rien songer de la maniere dont elle l'a esté, cela signifie qu'il se doit abstenir des choses defenduës & des pechez; & de mesme quand il songe qu'il a les deux mains attachées au col. Si quelqu'un songe que le Magistrat luy a fait couper la main droite, il iurera Dieu Tout-puissant faussement. Si quelqu'un songe que la main luy est allongée, il augmentera ses presens, ses despenses, & ses liberalitez. S'il songe qu'elle a beaucoup de force à tenir ce qu'elle prend, celui-là signifie augmentation de pouuoir & d'authorité. Les doigts signifient les enfans du frere & de la sœur. Quelquefois aussi les cinq doigts signifient les cinq Prieres. Si donc quelqu'un songe qu'ils luy sont augmentez ou diminuez, il arriuera quelque chose de semblable aux enfans de son frere ou de sa sœur, ou à ses Prieres, s'il y a quelque

chose dans le songe qui les marque particulièrement. Les Ongles signifient le pouuoir de l'homme & l'estat de ses affaires, parce que c'est avec eux qu'il se grate le corps.

La Poitrine signifie la douceur & la patience de l'homme, qui par consequent est grande ou petite, selon qu'il voit sa poitrine large ou estroite. Les Mammelles signifient les filles de l'homme. Son ventre signifie ses biens & ses enfans. Si donc il voit son ventre plus petit qu'il n'a accoustumé d'estre, ses biens & ses enfans augmentent. L'Espaule signifie la femme de l'homme, ce qui arriue donc à son espaule, doit arriuer à sa femme. Les intestins & tout ce qui est dans le ventre, signifient de l'argent mis en thresor. Si quelqu'un donc songe qu'il mange ses intestins ou son foye, ou ses roignons, ou autre chose qui soit dans son ventre, ou bien qu'il le prend ou qu'il l'emporte, de luy-mesme, ou d'un autre, il trouuera vn thresor. Tout ce



qui naist du corps de l'homme & s'en nourrit, comme les vers & les poux, ce sont les seruiteurs de l'homme. Si donc il songe que les poux & les vers tombent de son corps, ou de quelqu'une de ces parties, ou qu'il en voit grand nombre sur luy & sur ses habits, il aura des seruiteurs & des officiers. Les Costes de l'homme signifient ses femmes, & ce qui arriue à ses costes, doit arriuer à ses femmes. Le Dos signifie le secours & l'appuy de l'homme. Les Reins signifient la grandeur de l'homme & la ioye de l'ame. Quelquefois aussi ils signifient les enfans, parce qu'ils en sont l'origine. Le Membre viril signifie la reputation de l'homme parmy le monde; il signifie aussi quelquefois ses enfans; si donc il y voit quelque augmentation ou diminution, elle se trouuera dans tous les deux. Que s'il songe qu'il n'a qu'un membre viril, ou qu'il en a deux ou plusieurs, il luy viendra des enfans en pareil nombre. Que s'il songe qu'il

a le membre viril coupé, ses enfans mourront; & s'il songe que ses enfans mourront, le membre viril luy sera coupé. Les deux Testicules marquent des enfans femelles, & ce qui leur arriue, doit arriuer aux filles de celuy qui le songe. Le Testicule gauche est le faiseur d'enfans; c'est pourquoy si quelqu'un songe qu'on le luy a arraché ou coupé, ou qu'il luy est tombé, il ne luy naistra plus d'enfans apres cela. Les deux Cuisses marquent la famille de l'homme & sa parenté; si donc il songe que sa cuisse est separée de son corps, il quittera sa famille & son pays. Le genoüil & la iambe & le pied signifient le bien de l'homme & son viure, ce surquoy il se fonde & par quoy il gagne sa vie & subsiste. Les doigts du pied signifient l'ornement du bien de l'homme. Les Nerfs signifient ce qui tient ses affaires en estat. La Peau marque ce qu'il doit laisser apres sa mort.

Les parties honteuses s'entendent de tout ce qui est entre le nom-

bril & le genoüil. Si quelqu'un songe qu'il s'en est descouvert en luy quelque partie, quoy qu'il fust vestu, il se decouvrira autant à proportion de ce qu'il a honte que le monde sçache de luy. Si quelqu'un se voit dépoüillé de ses habits, il sera abandonné dans vne affaire qu'il poursuiura & où il sera beaucoup avancé; que si cette affaire concerne la Religion, il en aura bonne issuë du costé de la deuotion & pieté; si c'est vne affaire du monde, il en verra la fin. Cecy s'entend quand ses parties honteuses ne sont point descouvertes en sorte que le monde les regarde; car si cela est, ce n'est rien de bon. L'on dit aussi que si quelqu'un songe qu'il se despoüille de ses habits dans vn marché ou dans vne Mosquée, ou dans quelque autre lieu semblable, sans que ses parties honteuses soient descouvertes, & sans que personne les regarde, cela signifie ioye & deliurance de quelque maladie, & que ses pechez luy seront pardonnez,

& que s'il doit quelque chose il s'acquitera.

Celuy qui songe qu'on luy a coupé le col & que sa teste en est separée; si c'est vn esclave, il sera affranchy; si c'est vn malade, il sera guerry; si c'est vn homme endebté, il s'acquitera. Quelquefois aussi il fera le voyage de la Mecque. Si c'est vn homme accablé de douleur & de desplaisir, il en fera déliuré. S'il est en crainte, il se verra en assurance. Si quelqu'un songe qu'il sacrifie & égorge vn homme, il affligera ce mesme homme injustement. Car le sacrifice d'une chose qu'il n'est pas permis de sacrifier, signifie injustice. Et de mesme si quelqu'un songe qu'il tuë vn homme, il arriuera du bien à celuy qui est tué, de la part de celuy qui le tuë. Et si vn homme songe qu'il iette l'autre à bas en luttant, celuy qui est abbatu, est en meilleur estat que l'autre.

L'on raconte que Gabdolle fils du Zebire songea qu'il luitoit avec

Gabdolmelic fils de Neroüane, & qu'il l'abatit & le cloüa à terre avec quatre cloux. Il enuoya vn homme vers Mahomet fils de Sirin pour luy demander l'explication de ce songe, & commanda qu'on ne luy fist pas sçauoir qui estoient les lutteurs. Le songe luy ayant esté exposé, il faut, dit-il, que ce soit Gabdolle fils du Zebire, ou Gabdolmelic fils de Merouïanne qui ait songé cecy. Le messager ne voulut rien dire là-dessus, & l'Interprete dist, qu'il ne donneroit point d'explication iusques à ce qu'on luy eust auoüé la verité; il retourna donc vers celuy qui l'auoit enuoyé, & luy declara cecy. Gabdolle le renuoya & luy dit qu'il auoüast donc que ç'auoit esté luy qui auoit songé cela. Surquoy le fils de Sirin fist responce que ce seroit Gabdolmelic qui remporterait la victoire sur Gabdolle & qui luy osterait la vie, que les quatre fils de Gabdomelic seroiēt Chafilés apres luy, & que les clous avec lesquels il l'auoit cloüé à terre mar-

Le Ma-
cine

rap por-

te un

autre

songe

sur ce

subiet

en l'an

86. &

la mort

de Gab-

dolle en

l'an 71.

quoient cela. Et cela arriua ainſi.

Si quelqu'un ſonge qu'il ſe marie, & qu'il connoiſſe la femme qu'il eſpouſe & ſçache ſon nom, cela marque qu'il luy arriuera quelque choſe approchant du mariage, qu'il acquerra quelque authorité & entrera en poſſeſſion de quelque choſe qu'il n'auoit pas auparauant; ſ'il ne voit point la femme & que l'on ne la luy nomme point, cela ſignifie qu'il mourra, ou qu'il ſera tué & ira à Dieu comme martyr. S'il ſonge qu'il repudie ſa femme, il perdra le pouuoir qu'il a.

Quand quelqu'un ſonge qu'il coule du ſang de ſon corps ſans bleſſure, ou qu'il y a ſur ſon corps comme des ſources qui iettent du ſang & du pus, ſi ſon corps ou ſes habits en ſont enſanglantez & gaſtez, ou ſi quelque autre en eſt enſanglanté, il luy viendra des biens mal acquis à proportion de la quantité du ſang & du pus qu'il voit couler; que ſi ſon corps ny ſes habits n'en ſont point enſanglantez, ſa reputation

s'estendra à mesme proportion. S'il songe qu'il luy est venu quelque loupe ou apostume, ou vlcere, ou quelques clous & éleueures, il luy viendra de l'argent à proportion de la quantité du pus qui en sort & de leur nombre. Car tout ce qui augmente la masse du corps, soit graisse ou tumeur contre nature, marque de l'argent qui doit venir. La Larderie signifie aussi des richesses, mais en plus grande quantité, que que ne font les tumeurs contre nature, & d'une espece plus noble. Les taches du Corps signifient de l'argent & des habits. La Folie marque pareillement de l'argent, mais que l'on despensera mal à propos. Quand quelqu'un songe qu'il est yvre, cela signifie aussi de l'argent & de l'autorité, pourueu que ce soit d'auoir beu du vin. Quant à la diminution du corps, & la maigreur, & la foiblesse, tout cela n'est rien de bon. La force du Corps signifie augmentation de biens & de deuotion. Si quelqu'un songe qu'il

e charge d'un pesant fardeau, il luy doit arriuer quelque grand soucy.

Tout ce qui sort du ventre des hommes & des bestes du genre des excremens, signifie de l'argent. Que s'il sent fort mauuais, c'est de l'argent mal gagné; & tant moins il sent mauuais, tant moins l'argent est mal gagné. La Fiente des bestes, dont on mange la chair, marque de l'argent bien gagné. Si quelqu'un songe qu'il est gasté d'excremens luy ou ses habits, ou bien qu'il en a en sa possession, ou qu'il en ferre pour la conseruer, cela signifie du bien mal acquis qui luy doit venir. Si quelqu'un songe qu'il va à ses affaires, il perdra de son bien à proportion de ce qu'il iette d'excremens, ou bien il dira des choses de luy-mesme qui luy nuiront. Quand les excremens paroissent en grande abondance comme de la bouë ou de la pluye, ou comme vn torrent, ce n'est rien de bon, & quelquefois cela marque que quelque personne

puissante luy doit faire peur. S'il songe qu'il iette quelque autre chose que les excremens ordinaires, comme du sang ou des vers, ou des poux, ou du pus, & chose semblable, il perdra quelque chose de ce que doit signifier ce qui sort de son ventre, soit de son bien ou de ses seruiteurs, à proportion de la quantité. Si quelqu'un songe qu'il pete, il dira quelque sottise dont on se rira. Si quelqu'un songe qu'il luy sort du sang du derriere & qu'il en demeure en la rglanté, il luy viendra du bien mal acquis; & s'il n'en demeure point en sanglanté, il en perdra de mesme, à proportion de la quantité du sang. Si quelqu'un songe qu'il crache, il dira quelque chose qui sera rapporté à vn autre. Si quelqu'un songe qu'il touffe, il se plaindra de quelqu'un. Si quelqu'un songe qu'il crache apres auoir long-temps touffé, il se mettra en colere & dira de mauuaises choses, qu'il voudroit apres n'auoir pas dites. Le vomissement signifie peni-

tence & conuersion. Que si ce que l'on vomit, n'est pas de mauuaise odeur, ny de mauuais goust, ny de mauuaise couleur, l'on se repentira & corrigera de ses fautes de son propre mouuement; s'il est mauuais & corrompu, l'on fera de mauuais discours de soy-mesme, dont l'on receura du dommage. Si quelqu'un songe qu'on luy applique des ventouses, on luy fera faire quelque obligation par escrit, ou donner quelque assurance de sa promesse, si le Chirurgien luy est inconnu; s'il le connoist, il perdra quelque chose de son bien; & s'il n'a rien, la perte arriuera à quelque autre, suiuant le rapport de la partie à luy. Le saignement de nez signifie santé de corps; quelquefois aussi il signifie diminution de l'honneur & de l'authorité & du fonds du reuenu. La saignée marque du bien qui sortira de la possession de celuy que l'on saigne, pour passer en celle de quelqu'un qui a du pouuoir sur luy; que s'il reçoit le sang

dans vn plat, il sera malade, & despensera son bien à se faire traiter ; les autres disent qu'il despensera son bien à la poursuite d'une femme. Quand l'on songe que l'on est gasté de sang & d'excremens, & de tout ce qui sort du corps, tout cela signifie des biens acquis par de mauvaises voyes.

Nous adjoûterons icy quelques exemples qui conuiennent à ce Chapitre. Il vint, dit-on, vn homme consulter Mahomet fils de Sirin sur ce qu'il auoit songé qu'un de ses seruiteurs auoit la teste rasée, les autres disent coupée. La response fut que ce seruiteur sortiroit du pouuoir de son Maistre par affranchissement, ou par la mort de l'un des deux. Cela ne fut pas plus de cinq ou six iours à arriuer, car l'homme mourut dans ce temps là.

Vn autre vint consulter Gegafar le veritable, & luy dist qu'il auoit songé, qu'une femme luy rasoit la teste & la barbe. Ce songe n'est point bon, dit Gegafar. La femme

signifie l'année ; la teste & la barbe signifient les biens de l'homme, sa dignité, ses honneurs & tout ce dont Dieu l'a gratifié. Tu perdras tout cela, mais il t'en reuiendra d'autre tout de nouveau. C'est pourquoy remercie Dieu de ce que le poil t'a esté rasé & non arraché.

L'on raconte qu'une troupe de Bagdedois estant assis ensemble & s'entretenant sur les songes, l'un d'eux parla ainsi. Je vous en veux raconter vn admirable, qui m'est arriué à moy-mesme. Je songeay qu'un Chirurgien me rasoit la teste & la barbe, & me traitoit assez rudement, si bien qu'il me faisoit mal & douleur. Estant réueillé, ie fus trouuer Gegafar le veritable & luy exposay mon songe. Tu tomberas, me respondit-il, en vne mauuaise affaire, où tu perdras ce que tu as d'honneur & de bonne reputation parmy le monde, avec grande douleur. Je m'en retournay de chez luy fort triste, & demeuray dans ma maison quatre iours sans

en sortir. Apres cela estant fortý,
& passant pardeuant la porte de la
prison, i'auisay vn homme de ma
connoissance, que l'on en venoit de
tirer, despoüillé de ses habits &
prest à estre decapité. Cét homme
m'ayant apperceu, m'appella par
mon nom, hé vn tel. Que me veux-
tu, luy respondis-ie. Helas! dit-il,
c'est toy qui m'as ietté dans le pre-
cipice où ie suis; tasche de m'en
tirer, & rends les biens que ie t'ay
mis entre les mains & que i'ay
portez en ta maison. Dieu me gar-
de de tel malheur, respondis-ie;
par le vray Dieu tu ne m'as iamais
rien mis entre les mains. Quoy?
repliqua-t'il, ne t'ay-ie pas confié
telles & telles hardes, & telle &
telle monnoye? là-dessus l'on me
prist, l'on me mist en prison avec
luy, & puis à la question, & quoy
que ie n'eusse rien confessé, l'on
ne laissa pas de me donner trois
bastonnades; si bien que le bruit
se respendit par tout Bagded que
j'estois complice du voleur. Je de-

meuray en suite fort long-temps emprisonné, iusques à ce que le Chalife fit ouvrir les prisons en faueur de la naissance d'un fils, qu'il eut, si bien que ie sortis avec les autres. Je n'ay point veu d'interpretation de songe plus vraye que me fut celle-cy.

Vn autre vint consulter le fils de Sirin, & luy dit. Je suis fiancé avec vne femme, & depuis cela i'ay songé que ie voyois ma fiancée deuenüe comme vne petite naine Ethio-pienne. Va t'en, luy respondit le fils de Sirin, & te marie promptement avec elle. Sa noirceur signifie ses grandes richesses, & sa petitesse marque la briefueté de sa vie & l'accourcissement de ses iours. Cét homme suiuit son conseil, & sa femme mourut peu de iours apres son mariage, le laissant heritier de grand biens.

Vn autre luy dit qu'il auoit songé que son fils estoit deuenü noir. Ce fils, luy respondit-il, te ruintera & t'endebtera, mais en suite il payera

tes debtes, & te rendra ce que tu auras despensé pour luy. Car toute noirceur signifie richesse. Vostre responce est vraye, repliqua l'homme; car cela est desia arriué.



CHAPITRE X.

De l'explication des songes de mariage, de coït, des parties naturelles des femmes, de grossesse, d'accouchement & d'allaitement.

LE Mariage signifie grandeur & pouuoir & richesse, à proportion de la beauté de la femme que l'on a espousée ou que l'on entretient. Celuy qui a espousé vne femme morte, a entrepris vne affaire morte, c'est à dire, où il n'y a aucune esperance de reüssir. Si quelqu'un songe qu'il dépucelle vne fille, il luy viendra de l'honneur & du pouuoir dans l'année apres bien

de la peine à le poursuiure. Si quel-
 qu'un songe que sa semence sort
 sans qu'il ait affaire à vne femme
 ny qu'il en voye, il sera accusé d'a-
 uoir tué vn homme. Si quelqu'un
 songe qu'il saluë vn homme, il luy
 demandera vne femme à luy-mes-
 me, si c'est quelqu'un qu'il connois-
 se, pour luy-mesme ou pour son
 fils, ou pour quelque autre; & s'il
 luy rend le salut, il luy accordera la
 demande; s'il ne le luy rend point,
 il le refusera. Quelquefois celuy
 qui commence le salut, espousera la
 femme de l'autre. Si celuy que l'on
 saluë est vn inconnu, l'on se marie-
 ra en pais estrange. Si quelqu'un
 songe qu'un autre que luy a affaire
 à sa femme, il arriuera des biens &
 des richesses à ceux de la maison de
 sa femme. * * * * *

* * * * *

*La pudeur a retenu le Traducteur
 de rendre vne ou deux pages du Tex-
 te, que les chastes oreilles auroient
 plus de peine à souffrir.*


L'on raconte que Ragel fils de Saguide, vint trouver le fils de Sirin, & luy parla ainsi. J'ay eu vn songe qui me met fort en peine, mais i'ay honte de vous le raconter. Ecrivez-le sur vne fueille de papier, respondit le fils de Sirin. Il l'escrivit donc en ses termes. J'ay esté absent depuis trois mois, & ne suis de retour que depuis deux iours. Au dernier giste que i'ay fait, i'ay songé que i'estois arriué chez moy, & que ie voyois ma femme endormie, & deux belins qui s'entre-heurtoient sur ses parties naturelles, dont l'un avoit desia fait saigner l'autre. Ce songe m'a empesché d'aprocher d'elle depuis, quoy qu'en verité ie l'aime beaucoup. Le fils de Sirin ayant leu ce billet, leua les yeux vers luy, & luy dit. Ne faites pas ainsi, & que cela ne soit point cause que vous abandonniez vostre compagne; car elle est femme de bien & d'honneur. Ayant appris la nouvelle de vostre retour & que vous arriueriez dans peu de temps, elle

voulut arracher le poil de la partie que vous sçavez, par les moyens ordinaires. Mais elle ne püst en venir à bout, & s'ennuya de telle façon de faire, craignant que vous n'arriuassiez avant qu'elle eut acheué. Afin donc d'auoir plustost fait, elle eut recours aux ciseaux, avec lesquels elle se blessa si bien que la marque y est encore. Si vous en voulez auoir certaine preuue, allez tout de ce pas la trouuer, & elle vous la donnera. Il retourna donc vers sa femme, & voulut s'approcher d'elle; mais elle s'enfuit, disant que par le vray Dieu elle ne permettroit point qu'il la touchast, iusques à ce qu'il eut dit pourquoy il ne s'en estoit point mis en deuoit depuis son retour. Il luy raconta donc son songe, & l'explication que luy en auoit donné le fils de Sirin. A quoy elle respondit. Par le vray Dieu, le fils de Sirin vous a dit la verité, & en mesme temps luy prit la main & la porta sur la partie, où il trouua encore le coton attaché. Il

retourna voir le fils de Sirin pour luy en dire des nouvelles, & en louer & remercier Dieu avec luy.

Si quelqu'un songe qu'il est gros d'enfant, comme le pourroit estre vne femme, cela signifie augmentatiō de ses biens temporels. Quelquefois aussi la grossesse signifie la peur que l'on a de quelqu'un, suivant le mot qui se dit, *vn tel est gros de la peur qu'il a d'un tel*. Si quelqu'un songe qu'il est accouché, s'il songe que c'est d'une fille, il luy arriuera quelque grand bien & quelque grand soulagement; si c'est d'un fils, il luy arriuera du soucy & du desplaisir. Et de mesme si quelqu'un songe qu'il a achepté vne ieune fille, il luy arriuera beaucoup de bien & de soulagement; s'il songe qu'il a achepté vn ieune garçon, il luy arriuera du soucy & du desplaisir. Il en est de mesme quand quelqu'un songe que sa femme est accouchée, suivant ce que nous venons de dire. Quelques-uns disent que si l'on songe qu'elle est accouchée d'une

fille, elle accouchera d'un fils; & que si c'est d'un fils, elle accouchera d'une fille; mais que cela n'a lieu que quand elle est grosse. Si quelqu'un songe qu'il allaite ou qu'il est allaité, il sera emprisonné & enfermé. Dieu sur tout.



CHAPITRE XI.

De l'interpretation des songes de la mort & des morts, de leurs nouvelles, & de la conuersation que l'on a avec eux.

LA mort signifie perte de Foy & de deuotion, & grandeur & authorité mondaines, quand elle est accompagnée de pleurs, de lamentations & de cris, & que le mort paroist porté sur les espaules des hommes dans vne bierre ou cercueil, tant qu'il n'est pas encore mis en terre; que s'il paroist enterré, il n'y a plus d'esperance de
resta-

reftablir fa Foy, les grandeurs du monde l'ayant entierement gaigné. Le nombre donc des partifans de fa puiffance, fera grand à proportion de ceux qui fuivent fon Convoy; mais quoy qu'il y ait, il fera au deffus des autres honneurs, & comme porté fur leurs efpaules. Que fi quelqu'un songe qu'il eft luy-mefme mort, fans qu'il luy paroiffe pourtant rien des apanages ordinaires des morts, tels que font les pleurs, les cris, la lotion, l'enfeveliffement, & l'enleuement du Corps dans vne biere ou vn cercueil, il tombera quelque partie de fa maifon en ruine, ou quelque muraille, ou il fe rompra quelque poutre. Les autres difent que cela fignifie peu de feureté en fa Religion & aueuglement en fa vie. Si quelqu'un songe qu'il eft enterré fans eftre mort, il fera emprifonné & bien empesché de fes affaires. Si quelqu'un songe qu'il fait vne foffe pour vn mort, il fera bafir vne maifon dans ce lieu & pais-là.

Quant à ce qu'un mort rapporte de luy-mesme ou d'un autre, cela est vray & asseuré; car il est passé en la verité & sorty du mensonge, c'est pourquoy il ne dit rien de faux. Si donc quelqu'un songe qu'il voit un mort, & qu'il luy demande des nouvelles de quelque chose, & que le mort luy responde là dessus; la chose est comme il la luy dit, sans y rien adjouster ny diminuer. Que s'il luy dit qu'il est encore vivant, cela montre qu'il est en bon estat & heureux en l'autre monde; & de mesme quand on le voit en bon équipage ou habillé de blanc ou de vert, ou bien riant & ioyeux; au contraire si on le voit mal peigné & l'ale, ou couuert de vieux haillons ou pleurant, cela montre qu'il est en mauvais estat; & de mesme quand on le voit malade ou accablé d'affaires, c'est à dire qu'il est engagé pour ses pechez. Que si l'on voit un mort mourir vne seconde fois & estre pleuré, mais sans cris ny lamentations, quelqu'un de sa


maison se mariera, & il y aura ioye & réjouïſſance; s'il y a lamentations & cris & choſes ſemblables, il mourra quelqu'un de ſes deſcendants ou de ceux de ſa maiſon. Si quelqu'un ſonge qu'il deterre un mort, il ſuivra ſes veſtiges, ſoit en fait de Religion, ou dans les affaires du monde.

L'on raconte qu'Abuchenife, à qui Dieu faſſe paix, ſongea un iour qu'il eſtoit venu au Sepulchre du Prophete de Dieu, à qui Dieu faſſe paix & miſericorde, & qu'il le deterroit. Il rapporta ce ſonge à ſon Maïſtre, car il eſtoit encore ieune enfant; & ſon Maïſtre luy reſpondit ainſi. Mon mignon, voſtre ſonge ſe trouvera veritable. Car vous ſuivrez les pas du Prophe- te de Dieu, à qui Dieu faſſe paix & miſericorde, & reuelerez les myſte- res de ſa Loy. Abuchenife fit voir depuis ce que tout le monde ſçait.

Songer que l'on reçoit quelquechoſe d'un mort, eſt vne bonne choſe; mais ſonger qu'on luy donne quel-

que chose, en est vne mauuaise. Si donc quelqu'un songe qu'un mort luy donne quelque chose de ce qui peut seruir en ce monde, il luy viendra du bien & des commoditez d'un lieu d'où il n'en espere point; si au contraire le viuant donne au mort quelque chose de mesme, cela luy signifie du dommage en ses biens; si c'est vn habit dont le viuant ait coustume de se seruir, & que le mort s'en reueste, ou s'en vueille reuestir, le viuant mourra & ira ioindre le mort. Si quelqu'un songe qu'il porte vn mort, & que ce ne soit pas en forme de Conuoy, il acquerra du bien par des voyes defenduës; les autres disent qu'il portera la prouision d'un homme sans Religion; si c'est en forme de Conuoy funebre, il se mettra au seruice d'un grand & aura quelque Charge chez luy. Si quelqu'un songe qu'un mort se iette à son col ou l'embrasse, ou le baise, cela signifie longue vie pour le viuant. Si le viuant suit le mort

& entre avec luy dans vne maison inconnüe, il mourra & l'ira trouver. Si quelqu'un estant malade songe qu'un mort est entré chez luy, il sera long-temps malade & mourra à la fin. S'il songe que le mort se plaint de quelqu'un de ses membres, on luy demandera compte de quelqu'un à qui ce membre a du rapport. Si quelqu'un songe qu'un mort luy a pris un gasteau ou un anneau en cachete, son fils mourra.



CHAPITRE XII.

Des songes d'estofes & d'habits, de leurs différentes couleurs, de tapis, & choses semblables.

Les Habits s'interpretent diuerfement selon la diuerfité de leurs étofes & de leurs genres. Ce

qui s'y trouue de foye & de broderie signifie du pouuoir & de l'authorité & des biens mal acquis. Les Robes de Laine signifient abondance de biens & de deuotion. Et de mesme celles de poil de chevre ou de chameau. Le Coton signifie aussi des biens & de la Religion, mais au dessous de la laine; le lin signifie des biens au dessous du coton. Les Robes rayées comprennent les biens spirituels & les temporels. La Chemise signifie l'estat de l'homme, tant pour le spirituel que pour le temporel. Si donc elle est entiere, ferme, ample, neuue, les affaires de l'homme tant spirituelles que temporelles sont pareillement en bon estat; si elle est au contraire de tout cela, il en est de mesme de l'estat de ses affaires. Si quelqu'un songe que sa robe est usée, avec quelque autre mauvais signe dans le mesme songe, il mourra bien-tost. La saleté des habits n'est rien de bon pour celuy qui les porte, ni pour le spirituel ni pour le temporel. La saleté de la

Teste & des Cheueux, & de tout le Corps signifie du soucy & du des- plaisir. La Blancheur & la netteté des habits marquent le bon estat de celuy qui les porte. L'on dit aussi que la Robe, quand elle est usée, deschirée & sale, signifie pauvreté & indigence pour celuy qui la porte; quand elle est refaite de pieces apposées les vnes sur les autres, elle marque encore davantage de pauvreté, de nécessité, de soucy & de des- plaisir. Si quelqu'un songe qu'il est couuert d'une bonne calaque contre la pluye, il aura du bonheur en ce monde & en l'autre, & se verra élevé en pouvoir & autorité avec grande & bonne reputation. Le Turban signifie gouvernement, à proportion de ce que l'on en a la teste reuestüe; s'il est de soye, ce gouvernement ruintera la deuotion de celuy qui l'aura, & ce qu'il luy apportera de biens, sera mal acquis; s'il est de Coton ou de Lin ou de Laine, le gouvernement luy apportera du bien spirituel, &

temporel. Quant à sa Couleur, elle se doit interpreter comme celles des autres habits, dont nous parlerons en son lieu. Le Bonnet signifie le superieur de l'homme, soit son Pere, ou son Frere, ou son Roy, ou son Seigneur, si c'est quelqu'un qui soit en subjection, il sera donc en faueur auprès de son superieur à proportion de la beauté du bonnet; & s'il songe que le bonnet est déchiré, ou sale, ou poudreux, cela marque qu'il y est en mauuaise posture, & que son superieur luy-mesme est en soucy & desplaisir. La Robe Persienne signifie ioye & consolation pour celuy qui en est reuestu. La Robe de dessous signifie la femme de l'homme, & pareillement celle de dessus, & le haut de chausses, & la botte, & le soulier. Si donc quelqu'un songe que quelque vne de ces choses luy a esté ostée ou deschirée, ou coupée sur luy, il sera separé d'auec sa femme, soit par diuorce ou par mort; s'il songe qu'il l'a perduë, ou qu'elle luy a esté

dérobée, il viendra bien près d'estre separé d'avec sa femme, mais il ne le fera pas. Quelquefois aussi le Lit signifie quelque ieune fille, dont il iouit, & pareillement le haut de chausses, & ce qu'il voit arriuer à l'un ou à l'autre, doit arriuer à cette fille-là. Si quelqu'un songe que son soulier est tellement usé, qu'il n'en reste plus rien, sa femme mourra. Quelquefois aussi l'un des deux Souliers signifie un frere ou un compagnon. Si donc quelqu'un songe qu'on luy a osté un de ses souliers, & qu'il marche avec l'autre, cela signifie l'éloignement d'un frere ou d'une sœur, ou d'un compagnon. Le Chauffon signifie conseruation de biens. Si donc il paroist entier & sentant bon, celuy qui en songe, payera à Dieu ce qui luy est deû, & conseruera son bien par ce moyen en le purifiant, dont il sera bien recompensé; s'il paroist deschiré, ou usé, ou perdu, cét homme ne veut rien payer de ce qui est deû à Dieu, ny rien despenser en œuures pieu-

ses. La Botte signifie conseruation du moyen de viure de celuy qui s'en fert & de son gain ordinaire ; si donc elle paroist entiere, tout cela va bien. Quelquefois aussi la Botte signifie du soucy & de la tristesse. Si quelqu'un songe qu'il a sur luy vne robe deschirée & qu'il la recouft, il remettra ses affaires en bon estat, pour ce qui est de ses moyens de viure & de gagner du bien ; car les habits signifient l'estat des affaires de l'homme en ce que nous venons de dire ; que si c'est vn Iuge, il ramenera les meschans au bon chemin, & s'acquitera de sa charge. Si quelqu'un songe qu'il reuest les habits de sa femme ou qu'il les refait, il aura querelle avec elle, & luy cachera des choses qui seront conuës à ses domestiques & à ses proches. La Simarre de la femme, & son Couurechef, & son Capuchon, signifient son mary, & ce qui arriue à tout cela, doit arriuer à son mary. Filer, aux Hommes, signifie voyage. Si donc quelqu'un songe

qu'il file de la laine ou du poil, soit de chameau, ou de cheure, ou autre tel que les hommes ont coustume de filer, il fera voyage, & gagnera de l'argent par de bonnes voyes, qui luy profitera, & aura beaucoup de bien; si c'est quelque chose qu'il n'y ait ordinairement que les femmes qui filent, comme du coton & du lin, il fera voyage & gagnera du bien, mais par des voyes non approuvées parmy les hommes. Si c'est vne femme qui songe cecy, & qu'elle ait quelqu'un des siens en voyage, il reuiendra. Si elle songe qu'elle trouue vn fuseau, & qu'elle soit grosse, elle accouchera d'une fille; sinon il luy naistra vne sœur; s'il y a vne bossette au fuseau, sa fille ou sa sœur sera mariée. Si vne femme songe qu'elle est reuestuë d'un habit d'homme, c'est vne bonne chose pour elle; & si c'est vn habit de guerre, la significatiõ regarde son mary ou son seigneur. Si vn homme songe qu'il est reuestu d'un habit de femme, il

luy arriuera quelque grande peur & frayeur, dont il sera déliuré en suite.


Les Habits de Couleur s'interpretent diuerfement. Si quelqu'un songe qu'il est habillé de diuerfes couleurs, il entendra parler de quelque chose, dont la verité luy desplaira, & pour laquelle il sera diffamé parmy le monde. Le blanc dans les habits est bon vniuersellement. Le Iaune en general signifie maladie & tristesse pour celuy qui le porte; si c'est en vne robe de dessous, il ne luy arriuera point de mal. Le Vert est bon aux vians & aux morts, car c'est la couleur dont l'on est vestu en Paradis. Le Rouge signifie grande reputation pour celuy qui en est vestu. Le Noir est bon & signifie domination avec richesse & autorité particulièrement pour ceux qui ont coustume d'en estre vestus. Toute noirceur est bonne & loüable en toutes choses, horsinis au raisin.

Les Tapis, quand ils sont estendus, signifient des biens temporels pour celuy à qui ils appartiennent, c'est à dire à l'usage duquel ils sont estendus, & cela à proportion de ce qu'ils sont grands ou petits, espais ou minces, & de l'ornement dont ils sont releuez. Si donc ils sont grands & larges, ils marquent de grands biens temporels pour celuy à qui ils sont; s'ils sont petits & estroits, au contraire. S'ils sont espais & neufs, ils luy marquent longue vie; s'ils sont minces & vsez, au contraire. Si quelqu'un songe qu'il a vn Tapis grand, espais, neuf, il viura long-temps avec abondance de biens & bonheur en ce monde; si le tapis est petit & espais, il viura long-temps, mais avec peu de commoditez; s'il est mince plus qu'un tapis ne le peut estre, mais grand & ample, il aura beaucoup de biens en ce monde, mais il viura peu de temps. Si le Tapis est petit, vsez, & mince, ce n'est rien de bon,

& de mesme quand il est plié.

Les Napes & Seruiettes, & les Couffins & Oreillers, & choses semblables, tout cela signifie des seruiteurs & des seruantes, pour celuy à qui il est, & ce qu'il songe qu'il leur arriue, doit arriuer à ses seruiteurs, ou à ses seruantes. Les Rideaux en general signifient du soucy & du desplaisir bien grand pour celuy à qui ils sont, & non aucun bien, soit qu'ils soient bons ou mauuais, grands, ou petits. Dieu sur tout.





CHAPITRE XIII.

De l'explication des songes de pierreries, de ioyaux, d'or, d'argent, & de monnoye d'or, ou d'argent, ou d'airain.

LEs Pierres precieuses s'expliquent diuerfement, selon la diuerfité de leurs especes, & des choses qui paroissent avec elles. En general si le nombre des pierres precieuses, que l'on voit en songe, est connu, il marque des femmes & des enfans & des seruiteurs; s'il est grand & inconnu, il signifie lecture, & science, & benediction, & loüange. Si quelqu'un songe qu'il a trouué vne Perle seule, il trouuera vne belle femme, ou vne belle fille, ou vn beau garçon; & de mesme s'il songe qu'il a trouué vn Iacinte, ou vne grosse Perle, ou vne Esmeraude, ou chose sembla-

ble ; si la femme est grosse, elle accouchera d'une fille. Si quelqu'un songe qu'il porte un collier de Perles, il gardera le Livre de Dieu Tout-puissant & tout bon, & aura beaucoup de foy, de pieté, & de devotion, & bonne reputation dans le monde ; si le collier est triple ou quadruple, tout cela sera d'autant plus fort & plus excellent ; s'il songe qu'il ne le sçauroit porter ny mettre à son col, il est au rang de ceux qui ont beaucoup de science, mais qui ne sçauoient faire autant de bien qu'ils en sçauent. Si quelqu'un songe qu'il porte des pendans d'oreilles, il gardera pareillement l'Alcoran, & acquerra de la science, qui le rendra honorable parmy le monde. Un pendant d'Oreille, pour une femme, signifie son mary ; ceux qui se pendent au haut des oreilles ou au nez, marquent les enfans. Si quelqu'un songe qu'il luy sort des perles de la bouche, il parlera avec science & probité, & s'employera fort à lire l'Alcoran, ou à louer

Dieu. S'il songe qu'il mange des perles & qu'il les met dans sa bouche, il cachera la parole de Dieu dans son cœur, ou la science, ou la bonté, & ne la fera point paroistre au monde. Quelquefois aussi il arriue que les manger signifie les rechercher & les acquerir. Si quelqu'un songe qu'il seme des perles dans les chemins, dans les fumiers, & dans les lieux publics, il prodiguera sa science & l'employera auprès de gens qui en feront peu de cas. Le Collier signifie vne charge honorable. Si donc quelqu'un songe qu'il porte vn Collier d'or ou d'argent enrichy de pierreries ou de perles, il aura quelque charge & commission honorable. Quelquefois aussi les pierreries de grand prix, quand elles sont en grand nombre, & que l'on n'en sçait point le compte, signifient des meubles precieux que l'on acquerra, quand elles sont de celles que l'on tire des entrailles de la terre; quant aux coquillages, ils signifient des meubles

de peu de valeur ; quelquefois aussi ils signifient des discours & de la science qui ne sert de rien, & quand ils sont en petit nombre ils marquent des seruanes, filles, ou femmes, de peu d'importance.

Les Ioyaux, que les hommes ont coustume de porter, signifient de l'ornement, de l'honneur, & de la gloire pour les hommes à proportion de leur matiere & de leur façon. Si c'est vne ceinture enrichie, elle signifie du bien & de l'honneur qui rendra cét homme considerable dans le monde ; quelquefois aussi il aura quelque charge honorable, & cela luy arriuera vers la moitié de son aage. Si le ioyau est enrichy de pierreries, il luy arriuera des biens qui le rendront le premier de sa maison, ou bien il aura vn fils qui le fera. Plus il y a de ceintures au milieu de son corps, & plus il luy doit arriuer de bien & mieux asséuré. S'il songe qu'on luy a coupé sa ceinture, ou qu'on la luy a ostée, ou qu'il y est arriué quelque autre mal-

heur, cela doit arriuer à ce qui a du rapport à la ceinture. La Couronne, pour les hommes, signifie autorité, gloire, grandeur, & eminance en ce monde & non en l'autre. Si donc quelqu'un songe qu'il porte vne Couronne d'or ou d'argent, ou de pierreries, il luy arriuera quelque grand pouuoir, dans lequel il negligera ses biens spirituels. La Couronne de la femme, c'est son mary, & si elle n'est point mariée, elle le fera avec vn homme, soit de la Gageure ou de l'Arabie, élevé en biens & en honneur. Si quelqu'un songe qu'il a vn carcan au col, il luy sera donné quelque commission. L'anneau de l'Homme signifie ses possessions & ses biens, qui le rendent considerable dans le monde, son honneur & son autorité, & ce qui luy arriue, doit arriuer à tout cela. Si donc quelqu'un songe qu'on luy donne vn anneau, & qu'il s'en sert à cacheter, il aura & possedera quelque chose de cette sorte; quelquefois

aussi l'anneau marque vne femme, ou vn enfant, ou vne beste de charge, selon l'estat de celuy qui en songe; si c'est donc vn grand Seigneur, il viendra à bout de tout ce qu'il desire; si c'est vn Marchand, il viendra à bout des desseins qu'il a dans sa marchandise; & de mesme des autres hommes. S'il songe qu'on luy a osté son anneau de la main, il perdra ce qu'il possède; s'il songe qu'on le luy a dérobé ou qu'il l'a perdu, il luy arriuera quelque disgrâce dans ses possessions, & quelque difficulté en ses affaires. Le Chaton de l'anneau signifie l'ornement & la beauté de ses possessions. Si donc il songe que le chaton est perdu & que le reste de l'anneau luy demeure, il perdra le plus beau de ce qu'il possède. S'il songe au contraire que son anneau est rompu & que le chaton en est demeuré entier, il perdra ses biens, mais sa gloire & bonne reputation dans le monde luy demeurera. Les autres disent que le Chaton de l'anneau

signifie le fils qui sert d'ornement au pere. Si l'anneau est d'or, ce que l'homme possedera & gaignera, sera mal acquis ; s'il est d'argent, il viendra des femmes ; s'il est de fer, il viendra du Prince ; s'il est de cuiure ou d'estain, les possessions seront de peu de valeur & de peu d'importance. Tous les Ioyaux des femmes, quand c'est vn homme qui en est reuestu, ne sont rien de bon pour luy, hormis le collier, le parfum, & l'anneau. Si quelqu'un songe qu'il porte des brasselets, il luy arriuera quelque empeschement & quelque desplaisir dans l'exercice de son pouuoir ; s'il songe qu'il porte de pareils ioyaux aux iambes au dessus de la cheuille du pied, il luy arriuera de l'inquietude & de la crainte, ou bien il sera emprisonné & tué, ou chose semblable. Les ioyaux, dont on relie le haut des bras au dessus du Coude, signifiét affliction & desplaisir de la part de ses parens, & de ceux de qui l'on espere du support. L'argent


en tous ces Ioyaux signifie vn mal plus léger & dont on sera plustost déliuré. Les Ioyaux des femmes, pour elles mesmes, signifient du bien & de l'honneur & de la gloire en ce monde, & bon estat de leurs affaires, quand c'est de l'or ou de l'argent, ou des pierreries, horsmis ceux qui se mettent autour du bas de la iambe & les brasselets, car ceux-cy signifient leur mary; & pareillement la Couronne. Les autres disent que celle-cy signifie puissance & grandeur, & honneur pour leur supérieur, soit mary, ou pere, ou frere, ou autre semblable.

Les pieces de monnoye d'or, dont l'espece est inconnüe, & le nombre aussi, estant au dessus de quatre, signifient quelque desplaisir, & celuy qui en trouuera de cette sorte, entendra des discours sur ce qui le touche, ou sur ce qui touche celuy de qui il dépend, qui luy desplairont. De quelque maniere que ce soit, elles signifient mesconte & querelle; mais quand on les

connoist, la chose est plus facile. S'il n'y a qu'une piece d'or, ou que le nombre en soit au dessous de quatre, ce sont autant d'enfans. Si quelqu'un trouve quelque chose qui ait la forme de pieces de monnoye d'or, mais sans marque ny graueure, ce sont aussi des enfans. L'or fondu, & la Vaisselle d'or, signifient perte de quelque partie du bien de l'homme, ou sa disgrâce auprès de son Prince. Les Pieces de monnoye d'argent signifient diuerses choses, selon les diuerses natures de ceux qui en songent. Quelques-uns, quand ils ont songé en dormant, en trouvent quand ils sont éveillez. Les autres apres en auoir songé, trouvent dequoy bien subsister, mais avec querelle & dispute. Quelquefois l'Argent monnoyé signifie de bons & vertueux discours. La Monnoye d'argent noire & faulse, signifie des discours meschans & faux, & des querelles. Quand quelqu'un songe qu'il voit des pieces d'argent dans vne bour-

se ou dans vn noüet, & qu'on les luy donne ainsi, il luy sera confié vn secret, & il le gardera de mesme qu'il aura gardé cecy; s'il songe qu'il le renuoye à vn autre, il en fera de mesme du secret qui luy sera confié. Vne Piece de monnoye d'argent seule signifie vn enfant encore petit; si donc quelqu'un songe qu'il l'a perduë ou qu'elle luy a esté dérobée, son enfant mourra. Les Pieces de monnoye d'airain signifient médifance & raillerie pour celuy qui en reçoit. Elles signifient aussi vn viure mesquin & vn fonds de reuenue petit. La Vaisselle d'argent en songe vaut mieux que celle d'or, & signifie les femmes. Si quelqu'un songe qu'il trouue de l'or ou de l'argent en lingot, il trouuera vne belle femme, soit libre ou esclauë. S'il songe qu'il trouue vn lingot venant de sa miniere, il aura vne femme qui viëdra fraïchemēt du lieu où elle est née. Le Fer, l'Airain, l'Estain, tout cela nouvellement fondu & non encore mis en œuure, signifie du bien
qui

qui viendra des choses dont l'on se sert pour les necessitez de ce monde. Si quelqu'un songe qu'il fond de l'or ou de l'argent, ou de l'airain, ou de l'estain, il tombera dans la médisance du monde, qui parlera fort mal de luy en son absence.



CHAPITRE XIV.

De l'explication des songes de vaisseaux & d'utensiles.

Tous les Utensiles du meſnage ſignifient des valets & ſerviteurs, horsmis le reſchaut, & la marmite, & la broche, & le lampier, & la lampe. Car tout cela ſignifie le Maiftre de la maifon ou la Maiftreſſe. Ceux donc de qui le nom eſt maſculin & l'uſage commun à tous les domeſtiques, comme le lampier, & le reſchaut, & le poëſſon, & le chaudron, ſignifient le Maiftre; & ceux dont le nom eſt feminin, com-


me la marmite, & la table, & la lampe, & la chaudiere, signifient la femme. Ceux qui s'ont faits de cuiure ou d'estain, comme le bassin, & la tasse, & l'aiguere, & le coquemar, sont des valets & des seruiteurs. Le miroir, c'est la femme. Si donc quelqu'un songe qu'il se regarde dans le miroir, & que sa femme soit grosse, elle accouchera d'un fils qui luy ressemblera; si sa femme n'est point grosse, il sera despoüillé de sa charge & de son autorité. Si c'est vne femme qui songe qu'elle se voit dans vn miroir, & qu'elle soit grosse, elle accouchera d'une fille qui luy ressemblera; si elle n'est point grosse, son mary prendra encore vne autre femme, qui est celle qu'elle voit en mesme rang qu'elle. Si vn ieune enfant songe qu'il se voit dans vn miroir, sa mere accouchera d'un autre enfant, qui sera son frere & son pareil; & si c'est vne fille qui songe cela, sa mere accouchera d'une autre fille. Vne Aiguille signifie vne femme, à cause

du trou qu'elle porte, dans lequel l'on passe le fil, pourueu que l'on ne songe point que l'on s'en sert à coudre; que si quelqu'un songe qu'il s'en sert à coudre les habits des autres, elle signifie vn bon aduertissement qu'il leur donne, parce qu'il tasche, dit-on, de remettre leurs affaires en bon estat & de les racoustrer. Que s'il songe qu'il s'en sert à coudre ses propres habits ou ceux d'un autre, ou qu'il la voye enfilée, ses affaires se raccommo-deront & se remettront en bon estat, & tout ira bien pour luy. Que s'il l'employe à coudre les habits de sa femme, ce n'est rien de bon. S'il songe qu'elle se rougit, l'estat de ses affaires changera & elles iront mal. Le Peigne signifie assurance & ioye tout ensemble. Si quelqu'un songe qu'il se peigne la teste ou la barbe, le soucy & le desplaisir qu'il a, se dissipera promptement. Les autres disent que le peigne signifie la science, & celuy qui est vtile par ses discours & ses ordonnances.

comme vn Iuge, vn Iurifconsulte, vn Predicateur, vn Medecin. Les Ciseaux signifient adjonction d'une chose à vne autre pareille. Si donc quelqu'un songe qu'il a des ciseaux à la main, & qu'il ait vn fils, il luy en naistra encore vn; s'il a vn seruiteur, il en acquerra encore vn autre. S'il songe qu'il descend des ciseaux sur luy du Ciel, le fil de sa vie sera bien tost coupé. S'il songe qu'il tond du poil ou de la laine avec des forces, il amassera beaucoup de bien. Le Verre, de quelque sorte qu'il soit, signifie des femmes, soit bouteille, ou phiole, ou verre à boire. Quelquefois il signifie des seruiteurs & des seruantes.

Il vint vn iour vn homme consulter le fils de Sirin, & luy parla ainsi. J'ay songé que ie tenois en ma main vne coupe de verre pleine d'eau, & que la coupe s'estant cassée, l'eau est demeurée suspendue en l'air. As tu vne femme qui soit grosse, luy respondit le fils de Sirin. Oüy, dit l'homme. Elle

mourra en accouchant, repliqua le
fils de Sirin, mais l'enfant viura.
Cela arriua ainsi.



CHAPITRE XV.

*De l'interpretation des songes
d'armes, & de leurs di-
uerses especes.*

Toutes sortes d'Armes signi-
fient grandeur & authorité
pour celuy qui les porte, à propor-
tion de ce qu'elles sont bonnes, &
dégaisnées prestes à employer. Ce
qui leur arriue donc de bien ou de
mal, doit arriuer à l'authorité qu'il
possede. Si donc il songe qu'on luy
a osté ses armes, ou qu'on l'a con-
traint de les rendre, ou qu'il les a
iettées, ou qu'il les a données ou
venduës, ou qu'on les luy a déro-
bées, ou qu'elles se sont rompuës,
ou qu'il les a perduës ou égarées,
tout cela signifie diminution de son

autorité. S'il songe qu'il tient vne espée, ou vne pique, ou vn arc, ou vn baston, ou autre chose seruant à combattre, & qu'il ne se batte avec cela contre personne, cela signifie grandeur & puissance, qu'il aura; s'il se bat contre vn autre, cela signifie qu'il aura querelle avec quelques-vns. S'il songe qu'il frappe vn homme avec son espée, il exercera sa mesdisance contre luy. S'il tire des flesches contre luy, ce sont des discours qui seront portez plus loin, dans des Lettres ou libelles. S'il le blesse avec vne pique, le blessé pleurera pour quelque malheur qui arriuera à l'autre. Les coups de Canne ou de Verge, ou d'autres choses qui ployent, signifient des discours qui surprendront celuy qui est frapé, & qui luy causeront de la douleur & du desplaisir. Et de mesme quand quelqu'un songe qu'il est blessé par vn autre avec playe, il receura quelque dommage de celuy qui l'a blessé, & sera interessé en son honneur par ses mau-

uais discours, à proportion de la grandeur de la playe. Si quelqu'un songe qu'il a coupé la teste à vn autre, ou la main, ou le pied, ou quelque autre membre, en sorte qu'il soit separé du reste du corps, cela signifie vn mauuais discours, qui mettra dissention entre le blessé & celuy auquel ce membre a rapport. Si quelqu'un songe qu'on luy donne vne espée nuë. & qu'il la leue au dessus de sa teste sans dessein de frapper personne, il acquerra vne grande authorité avec bonne reputatiõ. Le Carmonien dit qu'une espée veüe en songe de cette sorte, signifie vn fils ou vn frere, & que si quelqu'un songe qu'on luy met vne espée à la main, & qu'elle se rompt dans le fourreau, il luy mourra vn enfant dans le ventre de la mere; & que si le fourreau est rompu & l'espée entiere, l'enfant viura & la mere mourra; & que s'il songe que la garde de l'espée est rompuë, son Pere luy mourra, ou son oncle, ou quelque autre tenant auprès de luy

rang de l'un des deux. Et de mesme tout ce qui arriue de bien ou de mal à la garde de l'espée, doit arriuer à quelqu'un d'eux. S'il songe que la poignée de l'espée est rompuë ou tombée, il luy mourra sa mere, ou sa grand' mere, ou sa tante, ou quelque autre femme tenant pareil rang auprès de luy. Si quelqu'un songe qu'il tient vne espée nuë en sa main, dit Gegafar le veritable, il querellera quelque autre. S'il frape de cette espée, & qu'il en sorte du sang, sans que ny celuy qui frape, ny celuy qui est frapé s'en trouuent ensanglantez, il querellera celuy qui est frapé pour vne chose où il fait mal, & Dieu l'en recompensera à proportion de la quantité du sang qui coule de la playe. Car le Sang signifie peché, quand il coule sans ensanglanter personne. S'il songe que le sang sortant de la playe ensanglante celuy qui l'a faite, il employera sa langue contre le blessé & aura de son bien par de mauuaises voyes. S'il songe qu'il porte

vne espée attachée au baudrier, il aura vne charge honorable à proportion de ce que l'espée est élevée de terre. S'il songe que l'espée traîne à terre à cause de la longueur du baudrier, il se trouuera incapable d'exercer cette charge, ou il ne pourra l'obtenir. S'il songe que l'espée se rejette sur luy, parce que le baudrier est trop court, cette charge sera au dessus de luy, & il n'aura point de contentement. S'il songe que le baudrier en est coupé, il perdra sa charge. S'il songe que son espée est roüillée, ses discours n'auront point de grace & ne seront point bien recens, selon ceux qui veulent que l'espée signifie le discours; mais selon ceux qui veulent qu'elle signifie vn fils, ce fils sera de peu de valeur & ne luy apportera aucun profit; & selon ceux qui luy font signifier vne charge, il en sera de mesme de la charge. Quand le fil de l'espée est perdu ou émoussé en sorte qu'elle ne coupe point, ce qu'elle signifie, sera inu-

tile, & de nul effet.

La Pique, si elle est accompagnée d'autres armes, signifie vne grande autorité, par laquelle l'on atteindra de loin à ses affaires; s'il n'y a point d'autres armes avec elle, l'on aura vn fils ou vn frere, si elle a vne pointe; & si elle n'en a point, l'on aura des filles autant qu'il se trouue de nœuds en la canne, dont elle est faite, si l'on en sçait le nombre. Ce qui arriue de bien ou de mal a la Pique, doit arriuer à ce qu'elle signifie.

L'on raconte d'Abuguemare le masson, qu'il vint vn iour consulter le fils de Sirin, & luy parla ainsi. J'ay songé que ie tenois en ma main vne pique faite d'vne canne. Y auoit-il vne pointe au bout? respondit le fils de Sirin. Non, dit-il. Par le vray Dieu, repliqua le fils de Sirin, s'il y eust eu vne pointe au bout, vous eussiez eu vn fils, mais vous n'aurez qu'vne fille. Apres cela s'estant tenu quelque temps en silence, il luy demanda. Sçaez-

vous combien il y auoit de nœuds en cette canne. Oüy, respondit l'autre, il y en auoit douze. Cette fille, dit le fils de Sirin, fera douze autres filles. Le Guebofe fils du Valide, dit Mahomet, fils de Iachi, raconta vn iour cette Histoire, & se prit a rire, puis adjousta ces mots. Dieu fasse misericorde au fils de Sirin, ie suis fils de l'vne de ces filles, & i'ay onze tantes de son costé, & pour grand pere Abuguemare.


L'Arc, quand la corde n'en est point ostée, signifie de l'authorité, que l'on aura, ou vn fils, ou vn frere. S'il est dans vn estuy, il signifie que la femme de celuy qui en songe, est grosse d'vn fils. Si quelqu'vn songe que son arc est rompu, c'est du malheur qui luy doit arriuer, ou en son pouuoir, ou en son fils, ou en son frere. S'il songe qu'il tire de l'arc, ses mandemens seront receus dans l'estenduë de son pouuoir à proportion de ce qu'il tirera loin & touchera à son but. Les autres disent, qu'il fera voyage &

qu'il en reuiendra en bonne disposition, pourueu que la corde de l'arc ne rompe point; si elle rompt, il demeurera au lieu où il veut aller en voyage, & quelquefois mesme il n'ira pas iusques-là. Si quelqu'un songe qu'il tire de la sarbacane, il mesdira de quelqu'un, & c'est un homme à fuir en toute maniere. Quelquefois tirer des Fleches signifie parler, soit que l'on dise vray ou faux, & ce que l'on dit, ira loin à proportion de ce que fait la fleche. Si quelqu'un songe qu'il polit un arc, il acquerra du pouuoir, ou il se mariera & aura un fils. Si quelqu'un songe qu'il tire à luy la corde d'un arc pour enuoyer la fleche, & qu'il ne la peut faire venir, ce que l'arc luy signifie, soit son autorité, ou son fils, ou son frere, luy sera difficile à manier & n'ira pas comme il le menera.

Le Couëteau, & la Fleche Arabe, & le Poignard, & la Halebarde, & tout autre ferrement offensif, est du nombre des armes & s'inter-

prete comme les autres armes. Quand l'on n'en voit qu'une piece à la fois, de quelque sorte qu'elle soit, elle signifie un fils ou un frere, comme la pique. Il en est de mesme de la faucille, & de la hache, & de la doloire, & des autres.

Toutes sortes d'armes defensives, comme la Cuirasse, & la Cotte de Mailles, & la Salade, & le Casque & l'Armet, & mesme le Drapeau, signifient seureté & protection, & deffense contre les ennemis & autorité & grande force, & pouuoir en ce monde, & gloire & honneur. Le Bouclier, s'il est accompagné d'autres armes, signifie defense & protection; s'il est seul, il signifie un homme sçauant & habile, qui conserue ses amis & les protege selon les occasions. Le Foüet signifie commission sur les biens sacrez, ou sur quelque chose de peu.



CHAPITRE XVI.

De l'interpretation des songes de Cheuaux, de Mulets, d'Asnes, & de leurs semblables.

LE Cheual signifie l'estat de l'homme, son pouuoir, sa gloire & sa grandeur ; ce qui paroist donc en luy d'augmentation ou de diminution, doit arriuer en tout cela. Si quelqu'un songe qu'il est monté sur vn Cheual dompté, qui le porte doucement, estant enharnaché comme il faut, il aura quelque grande authorité avec gloire & honneur. Et de mesme quand il songe qu'il a vn cheual, ou qu'il en fait prouision, ou qu'il l'équipe de ce qu'il luy faut, il acquerra du bien. La raison en est prise de ce que dit l'Apostre de Dieu, à qui Dieu fasse paix & misericorde ; *équipez vos Cheuaux, car leurs dos sont vostre*

gloire, & leurs ventres sont vostre threfor. S'il luy paroist quelque defaut dans l'équipage du Cheual, soit en la selle, ou en la bride, ou aux estriers, ou ailleurs, il s'en trouuera à mesme proportion en son autorité, en sa gloire, & en sa grandeur. Si son Cheual a vne queuë longue ou grande, sa suite le sera à proportion; si le Cheual à la queuë arrachée ou coupée, la suite du Maistre sera petite. Chaque membre du Cheual signifie quelque descendant de l'autorité de Maistre à proportion du rang qu'il tient entre les autres membres. Si quelqu'un songe que son Cheual luy resiste & ne se laisse pas conduire à sa volonté, ses subjets luy seront rebelles, & il aura quelque affaire espineuse à proportion de ce que le Cheual est fort & fougueux. Si c'est vn Cheual nud, l'affaire en sera plus laide & plus grande. Si quelqu'un songe qu'il est monté à Cheual en vn lieu où il ne se peut manier, comme sur vn mur, ou sur vn toit, ou sur le

haut d'une tour, ou en autre lieu semblable, sa gloire & sa grandeur deuiendrōt odieuses parmy le monde; ou bien selon l'autre interpretation, il se fera contre luy vne rebellion vilaine & honteuse, qui luy causera grande crainte & espouuante. Si quelqu'un songe que son Cheual s'enuole & le porte en l'air, ou bien seulement qu'il a des ailes, cela signifie de la gloire pour luy en ce monde ou en l'autre. Quelquefois aussi il fera voyage. Si quelqu'un songe qu'il voit des Cheuaux courans en troupe dans la Ville ou entre des maisons, cela signifie des torrens & de grandes playes. S'ils sont sellez, ils signifient des femmes qui s'assemblent pour quelque réjouissance ou pour vn mariage.

Quant aux couleurs des Cheuaux, si celui que l'on voit en songe, est meslé de blanc & de noir, l'on deuiendra celebre par le moyen de ce qu'il signifie; si il est noir, l'on aura des biens & de l'autorité par le mesme moyen. S'il est bay, il

signifie puissance & deuotion. S'il est jaune ou pasle, il signifie vne maladie legere avec de l'honneur. Le Blanc est de mesme que le meslé de blanc & de noir. Le Roux signifie meilleur succez qu'aucune autre couleur. Celuy qui est marqué de blanc au front & aux quatre pieds, est le meilleur de tous, en tout ce que nous auons dit. Si quelqu'un songe qu'un autre est à Cheual en croupe derriere luy, il parviendra par le moyen de cét homme-là à ce que le Cheual signifie.

Vne Caualle veüe en songe signifie vne femme. Si donc quelqu'un songe qu'il possède vne Caualle, ou qu'il est monté dessus & qu'elle est à luy, il aura vne femme noble & honorable. Si la Caualle est noire, la femme sera riche. Si elle est grisepommelée, la femme sera belle. Si elle est baye verdastre, la femme sera deuote. Si elle est baye noirastre, la femme aimera à ioüer & à chanter. Si elle est rousse luisante, la femme sera deuote & riche. Vn

Poullain signifie vn enfant. Tout ce qui arriue donc à la caualle, soit qu'elle meure ou qu'elle soit dérobée, ou perduë, doit arriuer à la femme.

Manger de la chair de Cheual, signifie richesse, grandeur, & bonne reputation. Si quelqu'un songe qu'il boit du lait d'une Caualle, il fera en faueur auprès de son Prince, & en bonne estime, & en receura de bonnes commoditez. Vn Cheual inconnu, que l'on ne tient point, & sur lequel l'on n'est point monté, signifie vn grand Seigneur; si donc on le voit entrer en quelque lieu ou en quelque maison, il y entrera vn grand Seigneur; & si on l'en voit sortir, il en sortira vn grand Seigneur; soit qu'il y meure ou qu'il en déloge.

Le Cheual Turc signifie la bonne auanture & bonne fortune de l'homme. Si donc il luy est obeissant, sa bonne fortune s'accommodera bien avec luy; sinon, elle l'abandonnera. Si quelqu'un songe qu'il est

monté sur vn Cheual Turc, & qu'il ait coustume de monter des Cheuaux d'Arabie, son rang & sa fortune rabbaissera ; s'il n'a coustume de monter que des Cheuaux de charge, sa réputation s'éleuera & sa fortune croistra. Les Iuments Turques ou de charge s'interprent comme les Caualles, & leurs couleurs de mesme, horsmis qu'elles signifient des femmes de la Gagee & non d'Arabie.

Le Mulet signifie vn homme qui ne tient aucun rang, comme vn esclau, vn bastard, vn enfant trouué. C'est aussi vn homme fort & robuste. Si donc quelqu'un songe qu'il est monté sur vn Mulet, & qu'il ait querelle contre quelque autre de cette sorte, il le vaincra & domptera, si c'est vn homme à qui tel songe arriue ; & si c'est vne femme, elle espoufera quelque homme de cette nature. Quelquefois aussi le Mulet signifie voyage. Si c'est vne Mule, elle signifie vne femme sterile, quand on songe que l'on est monté

dessus & qu'on la possède, & qu'elle est équipée comme il faut de selle, de bride, & du reste. Les couleurs des Mulets s'interpretent cōme celles des Cheuaux, suiuant ce que nous en auons dit. Quelquefois aussi la Mule signifie l'estat de l'homme, & son rang & sa charge, & ce qui luy paroist en elle d'augmentation ou de diminution, doit arriuer en cela. Les Chairs & les peaux de Mulet signifient des richesses, suiuant ce à quoy elles se rapportent. Si quelqu'un songe qu'il boit du lait de Mule, c'est vne mauuaise chose pour luy, & il luy arriuera de l'espouuaute & de la difficulté à proportion de ce qu'il en boit, & cela de la part de ce à quoy la mule se rapporte.


L'Asne signifie la bonne fortune de l'homme, son bonheur & sa bonne auanture, & il est meilleur à voir en songe que le cheual Turc. Ce que donc l'on songe voir en luy d'augmentation & de diminution, doit arriuer au bonheur & à la bon-

ne fortune de celuy qui le songe. L'Asnesse est en cecy comme l'asne, & plus auantageuse pour toute sorte de bien & de prosperité. Si quelqu'vn songe qu'il est monté sur vn Asne doux & obeyssant, la fortune commencera bien-tost à luy estre fauorable, & il amassera des richesses & des commoditez. Si l'Asne est noir, il luy viendra des biens & de l'authorité. Toutes les autres couleurs des Asnes sont comme celles des Cheuaux, suiuant ce que nous en auons dit, & il n'y a point de difference pour ce qui est de l'équiper, de le prendre, & de s'en mettre en possession. Les Asnes qui paroissent bien bastez & presque tuez de coups, sont plus auantageux & signifient plus de bien que les autres. Si quelqu'vn songe qu'il est monté sur vn Asne & qu'il chemine, & qu'en suite il tombe de dessus, il sortira de l'estat où il est, & quelquefois il mourra. Que s'il songe qu'il descend de dessus son Asne, comme l'on a coustume d'en

descendre, cela ne signifie aucun mal. S'il pense en luy. mesme qu'il ne remontera point dessus, il ne reviendra point en l'estat où il a esté. Si quelqu'un songe qu'il achete vn Asne, & qu'il le paye comptant en pieces d'argent ou d'or qu'il manie de ses propres mains, il luy arriuera du bien de quelque chose qu'il aura dite. S'il songe qu'il le paye comptant, mais sans voir l'argent ny le manier de ses mains, il luy arriuera du bien, & il reconnoistra celuy qui le luy aura fait, car le payement marque la reconnoissance de ce bienfait. S'il songe que son Asne a mal à l'œil ou qu'il est borgne, cela signifie quelque trouble dans sa vie. Si l'Asne est aveugle, il aura du bien, dont il ne pourra pas bien iouïr. S'il songe que son Asne est deuenu Mulet, sa fortune & ses biens seront en chemin ou entre les mains d'un homme de neant; s'il songe qu'il est deuenu Cheual, sa fortune dépendra d'un Prince ou d'un grand

Seigneur. Et de mesme s'il songe qu'il est changé en quelque autre animal, sa fortune dépendra de quelqu'un auquel cét animal a rapport. S'il songe que son Asne est affoibly, & ne peut porter quelque chose, cela signifie affoiblissement de sa fortune & diminution de son bonheur en ce monde. Si quelqu'un songe qu'il mange de la chair d'Asne, ou qu'il en a, ou qu'il en porte, ou qu'il égorge vn Asne pour le manger, il trouuera des biens precieux selon sa fortune & les acquerra. S'il songe qu'il boit du lait d'Asnesse, il aura vne grande maladie.





CHAPITRE XVII.

De l'interpretation des songes de Chameaux, de Bœufs, de Moutons, de Chevres, de leurs chairs & de leurs laits.

LE Chameau signifie quelquefois voyage, quelquefois tristesse, & quelquefois vn homme puissant, soit de l'Arabie ou de la Gageme, si le Chameau est grand & beau. Le Chameau femelle signifie vne femme, si elle paroist éloignée des autres Chameaux; sinon, elle signifie voyage comme le malle, ou possession des maisons ou de terre. Si quelqu'un songe qu'il est monté sur vn Chameau & qu'il chemine, il fera voyage; s'il songe qu'il ne fait que tourner, il luy arriuera affliction ou maladie dont en suite il sera guery. S'il songe qu'il combat vn Chameau, ou qu'il
le

le poursuit pour luy mal faire, il aura dispute contre vn ennemy; si le Chameau est grand & beau, cét ennemy sera vn homme de la Gageme. Si quelqu'vn songe qu'il a quantité de Chameaux qu'il chasse deuant luy ou qu'il possède, il aura quelque Prouince à gouverner. Si quelqu'vn songe qu'une troupe de Chameaux inconnus entre dans quelque terre, ou dans quelque lieu, ou dans quelque Ville, il entrera quelque ennemy dans ces mesmes lieux-là, & quelquefois ce sera vn torrent ou la peste, ou d'autres maladies. Que si ce lieu-là est de ceux qui agréent, comme s'il est planté d'oliviers ou semé de grains, la venue de cét ennemy ou de ce torrent, ou de ces maladies se terminera en bien & bonheur & benediction; si c'est vn lieu desagreable en son genre, la chose ira tout au contraire. La chair de Chameau signifie des biens de la nature de ce à quoy il se rapporte; quelques-vns disent que si quelqu'vn songe qu'il en mange,

il sera malade. Si quelqu'un songe qu'il trait vn Chameau femelle, il luy arriuera du bien par de bonnes voyes de la part d'une femme; s'il songe que ce qu'il tire de son pis, est autre chose que du lait, comme du sang ou du pus, ce bien sera mal acquis. Si quelqu'un songe qu'il boit du lait de Chameau, sans le traire luy-mesme, il luy viendra du bien de la part d'un homme puissant & de grande autorité. Le petit du Chameau femelle, signifie vn enfant. Si quelqu'un songe que son Chameau femelle est sorty de chez luy, ou qu'il l'a perdu, ou qu'on le luy a dérobbé, il sera separé d'avec sa femme.

Le Taureau veu en songe signifie vn homme puissant & ayant quelque Commission de la part du Prince, ou bien vn homme de pouuoir & d'autorité, quand il a des cornes; & quand il n'a point de cornes, il signifie vn homme pauvre, bas, & méprisable, que l'on a despoüillé de son bien. La Vache signifie l'année,

quelquefois aussi elle signifie vne femme. Si quelqu'un songe qu'il est monté sur vn Taureau ou qu'il le possède, il aura quelque Commission, d'où il luy viendra du bien, ou bien il sera employé avec autorité par quelqu'un des Commis du Prince & profitera de sa protection. S'il songe que le Taureau entre dans le lieu de sa demeure, ou qu'il y demeure enfermé, il conservera le bien qui luy viendra. Si le Taureau est chargé, il en signifie d'autant plus de bien. S'il songe qu'il possède plusieurs Taureaux, il aura Jurisdiction sur plusieurs Commis qui seront sous son pouuoir. S'il songe qu'un Taureau le heurte, il perdra sa Commission, & aura du desplaisir, à proportion de ce que le heurtement luy fera quitter de la place où il est; s'il ne quite point pour cela la place où il est, il aura du déplaisir en sa Commission, mais il ne la perdra pas. Les cornes du Taureau signifiēt la grandeur de l'homme, ses richesses, sa gloire, & ses

armes. Si c'est vne femme qui songe qu'elle est montée sur vn Taureau, elle aura vn mary tel que le Taureau signifie, si elle n'en a desia vn; & si elle est desia mariée, elle fera maistresse de son mary & le gourmandera. La Chair du Taureau signifie les biens du Commis; & la peau signifie la succession. Si quelqu'un songe qu'il esgorge vn Taureau & qu'il en partage la chair, le Commis mourra; si le Taureau n'est pas de ceux qui trauillent, il mourra vn homme riche & puissant en ce lieu-là, & ses biens seront partages. Si quelqu'un songe qu'il esgorge vn Taureau ou vn Veau qui n'a point encore trauillé, & qu'il en mange la chair, il tyrannifera vn homme & ioüyra de son bien sans qu'il meure; car cettuy-cy ne se doit pas interpreter comme celuy qui esgorge sans manger la chair. Les Taureaux inconnus, qui n'ont point de Maistres, quand ils entrēt en quelque lieu ou en quelque maison, signifient que ce lieu-là doit

estre affligé de maladies ou de peste; particulièrement quand ils sont de diuerses couleurs, ou qu'ils sont roux ou jaunes. Les Bœufs noirs signifient des années bonnes & fertiles à proportion de leur graisse, s'ils sont gros, ou bien mauuaises & infertiles s'ils sont maigres. Si quelqu'un voit en songe vne Vache grasse, elle signifie vne bonne année pour celuy qui la possède, ou pour les habitans du lieu où elle est. Les chairs de Vaches signifient les biens produits pendant telles années, & de meisme leurs peaux & leurs fientes. Si quelqu'un songe qu'il possède de leur fumier ou qu'il le balaye, il luy viendra de grands biens. Et de meisme le fumier des bestes de charge en general, signifie des richesses, mais l'on distingue si elles sont bien ou mal acquises, par leur odeur & par ce qui s'en trouue gasté; & pareillement celuy des autres animaux, & tout ce qui sort du ventre, si ce n'est qu'il soit en si grande quantité, que l'on se trouue

caché dedans ; car alors ce n'est rien de bon. Nous auons desia parlé de tout cela cy dessus. Le Beurre de la Vache & son lait, signifient des biens & des commoditez & des richesses pour celuy qui l'assemble & qui le possede. Si quelqu'un songe qu'il trait vne Vache & qu'il en boit le lait, il deuiendra riche, s'il est pauvre ; & s'il est riche, il le deuiendra encore plus ; & s'il est esclau, il sera affranchy & espousera sa Maistresse. Si l'on voit en songe vne Vache pleine, elle signifie esperance d'une année bonne & abondante ; & si elle veulle, elle signifie assurance de ce bien & de cette abondance.

Le Belier signifie vn homme puissant, de grande importance, & qui est fort consideré entre les hommes, riche, vaillant. Si donc quelqu'un songe qu'il trouue vn Belier ou qu'il le possede, il aura de l'authorité & des biens. S'il songe qu'il l'égorge sans intention d'en auoir la chair, qu'il le tuë, il surmontera

vn homme puissant & malaisé à vaincre. S'il songe qu'il l'escorche, il se saisira de son bien, ou il le luy fera perdre. S'il mange de la chair, il mangera son bien. S'il songe qu'il est monté dessus & qu'il le fait tourner où il veut, il obtiendra du bien de luy. S'il songe qu'il le porte sur son dos, il portera l'équipage d'un homme. S'il est monté sur le Belier, il viendra au dessus de l'homme, & le contraindra de faire ce qu'il voudra. S'il songe qu'il luy rompt les cornes, il le persecutera iusques à ce qu'il luy ait fait perdre sa force & sa defense. S'il songe qu'il possède vn troupeau de Beliers, il se rendra Maistre des principaux des hommes; & de mesme s'il songe qu'il les meine paistre. S'il songe qu'il esgorge vn Belier pour en dîner, cela signifie affranchissement d'un esclau, ou déliurance d'un prisonnier, ou guerison de maladie, ou payement de debte, ou richesse apres pauureté.

La Brebis signifie vne femme

d'honneur & de grande condition. Si donc quelqu'un songe qu'il trouve une Brebis, il trouvera une telle femme. S'il songe qu'il la trait, il luy viendra du bien d'une femme. S'il songe qu'il l'égorge pour en manger la chair, il obtiendra ce qu'il desire de cette femme. S'il l'égorge sans intention d'en manger la chair, il espousera une femme, & quelquefois une fille. S'il songe qu'il est sorty une Brebis de chez luy, ou qu'il l'a perdue, ou qu'elle luy a esté dérobée, c'est sa femme. Les Graisses de Brebis ou de Mouton, & leurs Chairs, & leurs Peaux, & leurs Laitès, & leurs Laines, & leurs fumiers, tout cela signifie des richesses & du butin pour celuy qui en obtient quelque chose. Le petit Agneau signifie un enfant, & si quelqu'un songe qu'on luy donne un petit agneau, il luy naistra un enfant. Si quelqu'un songe qu'il égorge un Agneau sans intention d'en manger la chair, il luy mourra un fils ou à quelqu'un de sa famille. Si

quelqu'un songe qu'il mange du Mouton bouilly, il aura dequoy viure à son aise. Si quelqu'un songe qu'il mange de la chair cruë & recente, ou qu'il en frappe un homme, il médira d'un homme en son absence & le calomniera. S'il songe qu'il mange du rosty, il aura dequoy viure, mais en tristesse. S'il songe qu'il entre dans sa maison vne Brebis escorchée, il mourra un homme en ce lieu-là; si ce n'est qu'un des membres de la brebis, il mourra celui auquel se rapporte ce membre; si c'est le pied & la cuisse de la brebis, il mourra quelqu'un de sa parenté; si c'en est un costé ou vne coste, il mourra-là vne femme; tout cela s'entend quand la chair est recente. Si quelqu'un songe qu'il meine paistre des brebis, il aura commandement sur les femmes.

Quant aux Chevres, le Bouc est de mesme que le Belier pour la dignité, & s'interprete tout de mesme en tout ce que nous auons dit. La Cheyre est aussi comme la Brebis

dans l'interpretatiō, horsmis qu'elle luy cede en dignité. Les autres disent que la Chevre est comme la Vache, mais moins digne. Le poil de Chevre est aussi comme la laine, & de mesme la peau & le lait de Chevre comme ceux de la Brebis, mais moindres en dignité. Pour ce qui est de la chair de Chevre, elle signifie maladie pour celuy qui songe qu'il en mange.

Le Boucher inconnu signifie l'ange de la mort. Si donc quelqu'un songe qu'il achete de la chair d'un Boucher & qu'il l'emporte chez luy, celuy à qui se rapporte le membre qu'il achete, se mettra en peril éminent de sa vie, duquel il sera pourtant déliuré en suite; que s'il la paye, il sera recompensé de cette aventure; s'il ne la paye pas, il sera trompé & frustré de sa recompense. Si quelqu'un songe qu'il est changé en Brebis, il luy arriuera du bien dans cette année-là. Toutes les parties internes de la brebis, comme le foye, la rate, le cœur, les

reins, la graisse, & les autres, signifient des biens cachez, qui seront mis au iour par celuy qui songe qu'il en mange, ou qu'il en a en sa possession sans en manger, & il n'y a point de differēce entre les cruës, les bouïllies, les rosties, & les fricassées. Il en est de mesme des parties de tous les animaux autres que la brebis, & les meilleures sont celles de l'homme. La Teste de Mouton & celle des autres animaux signifie longue vie pour celuy qui songe qu'il en mange. Elles signifient aussi des richesses & beaucoup de bien, & la meilleure de toutes, c'est celle de l'homme.





CHAPITRE XVIII.

De l'explication des songes de Bestes sauvages, bonnes à manger, comme Asnes, Bœufs, Boucs & Chevres, de leurs chairs & de leurs laits.

L Es Masses de toutes les bestes sauvages, signifient des hommes sans Religion, qui se sont separez de la congregation des Musulmans pour suiure leurs desirs, & cela quand l'on n'a point intention de leur faire la chasse. Si donc quelqu'un songe qu'il est monté sur un Asne sauvage, ou sur un Taureau, ou sur un Cerf, ou sur un Dain, ou qu'il le possède, ou qu'il l'a en son pouvoir, ou qu'il le va voir, ou qu'il approche de luy, sans intention de le prendre à la chasse, il ira trouver un homme sans Religion & l'aura en son pouvoir; & s'il le

combat, il aura prise avec vn homme de cette sorte, & celuy qui paroistra vainqueur, le sera en effet, à cause de la diuersité du genre & de l'espece des deux combatans; car quand ils sont tous deux de mesme espece entre tous les animaux, alors le vainqueur est le vaincu, suiuant ce que nous auons dit de la distinction de Gabdolle fils, de Zebire & de Gabdormelic fils de Meroüane. Que si l'on a intention de les prendre à la chasse, cela signifie des richesses & du bien pour celuy qui voit en songe quelque chose de cela, & alors il n'y a point de difference entre les males & les femelles. Les femelles des bestes sauuages, quand l'on n'a point intention de leur faire la chasse, signifient des femmes & des filles. Si donc quelqu'un songe qu'il a trouué vn Dain femelle, il trouuera vne belle fille, ou bien il se mariera avec vne belle femme. S'il songe qu'il l'égorge, il dépucellera vne fille. Et si il songe qu'il l'égorge par dessus le col,

ou par ailleurs que par le lieu ordinaire, il quittera les femelles pour les mâles. La Vache sauvage signifie aussi vne belle femme. Si donc quelqu'un songe qu'il a tué vn Daim femelle ou vne Vache sauvage sans chasse, il médiera de l'honneur d'une femme. S'il songe qu'il mange de la chair d'un Daim femelle ou d'une Vache sauvage, il luy viendra des richesses de la part d'une femme. Le Lievre signifie vne femme qui ne fait ny bien ny mal. Les Petits des bestes sauvages bonnes à manger signifient des enfans, & quelquefois des fils pour celuy qui en trouue quelques-uns. Si quelqu'un songe qu'il a des bestes sauvages en sa possession, ou seulement quelqu'une qui luy obéit & se laisse mener par où il veut, il aura le gouvernement de quelque nation semblable. Les Peaux des bestes sauvages, & leurs laits, & leurs graisses, & leurs entrailles, & toutes les autres parties signifient des biens de la sorte, à laquelle elles

se rapportent dans l'interpretation,
& du butin pour celuy qui en trou-
ue quelque chose.



CHAPITRE XIX.

*De l'explication des songes d'Ele-
phans, & de bestes de proye.*

L'Elephant signifie vn homme
constitué eu autorité, grand
& puissant par dessus les autres, &
qui est de la Gageme. Si donc quel-
qu'vn songe qu'il est monté sur vn
Elephant, ou qu'il l'a en sa posses-
sion, ou qu'il le chasse deuant luy,
ou qu'il s'en sert ailleurs qu'à la
guerre, il aura de l'autorité & du
pouuoir, & de la maistrise sur les
autres, ou bien il aura en sa puissan-
ce quelque Prince de la Gageme. Si
quelqu'vn songe qu'il mange de la
chair d'Elephant, il luy viendra des
biens de la part d'vn Prince à pro-
portion de ce qu'il en mange, & de

mesme s'il prend quelque chose de sa peau ou de ses os, ou de ses autres parties. Si quelqu'un songe qu'il est monté sur un Elephant & qu'il est à la guerre, ou bien si pendant qu'il veille il est dans le dessein d'aller à la guerre, la victoire sera pour ceux du party de l'Elephant.

L'on raconte qu'en vne assemblée des habitans de l'Isle de Sicile, leur Roy, ayant resolu de faire la guerre contre les Mussulmans, & desia mis de grandes troupes sur mer, il songea qu'il estoit monté sur un Elephant, avec quantité de Tambours & de Trompettes qui sonnoient deuant luy. Surquoy ayant fait venir ses Euesques & leur ayant exposé son songe, ils luy promirent aussi-tost victoire & bon succez de son dessein; & comme il voulut sçauoir d'eux la raison de cette interpretation, ils luy dirent que l'Elephant estant le plus grand & le plus puissant de tous les animaux de la terre, celuy qui estoit monté dessus, deuoit remporter la

victoire & demeurer le plus fort ; & que les Tambours & les Trompettes signifient ioye, réjoüyſſance, bonnes nouvelles, bon bruit, & publication de tout cela par tout le Royaume, puis que l'on ne les faisoit sonner que deuant les Roys dans les temps ioyeux. Le Roy les ayant entendu parler ainsi, trouua leurs raisons bonnes, & en suite les ayant fait retirer, il fit venir les Scribes des Iuifs, & leur exposa le mesme songe. Ils luy promirent pareillement bon succez & victoire. Ayant donc encore fait retirer ceux-cy, il manda enfin des Docteurs Mussulmans & leur conta encore son songe, & eux l'ayant oüy, prièrent vn vieillard d'entr'eux, qui estoit le plus sçauant, d'en donner l'interpretation. Il parla donc ainsi au Roy ; Sire, ie ne voy pas que ce dessein que vous auez pris, doie reüssir à vostre contentemēt. N'enuoyez point vos troupes plus loin, car si vous le faites, elles n'en reviendront point. Et ne me soupçon-

nez point de mauuaise intention dans l'interpretation que ie fais de vostre songe, car ie la prens du Liure de Dieu Tout-puissant & tout bon, lequel parle ainsi. *N'as-tu pas veu comme ton Seigneur a traité les gens de l'Elephant ?* Il luy leut en suite le reste du Chapitre iusques à la fin, où Dieu dit encore.

Et quand la Trompette sonnera, ce sera alors vne iournée difficile pour ceux qui ne veulent pas croire, & non pas facile. Le Roy respondit à cela. Si tu n'estois point suspect, ie pourrois escouter ce que tu dis. Apres cela, les ayant fait retirer, il commença à penser à ce qu'ils luy auoient dit, & à se refroidir du dessein qu'il auoit de mener ses troupes. Mais les Patriarches & les Prestres s'assemblerent chez luy, & le blasmerent des'estre ainsi refroidy de son dessein pour ce que luy auoit dit vn homme Mussulman, qui taschoit de l'empescher de faire la guerre contre ceux de sa Loy. Il reuint donc à leur opinion & en-

uoya son fils avec l'armée pour la commander. Les vaisseaux firent voile, & les flotes s'estant iointes, ils passerent en terre ferme. Mais il n'en reuint pas vn. Leur auanture ayant esté rapportée au Roy, il fit reuenir le vieillard qui luy auoit interpreté son songe, & luy fit du bien, & luy ordonna de demeurer auprès de sa personne & d'y garder l'Alcoran. Quelques-vns disent mesme qu'il fit profession de la Religion Mussulmane entre ses mains, mais en cachette. Cette Histoire est dans le Recueil des habitans de Sicile.

Le Carmonien dit que si quelqu'un songe qu'il est monté sur vn Elephant, en dormant pendant le iour, il repudiera sa femme.

Le Lyon signifie vn ennemy puissant & vn Prince fort vaillant. Si donc quelqu'un songe qu'il combat vn Lyon, il aura prise avec vn puissant ennemy. S'il songe qu'il est monté sur vn Lyon & qu'il le tourne comme il veut, il aura quelque grand pouuoir, & vaincra vn

puissant ennemy. S'il songe qu'il rencontre vn Lyon, & qu'il ne luy fait ny dit rien, quelque Prince ou homme de grande authorité luy fera peur, mais il ne luy fera point de mal. Si quelqu'un songe qu'il approche d'un Lyon, ou qu'un Lyon entre chez luy, cela se doit entendre d'un homme tel que i'ay dit. Si quelqu'un songe qu'il mange de la chair de Lyon, il luy viendra du bien de la part d'un Prince ou d'un homme puissant; & de mesme s'il songe qu'il en mäge quelque membre. La Peau de Lyon signifie la succession d'un homme de pouuoir & d'authorité. La Lyonne signifie la mesme chose que le Lyon. Si quelqu'un songe qu'il mange vne teste de Lyon, ou qu'il l'a en sa possession, ou qu'il la recueille, il luy viendra quelque grande authorité. S'il songe qu'il boit du lait de Lyonne, il luy viendra dequoy viure à son aise, avec victoire sur son ennemy.

Le Leopard signifie vn ennemy.

obstiné, qui hait beaucoup & se plaint beaucoup, dangereux & puissant; il est plus à craindre que le Lyon. Si donc quelqu'un songe qu'il combat un Leopard, il aura prise avec un homme de cette sorte. S'il songe qu'il est monté dessus, il aura de l'autorité & de la ioye, & de la reputation, ou bien il surmontera un homme de cette nature. Le Lait de Leopard signifie grande crainte pour celui qui songe qu'il en boit. Sa chair & ses os, & sa peau, & son poil, & toutes ses parties signifient des biens que l'on aura d'un ennemy tel que nous auons dit. Le Tigre s'interprete comme le Leopard. Le Loup ceruier signifie un ennemy facile & prest à se reconcilier. L'Ours signifie un ennemy qui a l'esprit imbecille & le cœur bas, ignorant comme il faut agir avec les hommes, quelquefois aussi il signifie un larron: & s'interprete comme les autres bestes de proye, horsmis que celui qui boit de son lait, doit bien-toft auoir

quelque malheur. L'Hyene signifie vne femme meschante & deshoneste, & se doit interpreter suiuant ce que nous auons dit, horsmis que celuy qui boit de son lait, sera trompé & trahy par sa femme. Si c'est vne Hyene masle, il signifie vn ennemy foible, abandonné, infame, & maudit. Le Loup signifie vn Prince tyran, ou bien vn homme de mauuaise vie, voleur, effronté menteur, querelleur. Quelquefois aussi il signifie vn plaideur qui poursuit l'autre en cette maniere. Il s'interprete aussi comme les autres bestes de proye, horsmis que celuy qui boit de son lait, doit auoir quelque peur & souffrir quelque dommage dans peu de temps, ou perdre vne femme. Le Renard s'interprete diuersement, quelquefois il signifie vn ennemy, quelquefois vne femme que l'on aime, quelquefois vn parent. L'interpretation s'en fait suiuant ce que nous auons dit, horsmis que celuy qui boit de son lait, doit auoir beaucoup de bien.

Car s'il est en soucy, il en sera déliuré; s'il est pauvre, il deuiendra riche. Le Blereau s'interprete comme le Renard. Le Chat signifie vn larron. Si donc quelqu'un songe qu'il voit entrer vn chat dans sa maison ou dans celle d'un autre, il y entrera vn larron; & s'il le voit en emporter quelque chose, il sera dérobé quelque chose dans cette maison-là. S'il songe qu'il tuë vn chat ou qu'il l'égorge, il vaincra vn larron. S'il songe que le Chat l'attaque & l'importune, il luy viendra bien-tost vne maladie; & si le chat est contraint de ceder, il sera bien-tost guery; si au contraire le chat le mord, sa maladie sera longue; le fils de Sirin dit qu'elle durera vn an entier. Le sauuage est pire que le domestique. La Bellette s'interprete comme le chat, hormis qu'elle est plus foible. Le Singe signifie vn ennemy maudit, qui abuse des graces que Dieu luy fait, & les corrompt par sa malice & sa desobeyssance. Il s'interprete com-

me les bestes de proye. Le Pourceau signifie vn homme fort & vaillant, mais de mauuais naturel & de mauuaife Religion, & tout ce que l'on prend de luy, comme sa chair, son poil, sa peau, & le reste, signifie des biens mal acquis. Si quelqu'un songe qu'il boit de son lait, il luy arriuera accident en son esprit & en ses biens.

Le Chien signifie vn ennemy, qui ne hait pas bien fort, & qui est disposé à la reconciliation, mais qui d'ailleurs a le cœur vil, & peu de misericorde. Si donc quelqu'un songe qu'un chien l'abbaye, il entendra des discours qui luy desplairont, de la part d'un homme de peu d'humanité. S'il songe qu'un Chien l'attaque ou le mord, il en receura de telles injures outre ses meschans discours. S'il le mord & qu'il luy deschire ses habits, il deschirera sa reputation, & luy fera du mal à proportion de ce qu'il deschire. S'il songe qu'il mange de la chair du Chien, il aura du bien de son ennemy,

my, & en fera le Maistre. S'il songe qu'il appelle vn Chien, ou qu'il a besoin de son aide en quelque chose, en ce cas-là le chien ne signifie pas vn ennemy, mais plustost vn homme qui luy aide à faire ces affaires. Le lait de Chienne signifie grande peur pour celuy qui en boit. Toutes les bestes de proye, qui ont des dents canines, signifiēt des hommes ennemis, à proportion de leurs forces, & se doiuent interpreter suiuant ce que nous auons dit.



CHAPITRE XX.

*De l'interpretation des songes de
Serpens, de Scorpions, &
d'autres insectes & bestes
venimeuses.*

LE Serpent signifie ordinairement vn ennemy caché, & dont la haine est grande, à proportion de ce qu'il paroist grand & hideux à

voir. Si donc quelqu'un songe qu'il combat un serpent, il aura prise avec un ennemy; & s'il surmonte le serpent, il surmontera son ennemy; s'il est vaincu par le serpent, il le sera par son ennemy. Si quelqu'un songe qu'un serpent le mord, son ennemy luy fera du mal à proportion de la morsure. S'il tuë le serpent, il aura victoire sur son ennemy; s'il le coupe par la moitié, il aura satisfaction entiere de la part de son ennemy. Si le serpent luy paroist avoir des pieds, l'ennemy qu'il represente, en sera d'autant plus fort & plus vaillant. S'il songe qu'il a peur d'un serpent, sans l'avoir veu, cela luy signifie seureté de la part de son ennemy; s'il l'a veu, son ennemy luy fera peur, mais il ne luy fera point de mal. La peur que l'on a, sans voir celuy que l'on craint, signifie tousiours seureté de sa part; mais quand on le voit, c'est signe qu'on le rencontrera. Si quelqu'un songe qu'il entre un Serpent chez luy, ou qu'il y

est ; il signifie vn ennemy du costé des femmes ou des parens ; s'il en sort, c'est vn ennemy éloigné. S'il songe qu'il sort vn serpent de ses pieds, ou de son nez, ou de son dos, il aura vn enfant pour ennemy. S'il songe que le serpent sort de son derriere, ou de son oreille, ou de son ventre, son ennemy est du nombre de ses seruiteurs & domestiques, & il sortira de chez luy. S'il songe qu'il a vn serpent en sa possession, lequel luy obeyt & dont il n'a point de peur, en ce cas-là il ne signifie pas vn ennemy, mais plutôt des possessions & des biens, qu'il aura, à proportion de la grandeur du serpent ; si le serpent est noir, il commandera des soldats ; s'il est blanc, c'est bonheur & bonne fortune. S'il songe qu'il possède vn serpent doux & benin & sans malice, il trouuera vn thresor de Roy.

Le Scorpion signifie vn ennemy dont l'on ne peut éuiter les artifices de la langue, avec laquelle il

picque ses ennemis & ses amis, n'ayant ny Religion ny parole. Si donc quelqu'un songe qu'un Scorpion l'a piqué, un ennemy médiera de luy en son absence & fera de mauuais discours contre luy. S'il tuë le scorpion, il vaincra cét ennemy-là. S'il songe qu'il tient un scorpion en sa main, & qu'il luy fait piquer les autres, il médiera d'eux en leur absence. S'il songe qu'il mangela chair du scorpion, il aura les biens de son ennemy. S'il songe qu'il est entré un scorpion dans son ventre ou dans sa maison, ou dans son lit, ou dans sa chemise, ou dans sa robe, il a avec luy un ennemy, qui rapporte aux autres ce qu'il dit, & qui le diffame & le descric, & qui se doit interpreter suiuant ce que nous auons dit.

Les Guespes & les Mouches, signifient les hommes de la plus basse & plus vile condition. Si donc quelqu'un songe qu'il y a quelques Guespes ou Mouches esmeuës contre luy, cela signifie que la canaille

& la lie du peuple luy fera ouïr de mauuais discours. La Mouche à miel signifie vn bon mefnager, homme d'honneur, grandement fauorisé du Ciel, & vtile à ceux de sa compagnie. Il se doit interpreter suivant ce que nous auons desia dit. La Punaise & le Taon signifient vn homme foible & mesprisable, comme aussi le Papillon qui se brusle à la chandelle. Quant aux Fourmis, si l'on songe que l'on en voit grand nombre dans vne maison ou dans quelque autre lieu, les habitans de ce lieu-là seront en grand nombre, & leur race & lignée multipliera beaucoup. Si quelqu'vn songe que les fourmis sortent d'vne maison ou d'vn village, ou d'vn autre lieu, ce lieu-là demeurera desert, soit par la mort de ses habitans, ou parce qu'ils iront s'habituer ailleurs. Les petites Fourmis s'interpretent comme les grosses, horsmis qu'elles marquent des hommes de moindre valeur. Les Sauterelles & les reptiles signifient des soldats qui se iette-

ront sur ce lieu-là & qui y feront du dégast à proportion de celuy que font ces animaux, quand on les voit courir comme des troupes & des armées, dans vn país déterminé, & dans vn lieu déterminé. Les Escarbots & les autres insectes ou vers immondes, signifient des hommes vils & abjets. L'araignée signifie vn homme deuot & craignant Dieu, scrupuleux, & faisant exactement son deuoir, s'estant depuis peu conuertty & mis dans la deuotion. La Chenille signifie tout le contraire de l'araignée, c'est à dire vn homme malitieux & qui ne fait que du mal au monde. La Souris signifie vne mauuaise femme & pleine d'hypocrisie. Il n'y a point de difference entre le masle & la femelle. Si quelqu'un songe qu'il en prend quelque vne, il aura vne femme de cette sorte.


Il vint vn iour vn homme consulter Mahomet fils de Sirin, & luy parla ainsi. I'ay songé que ie portois sur mon dos vn sac plein de ser-

pens & de scorpions. Vous estes vn homme, respondit le fils de Sirin, qui vous estes exposé à la haine des meschans, & qui l'avez attirée sur vous, & ils seront plus forts que vous. Ce que vous dites est vray, repliqua l'homme. I'ay esté commis par le Sultan sur les sacrez reuenus d'Arabie, & ie suis haï pour cela.

Vn autre luy parla ainsi. I'ay songé qu'il y auoit vn serpent dans ma maison, qui m'a mordu en la main, & dont la morsure m'a fait grande douleur. As-tu quelque frere ou quelque sœur? dist le fils de Sirin. Oüy, respondit l'autre. Il y a dans ta maison, repliqua le fils de Sirin, vn de vos proches parens, qui vous machine du mal, & qui vous fera grand dommage. Nous auons, dit l'homme, vn frere de mere, qui depuis trois iours s'est saisi de ce que nostre pere nous auoit laissé, & s'en est fuy.

Vn autre vint consulter Gegafar le veritable, & luy parla ainsi. I'ay

vne grande Coupe de verre, dans laquelle i'ay coustume de manger, & i'ay songé en dormant que ie voyois les fourmis dedans aller & venir. Auez-vous vne femme ? luy dit Gegafar. Oüy, respondit-il. Auez-vous vn valet ? dit encore Gegafar. Oüy, adjousta-t'il. Mettez-le hors de chez-vous, respondit Gegafar, car il ne vaut rien. L'homme s'en retourna chez luy tout triste, & sa femme luy ayant demandé le sujet de sa tristesse, il luy raconta ce que luy auoit dit Gegafar. A quoy vous resolez-vous là. dessus ? luy dit sa femme. Je suis resolu de vendre ce valet, respondit-il. Si vous le faites, repliqua-t'elle, ie feray diuorce avec vous. Le mary ne laissa pas pour cela de le vendre à vn Marchand de Syrie, mais aussitost que sa femme le sçeut, elle s'enfuit apres luy. Ses gens la poursuivirent iusques à Cherrane, où ils la trouuerent qu'elle auoit atteint le valet, & l'auoit desia rachepté & espousé.




CHAPITRE XXI.

Des songes d'animaux aquatiques.

L Es Poissons frais, grands & en grand nombre, signifient butin & richesse pour celuy qui en trouue ; mais les petits signifient des soucis & des desplaisirs, & ne produisent rien de bon. Quand il n'y a qu'un poisson frais ou deux, ils signifient vne ou deux femmes. Les chairs du Poisson frais, & sa graisse, & son escaille, signifient des richesses & du butin pour celuy qui en mange ou qui en possede. Le Poisson salé signifie du soucy & du desplaisir de la part d'un esclave ou d'un seruiteur. Le Crocodile signifie un ennemy traistre & trompeur, voleur & larron, dont ny ses amis, ny ses ennemis ne peuuent estre en asseurance. Sa chair & sa peau, &

ses os & ses membres signifient les biens d'un ennemy de cette sorte, & celuy qui en obtient quelque chose, aura des biens de cét ennemy à proportion. La Grenouille, quand il n'en paroist qu'une ou deux, signifie un homme deuot, diligent & laborieux en ce qui est de son deuoir; quand elles sont en troupes & en grand nombre, elles signifient les armées de Dieu Tout-puissant & tout bon, & ses chastimens; & si elles paroissent dans quelque pais, ou dans quelque lieu, ou dans quelque maison déterminée, le fleau de Dieu Tout-puissant & tout bon descendra sur les habitans de ce lieu-là. La Tortuë signifie un homme deuot, diligent & laborieux, de grande science & de grande action. Si donc quelqu'un songe qu'il trouue vne Tortuë, ou qu'il la possede, ou qu'il la fait entrer dans le lieu de sa demeure, il gaignera un homme de cette sorte, & il se trouuera quelque lieu qui les vnira ensemble; s'il songe qu'il en mange de la

chair, il profitera de son travail. S'il songe qu'il trouue vne Tortuë dans vn chemin ou sur vn fumier, il y a en ce lieu vn homme sçauant, dont la science ne profite à rien, & dont l'on ne connoist pas le merite; si elle est logée chez quelqu'un, la science est honorée & estimée en ce lieu-là. L'Escreuiffe signifie vn homme qui se tient grand & qui s'estime beaucoup, malaisé à contenter, qui ne parle pas volontiers, & qui traite ceux qui l'approchent de haut en bas. Elle se doit interpreter suiuant ce que nous auons dit. Tous les Animaux de Mer & de Riuiere s'interpretent à proportion de leur nature & de leur genre, & leurs qualitez se rapportent toutes aux Officiers des Roys & des Sultans, à proportion de leur pouuoir & de leur foiblesse.



CHAPITRE XXII.

*De l'explication des songes
d'oyseaux de proye, &
d'autres.*

LE Vautour & l'Aigle noire, & le Sacre, & le Faulcon blanc, & le Faulcon commun, & l'Espreuier & les autres oyseaux de proye, signifient puissance, grandeur & authorité. Si donc quelqu'un songe qu'il possède vn Vautour ou qu'il en trouue vn, ou que le Vautour luy est obeyssant, il acquerra du pouuoir & de la gloire, & de l'authorité, & aura vn Roy ou vn grand Prince en sa puissance. Si quelqu'un songe qu'il mange de sa chair, ou qu'il prend de ses plumes, ou de ses os, il aura des richesses & de l'authorité de la part d'un Roy ou d'un Sultan. S'il songe qu'un Vautour le porte & s'enuole avec

luy, si c'est de costé, il fera quelque voyage avec autorité & acquerra de l'honneur & de la gloire; si c'est en haut vers le col, il mourra en son voyage; car en ce cas-là le vautour est l'ouïe de la mort. L'Aigle noire signifie vn Prince injuste & tyran, mais vaillant & grand guerrier. Elle s'interprete comme le Vautour en tout ce que nous auons dit. Et de mesme le Faucon commun, & le Faucon blanc, & tous les autres oyseaux de proye, s'interpretent comme nous venons de dire. Le Milan signifie vn Prince de peu de reputation, qui est au pouuoir d'vn autre & qui luy obeit. Le Hibou signifie vn homme meschant, mais foible & abandonné de tout secours. Il en est de mesme de la Pie & du Pelican. Le Corbeau signifie vn homme menteur, qui n'a point de Religion. Le fils de Sirin dit que celuy qui songe en dormant pendant le iour, qu'il trouue vn Pelican, aura vne grande maladie. La Hupe signifie vn homme qui

sçait escrire & compter, intelligent & venerable, & qui sçait bien son monde. Les autres disent que la Hupe signifie vn Officier du Sultan qui luy fait sçauoir ce qui se passe & luy enseigne ce qui est de son deuoir dans l'administratiõ de son Royau-me. La Gruë signifie vn homme foible, estrange, & pauure. L'Austruche femelle signifie femme étrãgere Nomade. L'Austruche masse signifie vn Arabe Nomade. Le Coq signifie vn homme de la Gageme ou vn esclau; les autres disent qu'il signifie vn homme qui crie souuent & dont l'on entend continuellement la voix, comme celuy qui fait l'appel à la Priere, ou celuy qui fait des criées publiques, ou vn autre de mesme. La Poulle signifie vne honneste Dame. S'il y a grand nombre de Poulles, elles signifient de ieunes filles faineantes, ou des femmes assemblées pour quelque réjouissance, ou pour des nopces. La Francoline signifie vne femme trõpeuse, qui n'a ny foy, ny bonté au-

cune. La Rousane signifie vne femme qui ne fait que iouier & folastrer. Le Perroquet signifie vn enfant orphelin, fils ou fille. Le Paon masse signifie vn homme de la Gageme riche, splendide, eleué. La Colombe signifie vne femme, & quelquefois c'est la femme ou la fille de ce luy qui en songe. S'il paroist grand nombre de Pigeons, ce sont des enfans & descendans. Le Paon femelle signifie vne femme de la Gageme belle & splendide. La Perdrix mâle signifie vn fils meschant & maudit. Le Pigeon ramier signifie vne femme qui a peu de pudeur & de Religion. Tous ces Oyseaux s'interpretent de mesme maniere. Si donc quelqu'un songe qu'il en a quelqu'un en sa possession, ou qu'il en trouue quelqu'un, il aura vne femme de cette sorte. S'il en mange de la chair ou en trouue de la plume ou des œufs, il luy viendra du bien de la part de cette femme-là. S'il luy coupe la gorge, il dépu-cellera vne fille. S'il tasche de la

prendre avec vn filet ou avec vn piege, il tafchera de tromper cette fille. S'il tafche de la fraper à coups de fefches, ou à coups de pierre, il dira des injures à vne femme. Le Roffignol fignifie vn ieune homme fauorifé du Ciel & heureux. L'Alouïete fignifie vn petit enfant. Le Passereau fignifie vn homme puiffant & releué; la femelle fignifie vne femme de mefme, horsmis qu'il y a en elle de la mauuaife fortune, & qu'elle porte malheur. Quand les Passereaux font en grand nombre, & que celuy qui en fonge les prend par maniere de chaffe, ils fignifient des biens & du butin. Il en eft de mefme de tous les oyfeaux, dont nous auons parlé cy deuant; car quand l'on en prend grand nombre à la chaffe, ils fignifient du bien & du butin. Le Gazoüillement des Passereaux fignifie que l'on entendra dire du bien de foy-mefme. La Chauuefoufis fignifie vn homme deuot, diligent, vertueux. L'Estourneau fignifie vn homme qui fe leue

matin pour marcher, & qui est toujours sur les chemins, comme vn Messager & vn meneur de Chameaux. Le Sorad est le guide d'Adam, à qui Dieu fasse paix, & il signifie droiture & bonne conduite pour celuy qui le voit en songe. Les Oyseaux aquatiques signifient les Officiers du Prince & ses seruiteurs, quand ils paroissent dás l'eau; mais quand ils paroissent sur la terre, ils signifient abondance de biens. Leur mort ne signifie rien de bon, car ce n'est que du desplaisir. Les Oyseaux inconnus, dont l'on ne sçait point l'espece, signifient des Anges, & les songes que l'on en a, s'interpretent comme ceux que l'on a des Anges, dont nous auons parlé cy-deuant. Les Oeuks inconnus signifient de belles femmes, quand l'on songe que l'on en a en sa possession, & que l'on en recueille, sans les manger; si l'on songe que l'on en mange, ils signifient du bien & dequoy viure, & bien acquis, quand ils paroissent bouillis ou rostis; mais si

l'ou songe qu'on les mange tous crus, l'on aura du bien mal acquis. Si quelqu'un songe qu'il mange des escailles d'œufs, ou des blancs d'œufs, sans le jaune, il aura la despoüille d'un mort, soit tué ou autrement, & quelquefois ce sera un deserteur & voleur de morts.

L'on raconte qu'un homme vint un iour consulter le fils de Sirin, & parla ainsi. J'ay songé que ie voyois sur le haut de la Mosquée de la Medine vne Colombe blanche, dont j'admirois la beauté, & qu'il est venu un Sacre qui l'a enleuée. Si vostre songe est veritable, respondit le fils de Sirin, le Chagege espousera la fille de Gabdole fils de Gegafar le volant. Cela arriua dans peu de temps, & on luy en parla ainsi en suite. Dites-nous de grace, Abugabdolle, comment auez vous trouué cela dans ce songe ? la Colombe, respondit-il, signifie vne femme ; & sa blancheur signifie l'excellence de sa beauté ; & le haut de la Mosquée sa noblesse. Or est-il

que ie n'ay trouué dans la Medine aucune femme dont la beauté fut plus excellente, ny la noblesse plus releuée que celle de la fille de Gabdolle fils de Gegafar. I'ay considéré en suite le Sacre, qui signifie vn Prince iuste & tyran, & ie n'ay trouué aucun Prince qui fut plus Sacre que le Chagege fils de Ioseph.

*Voyez la
cruauté
du
Chage-
ge dans
le Ma-
cine en
l'an 95.
E 82.
E 71,*

Vn autre vint vers le mesme, & luy parla ainsi. I'ay songé que ie voyois vn gros oyseau que ie ne cognoissois point, qui descendoit du Ciel, & qui fut ietté sur vn arbre, dont il commença à cueillir les fleurs, puis il s'enuola. La couleur changea là-dessus au fils de Sirin, & il parla ainsi. Cela signifie la mort des Docteurs. En effet il mourut la mesme année le Chafam de la Bosre & le fils de Sirin luy-mesme.

L'on raconte d'Omar fils du Chettabe, Dieu luy fasse paix, qu'un iour il parla ainsi. I'ay songé que ie voyois vn Coq qui m'a donné deux ou trois coups de bec, & ie croy que

Voyez
la mort
d'Omar
dans le
Macine
en l'an
23.

ce songe me prédit que ie seray tué par vn homme de la Gageme. En effet il fut frapé & tué quatre iours apres par cét homme de la Gageme qui s'estoit rendu Arabe.


Il en vint vn autre consulter le fils de Sirin, & luy parla ainsi. Que direz-vous d'un homme qui a songé qu'il cassoit des œufs & qu'il en prenoit le blanc, laissant le jaune? dites à cét homme-là, répondit le fils de Sirin qu'il me vienne trouver & qu'il me consulte luy-mesme. Je luy feray le rapport de vostre interpretation, repliqua l'autre. Je n'en feray rien, dit le fils de Sirin. En suite de cela cét homme le reuint trouver à diuerses fois, luy disant tousiours la mesme chose, & il luy faisoit tousiours mesme responce. Enfin il auoüa que ç'auoit esté luy-mesme qui auoit songé cela. Iurez-moy que ç'a esté vous mesme, dit le fils de Sirin. L'homme iura, & le fils de Sirin dit à ceux qui estoient autour de luy. Saisissez-vous de cét homme-là, & le

menez deuant le Magistrat, car c'est vn deterreur & despoüilleur de morts. Pardonnez-moy, dit l'homme, ie vous promets que ie n'y retourneray plus.

Vn autre vint encore trouuer le fils de Sirin, & luy parla ainsi. I'ay songé que i'auois pris vn de ces oyseaux que l'on appelle Taitaua, pour l'égorger, & que luy ayant mis le coüteau sur la gorge par trois fois sans en auoir peu venir à bout, ie l'ay égorgé à la quatriesme fois. Ce songe ne signifie rien que de bon, respondit le fils de Sirin. Car cét oiseau represente vne pucelle, que vous embraserez trois fois sans luy pouuoir oster son pucelage, mais à la quatriesme vous l'aurez. Vous dites la rité, respondit l'autre, car cela m'est desia arriué depuis cinq iours. En suite de cecy le fils de Sirin se prit à soufrire, & fut quelque temps sans parler, puis s'adressant à celuy qui auoit conté le songe, approchez-vous de moy, luy dit-

* Ce mot
peut si-
gnifier
contra-
he te, in-
clina te,
& cesy
s'expli-
que com-
me le
Vers de
Martia-
le, incli-
nabat
hylan
posito
Tiry-
thius
arou.

il ; & l'autre s'estant approché, il reste encore, adjousta-t'il, quelque autre chose dans le songe. Et qui est-elle ? respondit l'homme. c'est, dit le fils de Sirin, qu'il y auoit là vne beauté, qui prenoit la place de la pucelle. Vous dites vray, respondit l'autre, mais comment sçauuez vous cela ? n'entendez-vous pas, repliqua le fils de Sirin, le nom de l'oyseau, * *Taita-na*. A ce mot l'autre eut honte, & se tourna de l'autre costé.



CHAPITRE XXIII.

Des songes de Mestiers, Arts, & passetemps.

LE Peseur & le Mesureur signifient le Iuge, quand ils sont inconnus. Si donc l'on voit en songe l'vn ou l'autre outrepasser le poids ou la mesure, cela signifie que le Iuge est injuste dans ses iugemens ;

s'ils font l'un & l'autre exactement leur deuoir, le Iuge est iuste en ce qu'il iuge. Si quelqu'un songe qu'il deuient peseur ou mesureur, il sera Iuge. Le Iuge inconnu signifie Dieu Tout-puissant. Le Medecin signifie le Prestre, & pareillement l'Apoticaire. Le Banquier signifie un homme sçauant, qui ne sert de rien sinon pour les affaires de ce monde. Le Marchand de soye signifie un homme élevé en dignité dans le monde. Le Tisserand signifie un sage Poëte. Le tueur de Chameaux signifie un poëte médisant. Le Tailleur d'habits signifie un homme qui donne sa part de Paradis, pour auoir ce qu'il pretend en ce monde, & par l'entremise duquel se font les affaires temporelles. Le Fripier signifie un plaideur ou querelleur. Le Pelletier signifie un homme riche, & qui gagne par des voyes permises. Le Cordonnier signifie un faiseur de mariages ou un maquereau. Le Couretier signifie un homme qui met la discorde entre les voisins &

entre les autres. Le Chaudronnier signifie celuy qui rapporte au Prince tout ce qui se passe. Le Charpentier signifie vn homme qui se rend Maistre des autres. Le Forgeon signifie vn homme de pouuoir & d'autorité. Le Fondeur de cuiure signifie vn homme qui donne le bien pour le mal. Le Foullon signifie vn homme qui presche les autres & les fait repentir de leurs pechez. Le Charcuitier & le Rotisseur signifient vn homme qui parle beaucoup en cherchant de quoy viure, & qui gagne beaucoup de bié. Le Boucher inconnu signifie l'Ange de la mort; si on le connoist, il signifie vn homme diligent en la recherche des biens de ce monde. Le Saulnier signifie vn homme entendu à faire la Cour aux Rois & aux Princes. Le Teinturier signifie vn homme menteur & trompeur, & qui ne procede pas comme il faut en ses affaires. Le Chirurgien signifie vn Greffier, & le Greffier signifie vn Chirurgien. Le Cardeur de cotton
signifie

signifie vn homme qui dit la verité & qui agit franchement, qui distingue le bien d'avec le mal, & le permis d'avec le defendu. Le Musnier signifie vn homme qui trompe finement ou vn portefaix. L'Ésmouleur signifie vn homme qui a beaucoup de parens & d'amis. Le Sellier signifie vn homme qui met la paix entre le mary & la femme. L'Orfevre signifie vn homme plein de vanité, d'hypocrisie & de mensonge. Le Jardinier signifie vn homme intelligent dans les discours des hommes, qui connoist leurs raisons, & qui a beaucoup d'esprit & de iugement. Le Bateur de monnoye signifie vn homme qui suscite des procez & des querelles entre les hommes. Le Megissier signifie vn homme qui a entre ses mains du bien d'autrui. Le Barbier signifie vn homme riche, qui fait du mal aux vns & du bien aux autres. Le faiseur de Boucliers signifie vn homme qui conserue & garde les autres. Les vendeurs de Cruches, de Pots,

de Verres, de Chaudieres, & de Paniers, tous ces gens-là signifient des Marchands de filles, parce que tout cela en matiere de songes s'interprete du feminin. Le Maistre d'Escole signifie vn homme excellent en science, ou vn Conseiller du Prince. Si quelqu'un songe qu'il est à l'escole avec les enfans, il viura long-temps & reuiendra en enfance. Le Fourbisseur signifie vn homme de grand pouuoir & de grande authorité. Le Faiseur de Cottes de Mailles signifie vn voyageur. Le Laboureur signifie vn homme de grande posterité, qui a vne belle lignée & grand nombre d'enfans, mais qui a bien de la peine à viure. Le Medecin de bestes signifie vn maquereau. L'Astrologue, le Deuin, & l'Enchanteur signifient vn menteur, mais fauory du Prince. Le Lecteur de l'Alcoran sur les malades, & le Donneur de caracteres pour la guerison des maladies, signifient vn homme qui trompe les autres par ses beaux

discours & ses douces paroles. Le Berger & le Palefrenier, & le gouverneur de Chameaux & le meneur d'Ours & le Fauconnier, tous ces gens-là signifient des hommes commis sur les affaires des autres. Le Poissonnier & le Tripier, qui vend les testes des animaux, signifient des hommes qui ont en leur puissance les testes des autres, & qui sont de grande autorité. Le Peintre ou Sculpteur signifie vn homme qui ment contre Dieu Tout-puissant. L'Huillier signifie vn homme qui se farde deuant ceux avec qui il conuerse, & à qui il a affaire, & qui les trompe par ses artifices. Le Deterreur de morts, si c'est vn homme craignant Dieu, signifie vn homme qui approfondit les affaires & les sciences; sinon, il signifie vn homme qui cherche à tromper les autres. Le Fossoyeur, & le faiseur de fosses pour les morts, signifient vn homme rusé dans les affaires du monde, & trompeur; si ce n'est qu'il fossoye pour détour-


ner l'eau ; car alors il signifie vn threfor pour celuy qui l'employe. L'Abbateur de bois signifie vn calomniateur & vn médifant. Le Fardeur signifie vn homme fort riche, mais qui a acquis fon bien par de mauuaises voyes. Le Danfeur signifie vn homme celebre par ses auantures. Le Lapidaire & le Marchand de perles signifie vn homme de science & de probité, ou qui poffede plusieurs ieunes garçons, & plusieurs ieunes filles. Le Porteur d'eau signifie vn homme de bien & craignant Dieu, & qui fait de bonnes œuures parmy les hommes, quand c'est aux autres qu'il porte l'eau ; mais s'il la prend pour luy-mefme, il amaffera du bien ; car l'eau quand on la refertue en vn lieu, signifie du bien amaffé. Le Portier signifie vn homme de pouuoir & d'authorité. Celuy qui vend de vieux habits signifie vn homme qui fort de foucy & de desplair ; & celuy qui en achepste signifie vn homme qui y entre. Car les vieux

habits signifient du soucy & du des-
plaisir pour celuy qui en est couuert
ou qui en trouue.

Pour ce qui est des instrumens de
recreation, le Tambour de Basque,
& la Fluste, & le Tambour com-
mun, & la Danse, signifient vn
grand accident. Le Tambour com-
mun, quand il est seul, signifie vn
faux bruit. Les Cymbales signi-
fient vn discours faux & qui ne
laisse pas quelquefois d'estre creu.
Le Sifflet & la Corne signifient de
mauuaises nouvelles. La Guitarre
signifie le monde & sa vanité, &
les paroles inutiles; car ses cordes
font du bruit, comme si elles par-
loient, & cependant elles ne par-
lent point; si ce n'est pourtant
que celuy qui en songe soit hom-
me de bien & craignant Dieu; car
alors elle signifie paix & accord. Si
donc quelqu'un songe qu'il iouë
de la Guitarre, il sera tenu pour
auoir dit des choses vaines, & fait
peur sans sujet. Le Luth signifie de
mauuaises nouvelles venuës de di-

uers lieux. La Trompette signifie des nouvelles de la part du Prince, qui se diuulgueront & publiront. Il en est de mesme du Tambour, quand on le bat au marché ou dans la grande ruë. La Musique signifie la mort d'un homme ou quelque accident qui doit arriuer. Il en est de mesme de la danse. Tous les Artisans de ces Mestiers & Arts signifient des hommes, suiuant ce que nous venons de dire. Si donc quelqu'un songe qu'il est deuenu un de ces artisans, ou qu'il a affaire à quelqu'un d'eux, ou qu'il le faluë, ou qu'il reçoit de luy quelque chose, ou qu'il luy parle, tout cela se doit interpreter suiuant ce que nous auons dit dans les Chapitres precedens. Dieu sur tout.





^ 24. au lieu de

CHAPITRE XXVI.

*De quelques autres distinctions
& raretez qui se rencon-
trent dans l'interpretation
des songes.*

ENtre les Principes du songe, tous ceux qui sont des vaisseaux à mettre de l'eau, signifient les choses feminines ; & tous ceux qui sont des vaisseaux à mettre de l'argent & des meubles , signifient le cœur. Tout ce qui se mesle & qui entre l'un dans l'autre, signifie mariage & communication. Si quelque chose tombe de haut en terre, cela signifie la mort de quelque grand, ayant rapport à la chose. Tous les Vaisseaux cassez ou bruslez , ou dérobez , ou ostez de force , sans que le ravisseur ny le larron paroisse , signifient la mort de celuy auquel ils ont rapport , ou bien quelque

perte sans ressource. Tous les animaux que l'on nomme ordinairement de noms masculins, signifient des mâles dans l'interprétation, comme le Taon, iusques à ce que l'on dise expressément vn Taon femelle ; le Cheual, iusques à ce que l'on dise vne Caualle ; le Chameau, iusques à ce que l'on dise vn Chameau femelle ; & ainsi des autres ; & tous ceux que l'on nomme ordinairement de noms feminins, signifient des femmes, iusques à ce que l'on marque expressément que ce sont des mâles ; comme la Perdrix, iusques à ce que l'on dise vne Perdrix mâle ; la Souris, iusques à ce que l'on dise vne Souris mâle ; & ainsi des autres. Toutes les choses dont l'augmentation en longueur est louable, si elles deuiennent longues outre mesure, elles sont alors mauuaises & blâmables dans l'interprétation ; par exemple, la longueur de la langue, de la barbe, des cheveux, de la main, & des autres choses de mesme ; car quand elles sont beaucoup

trop longues, elles ne signifient rien de bon. Tout ce qui est hors de son lieu & de sa place ordinaire, contre la coustume, est mauuais, comme le Turban au pied, le Soulier à la teste, le Collier à la iambe. Si quelqu'un songe qu'on le fait Iuge ou Chalife, n'estant pas de condition à cela, il luy arriuera dans peu de temps des malheurs & du deshonneur & de l'infamie; s'il est de condition pour cela, il luy arriuera de la gloire & de l'authorité, & du pouuoir. Et de mesme si quelqu'un songe qu'il harangue sur vne Tribune, & qu'il ait du merite assez pour cela, il aura du commandement & sera élevé au dessus des autres hommes; s'il ne merite pas cela, il sera renommé par des accidens & des miseres qui luy arriueront, & quelquefois il sera mis en Croix. Tout homme qui a charge & authorité, & pouuoir de commander & de faire des defenses, comme le Sultan, le Cadi, le Vizir, le Maistre des Comptes, & les au-

tres Magistrats ; s'il songe qu'on le despoüille de sa robe, ou qu'on luy rase ses cheueux, ou qu'on luy oste son espée, ou qu'on luy démolit sa maison, ou qu'on luy tend des filets, & qu'il tombe dedans, ou qu'un Taureau le heurte, ou bien vne autre beste qui le fasse sortir de sa place, ou que la beste marche sur luy, ou que sa Tribune à harangues se rompt sous luy, ou qu'il tombe dessus, ou qu'il est à l'article de la mort, ou que l'on plie son tapis, ou que l'on balaye son siege, ou que l'on déplie son Turban, ou qu'on luy fait tomber son bonnet, ou qu'on luy coupe la langue ou la main, ou qu'on luy creue les yeux, tout cela signifie sa mort ou la perte de sa charge.

La Lumiere dans l'interpretation des songes signifie bonne conduite ; & les tenebres, erreur. Le chemin signifie verité ; & l'égarement, mensonge. Le Pais desert & inculte signifie erreur pour celuy qui songe qu'il est dedans. La Forteresse signifie fermeté en sa Reli-

gion, pour celuy qui songe qu'il est dedans. Les Lettres closes signifient des nouvelles non encore divulguées; & les Lettres patentes signifient des nouvelles que tout le monde sçait. Le Sceau signifie confirmation de la chose. Les autres disent que les Lettres scellées signifient des biens dont l'on herite; à cause de ce que dit le Tout-puissant; *O Jean, prens la Lettre fortement.* Les Liures de science & de Jurisprudence signifient de la science & de la sagesse. Les Liures de Poësie signifient illusion, & fraude, & tromperie, & mensonge. Les Liures du Masacheph, c'est à dire, de l'Alcoran entier, signifient sagesse que l'homme acquerra, & amas de la deuotiõ de la science & de l'actiõ, qui seruirõt au public. Si quelqu'un songe qu'il deschire vn Alcoran, c'est vn homme qui a desia renié les reuelations de Dieu Tout-puissant. Si quelqu'un songe qu'il mange des feüillets de l'Alcoran, il mesprisera les Miracles de Dieu Tout-puissant;

ou controllera ses iugemens & n'aura plus de Religion. Si quelqu'un songe que sa maison ou quelqu'un de ses membres, ou plusieurs sont changez en fer, cela luy signifie longue vie. Si quelqu'un songe que ces mesmes choses sont deuenüs bouteilles, cela luy signifie courte vie. Si quelqu'un songe qu'il a la bouche si pleine de viande qu'il n'y reste plus de place, cela signifie que sa despense est faite & sa vie passée. Si quelqu'un songe qu'il est esclave ou captif, il tombera en affliction & misere, & perdra son lustre & sa gloire. Si quelqu'un songe qu'il a presté quelque chose, ou qu'il l'a empruntée, cette chose est du nombre de celles qui ne luy doiuent pas tousiours demeurer. Si quelqu'un songe qu'il vend vn esclave, c'est vne bonne chose pour luy, parce que cela le déliure de soucy & de desplaisir; s'il songe qu'il l'achapte, c'est tout au contraire. Si quelqu'un songe qu'il achapte vne ieune fille, c'est vne bonne chose pour

luy, & non pour celuy qui la vend. Le Musc signifie ioye & gayeté. Le bois d'Aloës signifie bonne renommée, & de mesme toute sorte de parfum de bonne odeur. Le Saffran signifie du bien amassé & bien gagné; si l'on songe que l'on en est teint, cela signifie maladie. Il en est de mesme du saffran sauvage. L'Encens signifie quelque faueur que l'on receura d'un homme. Le Rayon de miel signifie des biens amassez & bien acquis; quelquefois il signifie vne succession. Tout ce qui est espaisi de Miel & d'autres douceurs signifie du bien & des commoditez bien acquises; & si c'est luy qui l'a espaisi, ce sont de ses biens prouenus de son trauail & de son industrie; sinon, ce sont des biens prouenus du trauail d'autruy, comme de butin, de succession, & d'autres moyens subits & impreueus. Le Miel signifie science & lecture, & mariage, & guerison de maladie. Le Sucre & sa douceur signifie de l'or & de l'argent pour

celuy qui en mange, & quelquefois aussi des discours agreables. L'usage des medicamens & leur prise signifie santé & guerison. La Feste de l'égorgement & la Feste d'apres le grand ieusne signifient ioye & deliurance de soucy & de desplaisir, & ouverture à trouuer ce que l'on cherche, pour celuy qui les voit en songe. Le Dueil signifie des nopces, & les nopces signifient vn dueil. Le Ieu signifie desplaisir, & le desplaisir signifie ieu. Les fers aux pieds s'interpretent diuersement ; en general, ils signifient constance & perseuerance. Si donc quelqu'un songe qu'il a les fers aux pieds, & qu'il y ait dans le songe quelque autre chose qui signifie du bien & du bonheur, comme si c'est dans la Mosquée, ou en faisant la Priere, ou en faisant quelque autre chose pour l'amour de Dieu, cela signifie perseuerance dans la deuotion ou retenuë de ses mauuaises inclinations. Si c'est vn Voyageur qui songe qu'il a les fers aux pieds, il n'ache-

uera pas son voyage. Si quelqu'un songe qu'il a les fers aux pieds dans vn certain pais ou dans vn certain lieu, il se mariera en ce lieu-là. Si quelqu'un estant en quelque estat particulier, songe qu'il a les fers aux pieds, cela signifie qu'il demeurera long-temps en cét estat-là. Si quelqu'un songe qu'il a vn pied enchainné à vn arbre, il sera obligé de demeurer avec vn homme de la nature que cét arbre represente, suiuant ce que nous auons dit cy-deuant. Si quelqu'un songe qu'il a le pied pris dans vn filet ou dans vn piege, ou dans vn trou, ou dans vne fosse, il sera embarrassé dans vne affaire qui luy donnera du desplaisir, & à laquelle il donnera ordre à proportion de ce qu'il fera pour se tirer de là. La Selle à Cheual, quand elle est seule sur la beste, signifie vne femme. Il en est de mesme de la bastiere. Le Ieu des Eschecs signifie fausseté, mensonge, & calomnie; quelquefois il signifie discours & dispute. Il en est de mesme du Ieu

des Dames ; le fils de Sirin dit qu'il signifie vne guerre foible entre deux partis. Le Ieu des Osselets signifie tumulte & querelle ; il en est de mesme quand l'on joüe le mesme ieu avec des chatons de bague, ou avec des noix. Le cornet à l'encre signifie la femme ; si donc quelqu'un songe qu'il est cassé, ou qu'il luy a esté dérobé, sa femme mourra. La Plume à escrire, quand elle est seule, signifie science & sagesse ; si elle est avec le cornet, elle signifie vn enfant. Il faut remarquer que quand vn homme songe qu'il a fait son affaire, qu'il est venu à bout de ce qu'il pretendoit, & qu'il a obtenu ce qu'il demandoit, cela signifie que l'estat où il est changera, & que ses affaires iront mal. *Quand ils se re-joüyssent*, dit Dieu Tout-puissant & tout bon, *du bien qui leur est arrivé, c'est alors que nous les surpré- nons. Quand vne chose, dit le Poëte, est paruenüe à sa perfection, elle est presté à déchoir. Attens la diminu- tiõ quand l'accroissement est acheué.*

Il faut aussi remarquer que le mensonge qui se trouve dans le rapport du songe, le corrompt & le fait sortir de son principe. Aussi l'Apostre de Dieu, Dieu luy fasse paix & misericorde, l'a-t'il deffendu en termes seueres & rigoureux. Ceu-
 luy, dit-il, qui ment à son Prophete, ou à son pere & à sa mere, ou à ses yeux, ne sentira point l'odeur du Paradis. Trois sortes de personnes, dit-il encore luy-mesme, seront tres rigoureusement punies au iour du Iugement ; l'homme qui aura menty dans le rapport de ses songes ; car il luy sera commandé de noüer ensemble deux cheueux si petits que personne ne les scauroit noüer ; l'homme qui aura fait des images ; car on luy commandera de les animer en soufflant dedans & personne ne le scauroit faire ; & l'homme qui en aura gouuerné d'autres qui l'auoient en horreur.

Si quelqu'un voit en songe quelque chose qui l'espouuante ou qui luy déplaise, il faut quand il sera

éueillé qu'il cloche du costé gauche & qu'il prie Dieu de le garder de Satan. L'on tient cecy comme venant de la part du Prophete, à qui Dieu fasse paix & misericorde, & il suffit pour empescher l'effet des plus mauuais songes.

Cét autre mot est aussi du Prophe-
te, à qui Dieu fasse paix & miseri-
corde. *Le songe*, dit-il, *est au premier*
Interprete. Surquoy l'on dit, qu'il
vint vn iour vne femme consulter le
Prophe-
te, à qui Dieu fasse paix & miseri-
corde, de laquelle femme le
mary estoit absent; & elle luy parla
ainsi. I'ay songé que la poultre de
ma maison estoit rompuë. Le Pro-
phete, à qui Dieu fasse paix & miseri-
corde, luy respondit ainsi. Ton ma-
ry reuiendra & tu accoucheras d'vn
fils. Son mary dit-on, reuint en ef-
fet, & elle accoucha d'vn fils. Apres
cela son mary s'absenta encore, &
elle songea encore la mesme chose,
& en ayant fait rapport au Prophe-
te, à qui Dieu fasse paix & miseri-
corde, elle eust mesme responce; &

son mary revint, & elle accoucha d'un fils. En suite de cela, son mary s'estant encore absenté, elle songea encore le mesme songe, & vint chez le Prophete, à qui Dieu fasse paix & misericorde, pour luy en faire le rapport. Mais elle ne le trouua pas au logis, elle n'y trouua que Gaise, à qui elle fit son rapport, & qui luy répondit ainsi. Ton mary mourra & tu accoucheras d'une fille. Incontinent apres, dit-on, le Prophete, à qui Dieu fasse paix & misericorde, arriua, & la femme luy raconta son songe, avec l'interpretation que luy en auoit donnée Gaise, à qui Dieu fasse paix. Et le Prophete, à qui Dieu fasse paix & misericorde, luy respondit ainsi. Ne sçais-tu pas que *le songe est au premier Interprete*? La chose arriuera comme elle te l'a dit. Abuguebide le Caseme fils de Salame nomme icy Abubecre, à qui Dieu fasse paix, au lieu de Gaise. Le fils de Quetibe dans son recueil dit Abubecre ou Omar, Dieu leur fasse paix à tous deux & ce son-

*Gaise
femme
de Ma-
homet.
Voyez
le Macé
ne l'art
7. 13.
35 36.*

ge, adjouste le fils de Quetibe, quoy qu'il fut tousiours le mesme, tomba dans les deux interpretations, soit à cause de la diuersité des deux tēps, soit à cause des deux diuers estats ou se trouua la femme.

Vn homme rapporta ainsi vn autre songe au Fils de Sirin. I'ay songé que i'auois perdu mes deux souliers, & que ie les cherchois, & que ie ne les ay trouuez qu'apres m'être beaucoup fatigué à les chercher. Vous estes vn hōme répondit le Fils de Sirin, qui tâcherez de gagner du bien, mais qui n'en aurez qu'apres beaucoup de peine & de trauail. Cette interpretation dépendoit de la conjecture de l'Interprete, car le songe se pouuoit interpreter autrement, puis que le soulier signifie quelquefois la femme de l'homme, ou sa concubine, quelquefois il signifie vn voyage ou des bestes que l'on monte pour cheminer, quelquefois aussi il signifie les biens de l'homme parce qu'il est du principe de la peau, & les peaux s'interpretent des richesses.

En voici vn autre tiré de Mahomet fils de Moïse. I'ay oüy, dit-il, Abunafar parler ainsi. I'ay prié Dieu de me donner de quoy viure par des moyes honnestes & permis, & de m'enseigner vne ville où ie peusse demeurer en repos, & il m'a respondu ainsi plus d'vne fois en songe. Combien de fois m'importuneras-tu ? demeure dans le lieu saint, & fait provision d'abeilles.

En voicy encore vn du Fils de Sirin. Je suis entré, dit-il, dans la Mosquée de la Bosre, comme l'Asouiad fils de Serigue preschoit, tous ceux de la Mosquée estant assemblés autour de luy, & il y auoit derriere moy plusieurs personnes faisant profession de la Iurisprudence Mussulmane, qui discouroient des Loix & parloient ensemble. I'ay fait mon adoration dans le lieu qui s'est trouué vuide entre ces deux assemblées, & apres que i'ay eu fait, i'ay parlé ainsi. Si ie * * * * * la reuerence & la grandeur qui luy appartient. Puis ie parlay ainsi. O Apo-

stre * * * * * du Liure que
 vous voulez escrire à vostre Peuple.
 * * * * * apres vous ce
 que c'est. Dites-moy donc vne cho-
 se que vous avez obmise. Je vis vn
 ieune homme qui respondoit à ceux
 qui le consultoient sur la Loy, & ie
 dis. Qui est cét homme? c'est dit-il,
 le Prophete Ioseph, Dieu luy fasse
 paix. Puis il poursuit. Que dites-
 vous, dis-je, du vin cuit? Je n'en
 sçauois boire, respondit-il. Est-il
 defendu? repliquay-je. Non, dit-il,
 mais ie n'en sçauois boire, puis il
 poursuit. Que dites-vous, dis-je, de
 la secte Ebadienne? ce sont des Iuifs,
 respondit-il. Et de la Bahisienne?
 adjoustay-je. Ce sont aussi des Iuifs,
 dit-il. Et la Raphidite? repliquay-je.
 Ce sont aussi des Iuifs, adjousta-t'il.
 Et celle des Dilateurs? dis-je encore.
 Ceux-là sont ce qu'ils sont, respon-
 dit-il. Et celuy, dis-je, qui ieusne,
 qui prie, qui se ressouuient souuent
 de se remettre de tout à la volonté
 de Dieu, sans se laisser emporter à
 aucune passion? c'est-là, respondit-

il, nostre Religion, & la Religion de Dieu, pour l'établissement de laquelle ses Prophetes & ses Apostres ont esté enuoyez.


En voicy vn autre d'Ibrahim fils d'Adham. Je priois Dieu Tout-puissant & tout bon, dit-il, de me faire connoistre en quoy mon cœur deuoit chercher son repos, & de me gratifier de ce qui m'estoit conuenable. Là dessus il vint à moy vn homme, qui me dit. Respons à ton Seigneur, Ibrahim. Je ni'auançay donc, & pensay estre aueuglé de la lumiere que ie voyois. Puis le Tout-puissant me parla ainsi. Ibrahim, tu me demandes quelque chose au lieu de ma veüe; y a-t'il quelque chose qui la vaille? Je suis, respondis-ie, esperdu de vostre amour, & mon cœur s'enuole à vous. Ibrahim, repliqua Dieu, quand tu trouues ton cœur vuide du monde, tu le remplis de mon amour; & quand il est plein, ie le prens en ma main; & quand il est en ma main * * * * * son oreille, avec laquelle il entend; &


son œil, avec lequel il voit; & ses deux mains, avec lesquelles il touche. Par ma grandeur & par ma gloire, si tu m'auois demandé tout le monde, ie l'aurois mis dans ta main. Que si tu ne te peux passer de demander, demande-moy que ie t'approche de moy, & que ie t'accoustume avec moy.

Ce Liure est acheué avec l'aide de Dieu Tout-Puissant & la faueur de son secours. Dieu fasse paix & misericorde à nostre Seigneur Mahomet & à ceux de sa Famille, & à ceux de son Party.



F I N.







78